

咸豐縣志

地 260.199  
41  
1-4

卷一  
張



民國三年梓行

咸豐縣志

板存勸學所

咸豐縣志序

民國成立之始任官悉用土著侃承在省咸紳公推受黎副總統任命捧檄治咸甫視事苦無成規可循乃搜閱縣志披覽輿圖思得防守之要與夫民情風俗之大凡將隨地因時量為損益用為敷治張本惜於要者或畧而不詳編者又泛而無當至區域方位山川險隘輿圖率多舛誤更無足徵亟欲延聘通儒重加刪訂然又丁庶務叢集之時百廢待舉議不果行心實歉焉是年夏奉大府飭知組織臨時上級自治會都人士公推徐君煦樓出主議席過從時始悉徐君於解組後已成新縣志十二卷及索而讀之見其體例之精辭義之當足與康氏武功志陸氏靈壽志並稱而圖

咸豐縣志

卷首

序

一

表精宥如數掌文尤為近時縣志善本先得我心良用欣慰夫志乘之編纂匪特紀一邑之事蹟將備作國史之資料集縣志而一省之通志斯無缺集省志而一朝之遺事乃可考故一代之興必自成一代之史然非徧徵省縣志博採旁搜仍不足成為一代言史而昭示後世是故縣志宜隨朝代時勢逐加改訂庶於前代已事不致缺略無聞茲當鼎革之初正文獻易墜之日前清二百餘年之典章文物與其一鄉一邑之故事軼聞及今不載後必有無從徵錄之時方今政府有國史之修州邑自應有志書之輯徐君新志之作誠應時勢之需要哉考咸豐設縣雖遲開闢猶早前之宰斯土者多以苗疆目之鄙其地而非其俗舊志之修董之縣令

邑人但司分纂之責故舊志所載較諸他縣有文質詳略之殊徐君則本諸舊志廣羅遺書破前人陳腐之見啟鄉人愛國之心於疆域沿革民族進化言之綦詳其推論不合時宜各新政復能本其經驗發為偉談與近兩年試驗各流弊若合符節眼光識力高出流輩尤具江湖魏闕之思深山之中大有人在讀其志即可見其人而概其地後之規政化者猶得以土司之舊壤目今日之咸豐耶侃莅咸三年回潮自到任至今自愧無一善政可入徐君之志惟三年中惴惴焉慮有負各紳推舉之雅意貽土著服官本省之羞時與徐君相晉接多獲昌言之賜幸免隕越之譏差可告薦舉諸紳而無愧他日之繼徐君續志者紀民國開創之往事述行

政司法自治各歷史侃與徐君均以鄉人當各機關之衝或亦志書中所必備之傳記秉筆者所樂據實直書者乎侃行將去咸前自治會諸紳見是志於地方文化有關公囑侃鳩資付之剞劂工竣公囑序於侃爰書修志之大略兼及侃與徐君契合之始末云是為序

中華民國三年五月吉日沔陽陳侃序

自序

予少時讀府縣志竊怪施南疆域扼楚蜀之腹心當陝黔之衝要何以多歷年所風氣自為致令有國家者羈縻視之等於荒徼蠻苗之壤也又竊怪乎正史所紀載志乘所援據亦以羈縻遠取視之而吾施南各邑五百年內幾欲脫離荒徼蠻苗之名籍而不可得也迨更事稍久見聞較博考證較多乃知正史不盡足信而吾郡邑舊志筆削之權類由外來官吏主之卽有二巨紳老儒參預其間又蹈常襲故徒任鈔胥卒未遑博考窮搜以糾前人之誤夫內夏外夷春秋法也然以治亂之機安危所繫不得已於邊鄙列邦偶寓外之之意至若同處內地之中

咸豐縣志

卷一 自序

一

未負猾夏之咎無端書蠻書苗肆其尊己卑人是丹非素之筆鋒此吾國膚淺文士之陋習實不足以稱信史而為博雅通儒所竊笑也吾鄉自巴國啟宇武陵設郡久躋開明之列迨至烏飛置縣安定置州散毛置府大田置所駸駸乎日就墜闕競勝聲明文物之邦矣特中遘兵燹垂四百年溯自南渡而後神州雲擾衣冠淪於左衽文獻梗於中邦而彼北方學者奴顏婢膝嚼字咀文及攢我倔强特立不甘臣虜於翳荒之域兼以鄉中先民遺耆方且昕夕枕戈披甲協謀抵禦之不暇獨文事一途遂坐聽諸悠悠泛泛之口無或有人焉潤色鴻烈以與通都大邑爭雄明正德間童明甫先生大田所志與施州衛志並世刊

行久為吾鄉史志之鼻祖祇緣季世祝融肆虐遂致抱殘守缺全豹莫窺匪惟施之不幸抑亦吾成之大不幸也設縣以後志之者不一家蔣氏蔭亭文氏菊人宋氏古薌及予家先君子皆各有藏稿今梓行者張氏急就之本而已俊甫先生以制藝名於時惟創修志者為陝右張明府意在早觀厥成應上游之徵取而明府又以入貲得官故於分纂分校等事多假手幕吏此舊志所以詳畧不適宜而為外人所訾議也書成後先生每一念及心輒病之雖然天下郡縣多矣抗懷秦廢封建二十年以來橫覽近關輿圖二十二行省之廣所為大書特書禍棗災梨者汗牛充棟自維譎陋竊歎其中流傳較廣如潛氏臨安韓氏

朝邑康氏武功陸氏靈壽猶為操觚之士所恒言餘則寂寂罕所親聞甚哉作志之難不必斷斷為邊遠郡邑疚也且予嘗聞子輿氏之論誦詩讀書尤貴知人論世是故扶風十志不必襲龍門之八書紫陽帝蜀無庸斥涑水之尊魏矧今值光復時代奠共和國基凡所撰述尤應於紀錄之中默示更新之作用乎予愧未學不文顧念先世由吳官楚宅於茲者近五百年久欲新是志而未能繼以頻年東西奔馳日無停晷近方以虎口餘生藏拙鄉里而兩鬢不覺半凝霜矣驚魂甫定偶檢敝篋得府縣正續志並廣徵私家譜牒著述舉地方沿革之概畧政教人物之大凡不自揣量汰冗刪複為十二卷昔毛西河以蕭山人

刊蕭志之誤自顧何能敢妄效顰惟踵謬沿訛終慮負慚桑梓  
約計經始於壬子夏五月脫稿於是年秋九月非敢持而問世  
亦聊以償夙願所未逮立俟並時補瀋博聞風競起編墨而斧  
斤之且欲聚族斯土者急起直追聿造文明優美之幸福行見  
吾邑山川增色人物蒙庥庶不致俾外界通人再鄙我為荒徼  
蠻苗舊疆則於不佞新志之意其庶幾乎中華民國元年十月  
既望徐大煜煦樓甫

例言

一修志與修史不同志供考證史寓勸懲今修志於革故鼎新之後則於考證之中宜微寓勸懲之意茲編紀叙偶參論斷亦欲覽者各抒偉識共圖促進地方文明而已

一志乘裨益政治教育與土地開闢人羣進化甚有關係茲編第一第二卷誌地方緣起也第三至第五卷誌政教陳迹也第六至第九卷誌人才大凡也第十至第十一卷誌民族變遷也第十二卷雜錄舊聞備前十一卷之考證也武功志不記災異靈壽志不收釋老茲並登之匪曰好異亦聊備一格云

一縣境自周秦以來日進開明漢唐州郡兼治尤多遺蹟可考自元人入主中夏而吾施始以土司稱雄此吾鄉先輩於種族主義獨冠其他郡縣人民而特為講求者也至朱明光復省州入衛僅任各司裂土分治以殺其勢卒不能舉覃田向冉諸姓驟加翦滅亦見吾鄉人原具獨立自治之性質正無取乎強迫而奴隸之也茲特於各卷紀叙表而出之

一前清定鼎湖南北歸命較早吾鄉土流官民直至康熙二十一年始奉正朔前此風氣自為未敢遽以兵威強臨者為吾鄉人樸勇忠義之性不敢輕於嘗試也茲亦於各卷紀叙表而出之



一輿地志宜詳沿革府志雖嘗列表而於咸宣來各處不詳屬古何縣耳食者遂臆斷為古蠻苗地此大誤也童志衛所並重則施州之與大田俱有文獻可徵茲特蒐羅標明以見縣境開化較早視宣來各邑猶有優絀之判

一舊志輿圖疏畧位置舛誤茲用開方法特為審訂山水疆界村集道里一一註明雖未敢云精確自問或不至十分訛謬一舊式圖繪內外八景以及佐貳官署誠為無謂茲刪省之以歸簡易又阮氏廣東謝氏廣西二志以物產風俗附輿地卷中亦非無見茲既另立禮教財賦專門仍宜劃分以醒眉目一山水須詳經絡於形勝建置乃有關係茲編特記大略雖未

按里一一詳登較之泛記山名水名星一漏萬者似有雅鄭之別

一縣中建置本未完備近十年來微有進步茲編所登而於舊有學校善堂村集等事彌殷厚望如曰故步自封殊非紀載本意

一舊府縣志分卷標目如食貨志雜紀領款天文志附會分野典禮志徒事鈔胥名實牴牾見笑通人茲釐正之非故立異亦不苟同云爾

一舊志全縣戶口甚為疏漏近雖屢飭調查而故事奉行仍未得其實數茲所登特具概略如欲詳確應俟異日

一前清兵制窳敝不可復用茲復詳誌員額俸餉塘汛等事匪特不忘古初亦欲藉以鑑軍政得失耳

一陸軍對外警察安內東西列強成法具在惟中國士廣人稠交通不便前清混合二者以為作用民國初建一時頗難驟幾畫一故志武備仍以警察附舊制兵團之後

一官師人物表後列傳頗多增益皆確有見聞善善從長以資風勸至百年前先民遺老口碑具在公論尤孚萬不敢傳會阿好貽譏穢史

一藝文分卷原本漢書府縣志僅載詩文多首無經史子集著述以實之殊乖體例茲刪去列文苑諸傳至有關地方風教

掌故之文字仍附錄其他各卷中亦期無戾史法而已

一縣境自元明以來土流間治每為外人所藉口茲詳記始末亦見田橫荒島尉佗南粵非特無損名譽益足增色鄉邦

一土司嫡裔徙籍武漢譜牒無存舊府縣志紀錄亦甚缺略茲所補入遺漏仍多然較舊志斷爛雜收尚有頭緒

一近世講求殖民政策不遺餘力喧賓奪主識者憂之縣境人民因時遞嬗衰旺各殊茲特創登氏族一志亦欲宅斯土者羣知優勝劣敗天演公理庶各及早奮發期與山邑土地長存

一縣境數經兵燹公私圖籍散佚過甚茲所考摭除正史外凡

採自童氏景大田所志宋氏鼇李氏宗汾羅氏德崑何氏遠  
鑒雷氏春沼尹氏壽衡施南府志張氏光杰縣志刻本家奉  
政府君縣志稿本更蒐羅旁鄰郡縣志及私家譜牒著作但  
使關涉縣中重要案件壹是收錄至影響傳譌繁文浮藻無  
裨政教者概不濫登

一書成於一手稿脫以四月網羅未備時期過促毛舉急就紕  
繆難免博雅君子諒而教之感甚幸甚

咸豐縣志目錄

卷一 輿地志

沿革附表疆域附圖 山川 要隘 古蹟

卷二 建置志

治城 公署 倉庫 學校 善堂 村集

津梁 舖遞

卷三 禮教志

典禮 壇廟 宗教 寺觀 風俗

卷四 財賦志

戶口 田賦 物產 雜稅 釐款 蠲卹

咸豐縣志

卷一 目錄

八

卷五 武備志

歷代兵事 綠營舊制 俸餉 塘汛 團練 警察

卷六 官師志

文職表 武職表 官師列傳

卷七 選舉志

貢舉表 孝廉方正武舉附 仕籍表武職封贈世襲附

卷八 人物志

列傳 孝友 忠武 義行

卷九 人物志

列傳 文苑 列女

卷十 土司志

列傳

金崗安撫司

龍潭安撫司

唐崖長官司

元明以來土司紀畧

前清改土歸流緣起

卷十一 氏族志

列傳

土家

官家

商家

卷十二 雜志

咸豐縣志卷一

輿地志

沿革

古與郡地共屬蠻夷國周初為巴子國地後為夔子國地戰國時屬楚巫郡地秦屬黔中郡漢屬武陵郡東漢并屬南郡地三國迄晉屬建平郡齊梁屬宜都郡後周分今咸來兩縣地為烏飛縣隋因之未幾省烏飛置開夷縣以後皆屬施州唐由州改郡省開夷共為清江縣五代又分今咸來兩縣地為感化州宋為富州地尋改為羈縻柔遠州初名懿州後改安定州元廢州置散毛府後乃分今咸豐縣地以南屬散毛司以北為唐崖金崗龍潭等司明洪

咸豐縣志

卷一 輿地志

十

武五年定其地後割散毛司地之半為大田所今去縣治二十五里有散毛河蓋猶沿古之名也明史土司列傳洪武二十三年涼國公藍玉克散毛司擒刺惹長官覃大旺等萬餘人奏稱散毛鎮南大旺施南等尚蠻叛服無常黔江施州衛相去遠難應援今散毛地與大水田相連宜置千戶守禦乃廢散毛宣慰司置大田軍民千戶守禦所命千戶石山等領土兵一千五百人鎮之就地屯墾并額定酉陽黔江協濟本所兵糧歲輸銀兩麥石以為常然是時仍為土流間治大指就龍潭河為界河之南為流官屯墾地先後任大田千戶者為石山鄭瑜徐騰達楊公保張官音冉應義冉應禮冉應信蔣春刑源丁德梅世相舒成祖田茂壁張仕元蔣天

祐許成祖子孫世襲或降百戶至前清康熙時始廢世襲河之北  
為土司割據地金崗安撫司元置明洪武四年覃耳毛歸順尋叛  
二十三年定其地未樂五年置安撫司宣德三年令兼領石關崗  
長官司西坪蠻夷官司隆慶五年覃壁叛討平之削其爵為崗長  
後仍復安撫龍潭宣撫司元置明洪武四年田起喇歸順改安撫  
二十三年廢二十五年復置唐崖安撫司覃啟元時有功以宣慰  
世襲明洪武四年子直隨廖永忠征蜀降職未幾復安撫宣慰世  
職并領蒼蒲活龍二副司前清康熙時降長官司雍正十三年忠  
崗司田光祖等糾十五土司呈請歸流湖廣總督邁柱請以十五  
土司各境并原設恩施縣增為一府五縣更將撥隸四川夔州府

之建始縣割還特設施南府轄六縣合大田所及唐崖金崗龍潭  
西坪各土司地共設一縣命名咸豐周圍八百餘里縣治即大田  
千戶官署地乾隆元年置知縣訓導巡檢典史等官

按舊府志散毛宣撫司古蠻夷國周為巴子五溪地春秋戰國  
皆楚地秦惠王欲楚黔中地以武關易之即此漢屬武陵郡後  
周以下置縣五代為感化州宋為富州尋改羈縻柔遠州元因  
之尋廢為散毛崗置散毛蠻夷官司至元三十一年崗主覃順  
入貢陞為散毛府屬四川行省至正六年改散毛砦等處軍民  
宣撫司明玉珍改散毛宣慰使司都元帥明洪武七年改散毛  
沿邊宣慰司屬四川重慶衛二十三年又割其半為大田所編

戶一里領大旺龍潭二安撫司尋以藍玉奏廢散毛宣慰司永樂二年五月復置散毛長官司屬大田軍民千戶所四年三月陞宣撫司屬施州衛蓋散毛宣撫司領地明以來本兼大水田而有之自洪武割半設所後則上半入今咸豐縣境下半即今來鳳縣地也

又按舊府志載雍正六年湖廣總督邁柱會同巡撫馬會伯題奏湖北荊州一府管轄州縣衛所共計一十五處綿延千有餘里凡遇盤查錢糧倉庫提審命盜案件每多遲延蓋緣該府所屬之歸州巴東興山長楊四州縣施州大田二衛所俱地處山僻離府寫遠文移往返動需時日一經駁查即逾例限且界連

他省接壤土司是以田土爭訟亦倍於他邑而衛弁又無承審命盜之例每遇命案必詳委鄰邑驗審往返驗鞫更耽時日譬指鮮應呼吸不通此事多遲誤之所由來也臣密加訪查按諸輿論隨與撫臣藩司會商必須更設州縣庶於地方有益去後今據湖北布政使黃焜詳議請將歸州改為直隸州施州衛裁改為縣大田所裁去所弁歸併縣轄同與山巴東長楊三縣併隸歸州管轄刑名錢穀事件俱令該州督催彙轉歸州原有州判一員今應復設以資督緝施州衛千總裁改典史一員就近查緝其官俸役食以舊日衛所之俸薪儘敷應用再施州原有專管遊擊大田所原有施州營把總一員帶兵可資彈壓無庸



另議再施州衛原管之施南十五土司應歸縣轄令歸州兼轄  
巡判道統轄施州改設知縣典史則以守備千總衙署居住巡  
檢則以大田所衙署居住歸州州判有原設衙署可以居住無  
庸另議蓋造其施州衛有原設教授訓導二員取進生員一十  
五名今應仍照舊制俟教授任滿再有補選之日卽改為教諭  
員缺但各州縣設有祭祀鄉飲舉貢長夫孤貧花布等項銀兩  
應照例逐一添設統候查核題允之日另造細冊呈請咨達等  
因請題前來臣覆查歸州改為直隸州施州衛更設為縣在該  
州管轄四縣則盤查倉庫審理刑名任專地近案件易結一轉  
移間實於荆南要地大有裨益云云奉旨題改恩施縣七年設

官與興山長楊巴東同隸歸州十年東鄉司覃壽春以長子得  
罪正法諸子不才呈請改流十一年忠建土司田興爵以橫暴  
不法侵龍山改設內地經南臬審實擬罪改流俱為恩施縣地  
雍正十三年施南司覃禹鼎以淫罪抗提擬罪改流又容美土  
司田明如窮凶極惡覃禹鼎及覃壽春長子楚昭皆其壻也每  
犯罪輒匿容美屢提不出當事以其先人從征紅苗有功置弗  
問明如怙惡不悛至是特參挈問明如畏罪自經忠尚司田光  
祖等糾十五土司呈請歸流湖廣總督邁柱題以十五土司各  
境並原設恩施縣增為一府五縣將撥隸夔州府之建始縣割  
還特設施南府轄恩施宣恩來鳳咸豐利川建始六縣省歸州

直隸改容美及所領五司為鶴峯州隸宜昌府乾隆元年定各屬疆域及文武官制一切經費悉如他郡邑焉

沿革表

南全境恩施 宣恩 來鳳 咸豐 利川 建始

上古蠻夷國

同上

周 初為巴子國地 後為夔子國地 戰國時屬楚巫郡地

同上

秦 黔中郡

同上

咸豐縣志

卷一 沿革表

十四

漢

分屬武陵郡屬共為武陵郡屬 陵郡及之充縣地及南之酉陽縣地 南郡地 郡所屬之很山縣地

分屬很山夷道二城地

三國 建平郡巫縣地

同上

吳永安 中分宜 都郡置

晉宋 建平郡沙渠

同上

建始縣

齊梁 宜都郡巴山縣 梁置

同上

陳魏

州郡治 不置縣

同上

後周

置亭州鹽水鳥 及清江飛兼治 郡

鳥飛縣 鳥飛縣 鹽水縣

業州建德 三年置併 置資田郡

江州

鳥飛縣 鳥飛縣

隋	唐	五代	宋	元	明
施州初置 廢郡一 津庸州 日庸州 大業初 廢州置 清江郡	施州清 江郡後 改清化 縣	施州屬 蜀	施州清 江郡	施州	施州衛 洪武初 年廢州 為衛設 指揮屬 湖廣都 司
清江縣 開皇五 年置	清江縣	清江縣	清江縣	清江縣	衛屬內 地
開皇時 置充州 大業廢		羈縻順 州	羈縻順 州	施南宣 慰司沿	施南宣 撫司忠 尚高羅 木冊忠 建共五 土司
開夷縣 烏飛縣 改置	武德元 年省開 夷共為 清江縣	初為富 羈縻順 州	初為富 羈縻順 州	至元三 十一年 置至正 六年改 散毛砦	散毛宣 撫司 壁東流 大旺卯 尚漫水 共六土 司
開夷縣 鹽水縣 建始縣	同上	羈縻感 化州	羈縻感 化州	至元三 十一年 置至正 六年改 散毛砦 并置唐 崖金尚 蓮澄等 司	大田所 洪武二 十三年 割散毛 司地之 孝汝溪 及支羅 南坪
開皇廢郡 大業廢州 以縣屬清 江郡	建始縣 貞觀八 年以屬 施州	羈縻地 又屬龍 溪縣	羈縻地 又屬龍 溪縣	至元三 十一年 餘為土 司地	官渡壩 屬施州 洪武中 改屬四 川夔州 府
	建始縣	建始縣	建始縣	建始縣	


咸豐縣志

卷一 沿革表

五



# 咸豐縣圖



疆域

咸豐縣位於湖北省城西南二千零二十里距舊制施南府城二百四十里其疆域東至龍坪與宣恩縣宋家溝交界距縣治七十五里東南至老鴉關與來鳳縣三堡嶺交界距縣治四十五里西南至金竹泉白家河以西與四川酉陽州黔江縣交界以南與來鳳縣交界距縣治一百五十里西至水井壩與四川黔江縣長嶺岡交界距縣治一百里西北至牛池子西與壩與四川黔江縣之林水鄉交界距縣治二百一十里北西至龍嘴河以北與利川縣之石門坎交界距縣治二百四十里北至大村館龍嶺與利川縣雷音山交界距縣治二百里北東至黑崗以北之洗松坡與利川咸豐縣志

卷一

疆域

山川

十七

縣南境之毛壩交界距縣治一百五十五里東北至石人坪與宣恩縣之太平壩交界距縣治一百零五里東西距一百八十里南北距二百四十五里

山川

咸豐一磬礪不平之區也其地山多水少平原不及十之四五山之高聳而叢雜者以智信仁孝禮忠義悌及信孚里為最此數里之山皆發脈於利川縣之齊曜山一由都亭山下石板頂過馬鬣嶺而至縣境東北之星斗山為思宣咸利四縣分界處此山高接雲霄形如春筍據舊志有積玉山者高峻積雪經春不消其南里曰十三盤山旁有黑崗巖若城門水從中流二里許始出繞縣

北為青崖寨谷等溪其上又有一小洞伐木為欄明洪武中征蠻  
兵嘗經此以今考之大抵卽星斗山之旁支一由利川西南境眾  
小山來入縣境蜿蜒起伏突起為二僊崖與四川黔江縣接壤此  
山壁立數百丈山頂方廣四十餘里上有飛瀑三道下流成川又  
星斗山二僊崖中相距均約百里有雲霧山者當外四里之中心  
峭拔為羣山冠以上皆縣境最著名之山而外四里層巒疊嶂大  
都由此三山發脈者也內四里山脈由四川酉陽州東境夾板石  
來分為羊蹄蓋為金竹泉為薄刀嶺為天上坪為東山坡為界坪  
為三堡嶺以迄宣恩之上崗坪小關山凡與黔江酉陽來鳳宣恩  
分界之處以高山占大多數水之大者曰龍潭河源出利川縣東

南境至金崗司東行過宣恩縣之太平壩折而西流入縣境過龍  
潭司至唐崖司匯南河馬河二水約五里許而入大河再過大屋  
澗朝陽寺等處而出四川黔江縣之線壩又約千里而達涪州入  
大江南河自大村小村至尖山寺以下馬河自活龍坪茅壩忠塘  
至唐崖以下東西交匯而為兩河口併入龍潭河下流與平樂兩  
里伏流出口之野貓溪水匯成大河自此以下可施舢舨行三十  
餘里達線壩其他仁孝禮忠義悌三里中溪澗小水皆附流以入  
龍潭河又平陽里之羊蹄蓋南北各有小水流下樂鄉里之桐車  
壩至丁寨更匯樂鄉里之高灘所出水經土老坪唐家溝十字路  
等處北行至野貓河而為西北江此水北下五里許入天成橋伏

流二十里至斷水峽始由亂石中流出為野貓溪又數里入龍潭河下流為大河卽上所謂可施舟楫處也其不入龍潭河者惟永豐太和二里以及忠堡南北諸小水此三處之水以散毛河為幹流其自西來者一為太平溝以北之水一為石家溝以南之水其自北來者一為茶園溝以北之水一為蒿子壩以西以北之水先後合流過馬河壩龍坪等處又散毛河馬河龍坪附近均有小水自南山來入此幹河東行入宣恩縣境下忠建河而與清江合流入宜昌者也散毛河自高尖壩以上秋冬水涸春夏水亦小不逮龍潭河遠甚又西北龍嘴河出利川入黔江西南白家河出酉陽入來鳳雖經縣境數十里均與龍潭河不相涉內四里中央多平原惟北瀕龍潭河南界來鳳等處峰迴路轉不免崎嶇之苦西北江一帶灌溉有資而水患特甚其他高原大陵每遇旱魃為災農田水利每不若瀕江地方之便利云

要隘

今非閉關自守之時也而亦有鄰匪竊發不能不藉阻隘之力以防狼奔豕突之害者咸邑素號山鄉界瀕湘蜀其與外屬毗連之處率多重岡大阜在在易於扼守惟就現時情形論其西面自四川來者有活龍坪汛最扼石砭彭水入咸之要衝有石牙關亦彭水黔江入咸之要道有深溪關在縣西達酉陽州有沙子場亦酉陽要道又鑼鍋坪以南之磨刀嶺璇坨此為防制川湘逸匪之形



勝地他若獨樂關在土老坪以南數里老鴉關在忠堡以南十餘里又滴水關在忠堡左側通東流司此皆防制來鳳逸匪之要路也卡門在白菓壩以東十里地此為防制宣恩逸匪之要路又黑崗當恩利兩縣之衝大村八家台當利川全縣之衝一旦鄰匪告警皆可扼要控制又內地高山大阜以及石洞崕岬所在皆有但非大股悍賊本地土人常有集砦修洞以深居而自衛者合全縣計之其著名者不下數十百處茲不悉登以避繁瑣

### 古蹟

咸豐縣有內八景外八景之說由來久矣內八景者一三星伴月月山在城內勢曲如月傍有三山峙列如星與月山相連一墨池

### 咸豐縣志

#### 卷一

要隘

古蹟

三

生香池在城北門內老文廟基旁其地多墨石墨泥水泉香美一朝霞煥彩朝霞嶺在城外東隅方曙每有霞光燦爛一積翠龍煙積翠山在城外北隅峰巒秀麗一秀屏錦嶂秀屏山在城前高聳環列若屏嶂然一青龍煙雨青龍山在城西南每嶺頭煙生卽雨煙散則晴一朝陽飛鳳朝陽山一名飛鳳山在城東南形如飛鳳一廣利源泉廣利井在城東門內其水甘美不涸或以為觀音橋下之水既供汲飲且資灌溉外八景者一僊掌高懸山在城西三十里白巖壁立形如僊掌一萬頃湖光萬頃湖在城西南百二十里與四川酉陽州接界或曰卽今酉屬瑪瑙湖是也一蒼崖瀑布瀑布泉在城東三十里卽今忠堡屯白巖砦之左一洞口龍涎洞

在城東十里卽白水之龍洞一杜塘躍鯉塘在城東三里與杜氏居址相連寬數畝內有僂鯉飛騰至今常見靈異一合水天橋在城西二十五里二水合入洞上有自生之橋高十餘丈卽今野貓河天生橋也一象鼻吸流地在城東三十里巖如象鼻兩竅空靈橫截溪流水從中過一龜魔洞石洞在城東北五里內產龜魔石斑點多姿可玩此皆騷人墨客與諸巖棲谷隱者流所常臨眺留題而流傳不朽者也蔣蔭亭廣文文菊人明經題詠尤多

按瑪瑙湖當前明時隸大田所為冉楊二姓千戶屯墾地文菊人明經詩西南民戶僥天幸萬頃湖成萬頃田可知八景之說由來已久不必其為改土歸流後好事者所點綴也

咸豐縣志

卷一 古蹟

二十一

韓信坡舊府縣志謂在縣城西門外半里許相傳信亡楚歸漢寓此按史記淮陰侯本傳漢王之入蜀信亡楚歸漢又高祖功臣侯年表淮陰侯初從項梁梁死屬項羽為郎中至咸陽亡從入漢為連敖與客咸陽入漢此非必由之路坡之得名殆別有所據不必其為亡楚歸漢時也

桃源古洞一在土地坪右側一在大屋澗南岸相傳漢季土人避難其中前清咸豐同治間有人曾至其地掘出五銖制錢不少又得古鼎數事上鐫小篆隸書模糊不易辨識大指為秦漢時故物適遠商經過重賞購以去

太康古碑在縣署前相傳晉太康時鐫設縣後掘出樹常平倉外

唐大令方耀署中卽事有尚有邑人話太康之句咸同兵燹遂斷  
殘無存按三國志吳主休永安三年分宜都郡置建平郡領信陵  
興山秭歸沙渠四縣是時晉有建平都守尉領巫北井泰昌建始  
四縣晉武帝咸寧元年改都尉為郡於是吳晉各有建平郡太康  
元年吳平併合當其先陸抗請增兵王濬治樓船皆汲汲以建平  
門戶為重則此十餘年中經營生聚建設必多迄於太康歸命錫  
封人民安堵碑之建於是時為紀事銘功理或然與  
歌羅山在縣城西南隅今訛為高羅山唐李白曾過此聞杜鵑後  
黃山谷宿此夢聞李白述其竹枝詞三首文菊人明經著有歌羅  
驛考卽謂此也

咸豐縣志

卷一 古蹟

二十二

碧山在今平陽里楊崗亦以李白詠此得名楊情田明經集里人  
建寺其上郡屬官紳題詠甚多

單葛洞在縣署後右側明洪武初年涼國公藍玉統兵征散毛諸  
崗駐兵於前面後因此設所官衙署

龍潭土司故宅在縣治東北六十里金崗土司故宅在縣治東北  
一百里唐崖土司故宅在縣治西北六十里明天啟時宣慰使覃  
鼎建有石坊勒荆南雄鎮楚蜀屏藩八字今尚存前清雍正十三  
年廢為通判署道光十二年裁西坪土司故宅在金崗司西境或  
曰卽今活龍坪距縣治西北一百八十里明初唐崖土司分置右  
副司以秦國龍領之前清初年廢

硝場在今縣治北一百里懸巖高聳下有津渡其半巖一孔勢若城門中產硝甚多載明一統志今雖仍產硝不復若古昔之暢旺矣

蠻王石碑在今縣西九十里相傳古蠻王樹此字跡年久磨滅國公寨在金崗司土司覃壁叛明命將參政馮成龍監軍副使張大業平之其屯兵處今名國公寨

悔寨去國公寨數里覃壁畏罪逃其上朝廷以其尚知悔悟赦不誅削其爵降為崗長使主其地故名

興國寺在縣治西門外半里明洪武十三年創建置備莊嚴景泰時按察僉事沈慶詩曰公餘幾度訪招提寶殿陰廊人望迷曲曲

咸豐縣志

卷一 古蹟

二十二

檻幽雲作路登登山險石為梯忘情駐節從吟賞適興凭欄任品題珍重道場傳世業宗風千古繼曹溪正德時指揮僉事童景詩曰撚指重遊又攝提蒼梧老木半淒迷簾含河水魚鱗畝石次餘霞雁齒梯半日有緣隨衲子百年無警到雕題吟成擬叩傳燈事歸促花韞月滿溪名勝蓋可想見隆慶萬歷時補修尤稱精潔迄於前清數朝皆為縣中名勝地近三十年來乃日就衰頽雲霧山在縣治北九十里山最高登其顛可周覽百餘里有雲霧古刹建自有明成化年間土人立有碑誌

石人石馬在今唐崖司桓侯廟內相傳明時土司所鑄馬儼儼權奇勢若騰驤石人執轡其旁如控馭狀馬高五尺人亦稱是石工

精巧為近時所難得

楊崗在平陽里明成化十三年奉上諭四川西陽宣慰司冉雲  
帶領官軍深入九甫塘茅坪排崗楊崗清水塘白崖塘等處剿  
苗殺寇勤勞可嘉特進階為明威將軍是為楊崗見載籍之始

建置志

治城

吾鄉自巴國啟宇設立漸備左桓九年行人韓服通好上國至將軍蔓子許楚三城雖難確指其地惟就毗連境土揆之施夔一帶如夷水酉水流域必多修城可以扼守戰國而後頗形退化三國以來日進開明至太康建平合併碑碣宛然五代迄宋設州分治有無城郭建設殆不可知南渡而後神州陸沈部落大長割據世守刑賞自專大有小國封建之勢然皆設礮築砦於縣境東北各鄉未嘗為仇仇之壙也自明初割散毛司之半設流官於大田所

咸豐縣志

卷二

建置志

治城

十五

卽就其地經畫一切為城周五百丈有奇崇二丈門四洪武二十三年千戶鄭瑜甃後圯前清乾隆二十八年知縣陳世英因設縣已久人煙日稠估定城基周三里三分後因地勢險要且糜費難籌未遑大舉嘉慶元年教匪蠢動邑令康又民倡築土城光緒三年邑令向崇基因舊城門特加補修并標其名東曰朝陽南曰來薰西曰映奎北曰拱極街道昔時較繁或有瓦房街墨廠街倉房街興隆街等房舍櫛比歷經兵燹屋宇半燬今通商者惟由小街口至教場壩一帶形勢直長少曲巷近八年內秦令毓麒籌款新修街路頗稱整潔商民便之

公署

知縣署卽因大田千戶公署改建乾隆四年特加補修咸豐同治以來地方官紳隨時捐修房屋共三十餘間監獄十間建設具備舊訓導署原在守備署後乾隆五年建後移於文廟左側近十年來稍加補修房屋共二十餘間典史署在縣署右側房屋共十餘間皆乾隆元年建巡檢署在縣西七十里之張家坪嘉慶年間移建附近蝦蟆池塲中房屋共十餘間同治時張鵬翰任內空曠寢圯後任稍事培修規模畧具通判署在西北六十里之唐崖嘉慶年間裁撤通判公署尋毀又已裁守備署在治城西門內屋半毀遺址尚寬濶有餘城守把總署在治城南門內屋盡毀遺址猶存又把總署在縣治西北六十里之唐崖屋半毀遺址尚寬濶有餘

### 咸豐縣志

#### 卷二

建置志 公署 倉庫

三六

外委署在縣治西北百八十里之活龍坪屋半毀遺址猶存

#### 倉庫

常平倉在縣署前面舊傳倉外有太康古碑今已斷殘無存唐春聖明府署中卽事有尚有邑人話太康之句又倉內冰鏡館乾隆時陳令世英建現今倉共十一廩以官清歲稔踴躍輸將新盈寧十一字編號原額設穀四千石又附貯穀一千五百石共五千五百石嗣因咸豐年間屢次挪發兵穀動用無存同治三年知縣張梓奉文勸捐彌補實存穀四千二百二十五石光緒以來因荒歉推陳易新間有銷耗本年四月張知事鳴鳳移交陳知事侃實量得淨穀四千零七十三石社倉分設各里原有十二處儲穀共二

千零一石九斗四升歷係各社長經理嗣因咸豐十一年挪發兵  
穀動用無存宣統二年施鶴兵備曾道廣鎔倡辦六邑社倉募額  
穀數千石按年攤繳存儲備荒旋因國變遂作罷論庫在縣署大  
堂左側戶書兼管所有不過朽敝兵器什物而已

### 學校

咸豐學校之建置宜區分科舉學堂為兩期舊制學校以科舉為  
目的國家之設備者為學宮為書院為賓興為義學縣境自周秦  
以來日漸開化漢晉而後郡邑分治學校之興應臻完備一自蒙  
古內侵中原雲擾矧施屬邊疆風尚強悍自元迄明五百年中漢  
土雜處學校廢墜士之有志嚮學者多就武漢荆宜等處負笈從  
咸豐縣志

### 卷二

建置志

學校

七

遊卽遇三年大比之期所有騰聲而發跡者計其行李之往還資  
斧之損耗較之腹地學人相差不可以倍屣計及至改土歸流而  
後一切設備視彼上游州縣大略無殊試詳紀之俾後之言教育  
者資考鏡焉

學宮初在縣治西街乾隆五年建後圯四十五年遷縣治東南隅  
五十六年知縣張曾敕訓導胡烜邑紳楊勝岳馮世璜蔣進綬倡  
率重建祠殿門廡泮池明倫堂等設立如制前清科舉舊制自乾  
隆四年設咸豐縣學額歲科試各取進三名併將巴東縣原設訓  
導撥歸咸豐縣學更額定廩生二名增生二名武學二名乾隆四  
十六年郡屬官紳呈請設棚南滙吳白華學使赴施試士定額每



試文章合府學取進五名咸同軍興後籌餉甚鉅恩利兩邑皆廣學額邑人未經援例陳請光緒初年學使高釗中以文風增進奏請與宣來二縣加廣學額各四名廩生二名書院創自嘉慶中葉學使鮑侍郎桂星題有蔚文書院匾額同治末年余大令思訓以費揚二姓叛產撥入後益加擴充年收租穀三百餘石即假城南文昌宮為生童肄業地光緒二十三年余大令良才移於新購劉姓故宅更加修葺房舍尤宏厥即今之高等小學堂是也賓興館創自彭大令仲芳年收租穀一百餘石至光緒時余大令良才又募捐增置產業名新賓興年收租穀二百餘石而別舊有之業為老賓興兩起可收年租共約三百餘石義學之設以金崗司一所

咸豐縣志

卷二 學校

天

為最古乾隆五年奉文建每年請領藩庫銀十六兩作膏火二十四年知縣張禹將縣民互爭生基坪官地變置水田山場一分歸入義學每年收租穀一十六石一斗二升三十九年知縣潘憲武將民互爭黃土坡官荒詳歸義學其不由官立者則有丁寨義學二所一培英書院在市南文昌宮道光二十年建一廣育義塾在市內禹王宮咸豐十年建又學官直隸之學田一村堡樹一處武生秦朝品捐作文廟修補之資每年租穀折錢五千文一麻布溪一處每年租錢一千文一墨池井一處在北門內老文廟基每年租錢四千文一梅家堡一處一聖宮後每年租錢四千文以上皆據府縣志登載者近三十年捐施之業數起查明再登

學堂自前清光緒二十八年經始籌辦至三十一年即假新購書院房舍開辦本縣高等小學所有禮堂講堂教員室自習室寄宿室圖書室膳堂沐室體操場及一切應用各室建設俱備六月招生八月開學其初任管理兼教員為優行廩生徐大椿繼任者秦都尉馨元秦明經烈大治皮常英宣恩王者香迄今六年有餘畢業三次宣統三年又於其中附設初等農業學堂九月國變學堂為巡防軍人佔據器具門壁遂多損失本年正籌款補修不日招生開課以廣教育初等小學本城共設四處八里中設者甚多惟旋興旋廢無確定之地點要在地方官紳極力提倡而已

善堂

咸豐縣志

卷二

學校

善堂

二十九

縣屬城鄉有施藥育嬰義渡賑荒諸善舉多假寺觀公地為開辦場所無特定之堂室也丁寨於同治末年創設育嬰堂未幾因訟廢地光緒十八年余令良才奉撫憲譚檄募捐置育嬰局全縣集資至八九千釐分設各里村集後因承辦者報銷不實且劣紳侵漁過多二十九年趙令曾蕃提作學堂經費款遂全耗現惟丁寨縣城蝦蟆池等處有善堂基礎丁寨善堂在上街自丁酉戊戌疊遇荒歲所辦施種施粥施米施錢施藥等事頗歸實濟惟公款無多未克大舉現在存儲生息之款約四百釐上下縣城善堂在小街口歷年除因公支用外聞尚存款約數百釐蝦蟆池善堂在下街戊申己酉曾辦減價平糶頗有效現存之款無多又楊崗亦有

善堂存穀數十石由本地殷富輪流掌放生息義渡惟龍潭河及南河一帶共十餘處其的款概係本境糧戶捐置產業買舟催渡者

### 村集

全縣區分八里曰永豐樂鄉太和上下平陽此四里約當龍潭大河以南地又名內四里曰仁孝義悌禮忠智信此四里約當大河以北地又名外四里又乾隆年間四川湖北兩省大吏會勘禮忠義悌兩里西南邊地文牘往還頗費周折後遂名其所勘地為幫里亦併號為外四里永豐里之村集二一西門外一南門外樂鄉里之村集四曰丁寨曰十字路曰土老坪曰藍田灣太和里之村

### 咸豐縣志

### 卷二

### 村集

集六曰馬河壩曰龍坪曰太興場曰散毛河曰老李壩曰屠莊壩上平陽之村集四曰楊崗曰蝦蟆池曰興隆場曰沙子場下平陽之村集一曰忠堡仁孝里之村集三曰尖山寺曰濟水塘曰二台坪義悌里之村集四曰水壩曰活龍坪曰毛壩曰忠塘禮忠里之村集四曰大村曰小村曰燕子峯曰李子溪智信里之村集二曰石人坪曰黑崗幫里之村集三曰蛇盤溪曰大路壩曰朝陽寺以上共三十三村集除縣治西南二門外鄉間村集以清水塘忠堡丁寨為繁盛十字路毛壩尖山寺活龍坪次之最下者惟土老坪藍田灣朝陽寺至沙子場大路壩兩處則跨黔咸兩縣而分隸者也近十餘年來東北角恩咸利三縣交界新設三星場正北咸利

兩縣交界處新設八家台塲是亦足為土壤墾闢戶口增加之一證

### 津梁

縣境少航行之路惟朝陽寺以西可施舫艫行三十里至黔江縣之線壩餘則龍潭河水深岸濶視他水澗甚每當春夏水漲病涉者多所有南北孔道士人恒提倡義舉以濟行人其最著名者由十字路至尖山寺曰兩河口渡由尖山寺至清水塘曰南河渡由龍潭壩至忠塘曰芭蕉溪渡由丁寨至唐崖曰唐崖渡由梅子坪至彭家溝曰麻地壩渡由丁寨至龍洞曰大屋澗渡由縣城至老李壩曰田寨河渡由梅子坪至清水塘曰大河邊渡由清水塘至

咸豐縣志

卷二

津梁

三

二台坪曰楠木溪渡由青崗嶺至石人坪曰龍潭司渡由土地壩至尖山寺曰手扒巖渡由梅子坪至生地壩曰螺蛳灘渡由青崗嶺至羅家壩曰忠寨壩渡由藍田灣至燕子峯曰朝陽寺渡橋之最大者曰觀音橋在縣城西門外曰大壩大石橋曰太平溝石橋均在縣城西門外五里大田壩橋在縣城南門外三里曰教場壩橋在南門外二里曰南門外涼橋在教場壩西頭曰楊泗壩涼橋在城東五里曰起鳳橋在城東十里曰茶園溝橋在城東十五里此皆永豐里屬地也曰野貓河橋在城西二十五里曰林麓口橋曰丁寨場橋均在城西三十里曰十字路橋在城西南二十五里曰土老坪橋在城西南四十里此皆樂鄉里屬地也曰桐車壩涼

橋在城西六十里曰蝦蟆池涼橋曰大板橋在城西七十里則平陽里屬地又仁孝里有武家田橋禮忠里有大水坪橋麻溪溝橋義梯里有毛壩河橋有甘里壩橋帮里有土溪河橋此特舉其當孔道而費工鉅者其他小溪曲徑阻水架梁之處不勝枚舉因其地僻費省不悉載

### 鋪遞

行政最重交通機關無古今一也矧屬在山邑而於行李之往來文書之傳達不有以疏通保護之不幾憂壅蔽而誚痿痺不仁乎溯自郵政未興交通弗便官斯土者每汲汲於鋪遞之建設雖屢經世變徒法難行而舊制仍莫敢廢據舊府縣志載咸邑縣城設

咸豐縣志

卷二 鋪遞

三

總鋪鋪司四名自總鋪東行十五里至猴子嶺鋪鋪司二名自猴子嶺東行十五里至邢家寨鋪鋪司二名自邢家寨東行二十五里至白菓壩鋪鋪司二名自此東行二十里達宣恩縣之黃草壩鋪此為由咸至宣恩之要道也又自總鋪西行二十里為十字路鋪鋪司二名自十字路西南行二十五里為土老坪鋪鋪司二名自此南行四十里達來鳳縣之革勒車鋪此為由咸至來鳳卯崗之要道也又由總鋪西行五十里至水車坪鋪鋪司二名自水車坪西行二十里至張家坪鋪鋪司二名自此西行四十里達四川黔江縣之沙子場此為由咸至酉陽州之要道也又由總鋪北行三十里至梅子坪鋪鋪司二名自梅子坪西北行二十里至唐崖

鋪鋪司二名自唐崖鋪北行三十里至七里塘鋪鋪司二名自此  
北行三十里達恩施縣之下營壩鋪此為由咸至恩施西境之故  
道也又由總鋪西北行八十里為馬家池鋪鋪司二名自馬家池  
行三十里至兩河口鋪鋪司二名自兩河口行三十里至毛壩鋪  
鋪司二名自毛壩鋪西北行四十里至活龍坪鋪鋪司二名自此  
北行四十里達利川縣之沙溪司鋪此為由咸至利川西境之故  
道也以上共十五鋪額設鋪司三十四名皆係徭編前清咸豐二  
年奉文裁汰改派差遞旋於同治八年照舊復設自近年郵電各  
局碁布星羅每遇警急通報最靈而鋪遞遺法遂無復有人道及  
云

禮教志

典禮

典禮最重祭祀祀典之舉行尤以仲春仲秋為要舊志載文廟祭器先師位前用太牢牛一羊一豕一白磁爵三木釗三木登一木簋三木篋三竹籩十木豆十磁酒罇一鑪一鐙一四配位前少牢各羊一豕一白磁爵各三木釗木簋木篋竹籩木豆每位前各二磁酒罇一鐙二鑪一十二哲位前少牢東西各羊一豕一東六案西六案共用白磁爵十二木簋木篋木釗各十二木豆竹籩各四十八磁酒罇一先賢位前少牢羊二豕二先儒案前少牢羊一豕

咸豐縣志

卷三

禮教志 典禮

三四

一銅爵各一共一百二十二件木簋各一共十二件木篋各四共六十件磁酒罇一崇聖祠陳列五案每案少牢各羊一豕一白磁爵各三共十五件木釗木簋木篋各二皆共十件竹籩木豆各八皆共四十四件磁酒罇一配位設四案每案銅爵各三木簋木篋各一竹籩木豆各四磁酒罇一其致祭時迎神奏昭平之章詞曰大哉孔子先覺先知與天地參萬世之師祥徵麟紱韻答金絲日月既揭乾坤清夷初獻奏宣平之章有羽籥之舞三獻同詞曰予懷明德玉振金聲生民未有展也大成俎豆千古春秋上丁清酒既載其香始升亞獻奏秩平之章詞曰式禮莫愆升堂再獻響協靈鏞誠孚壘齋肅肅雍雍譽髦斯彥禮陶樂淑相觀而善終獻奏叙

平之章詞曰自古在昔先民有作皮弁祭菜於論思樂惟天牖民惟聖時若彛倫攸叙至今木鐸撤饌奏懿平之章詞曰先師有言祭則受福四海覺官疇敢不肅禮成告徹毋疏毋瀆樂所自生中原有菽送神奏德平之章詞曰鳧繹莪莪洙泗洋洋景行行止流澤無疆聿昭祀事祀事孔明化我烝民育我膠庠又文廟正殿祝文曰惟某年月日某官某姓名致祭於至聖先師孔子之神曰惟先師德隆于聖道冠百王揭日月以常行自生民所未有屬文教昌明之會正禮樂和節之時辟靡鐘鼓咸恪薦於馨香泮水膠庠益致嚴於遵豆茲當仲秋祇率彝章肅展微忱聿將祀典以復聖顏子宗聖曾子述聖子思子亞聖孟子配尚饗崇聖祠文曰惟某

咸豐縣志

卷三

禮教志 典禮

三

年月日某官某姓名致祭於肇聖王裕聖王昌聖王啟聖王之神曰惟王奕葉鍾祥先開聖緒盛德之後積久彌昌凡聲教所覃敷率循源而溯本宜肅明禋之典用伸守土之忱茲屆仲秋聿修祀事配以先賢顏氏先賢曾氏先賢孔氏先賢孟氏光緒二十三年鄂臬梁鼎芬奏准升孔子為大祀如祭天地太廟典禮通飭各縣一律遵行又舊制同月祭武廟文昌宮均用太牢祭社稷壇用少牢又先後祭先農風雲雷雨本境山川城隍龍王等神官紳齊集皆極誠敬五月再祀關帝城隍兩廟士民更醵金為城隍神壽宮祀豐隆倍極懽洽此皆治城官民通行之典禮也他若文昌宮有士民會期武關廟有兵弁會期萬壽宮禹王宮三閭宮離



震宮皆有會期或以籍貫或以布施公同致祭亦極虔誠舊志又載宣講迎春厲壇救日月食霜降等典禮儀注各州縣通用之不贅錄卿飲酒禮咸邑行者蓋寡然邑乘登之意古時必常有行之者惜世遠未能一一實指其人惟楊氏家譜載邑令秦飛鵬舉楊公勝忠充鄉飲大賓辭不就光緒十一年邑令劉壽椿因道憲札催曾舉徐公正旭充鄉飲大賓列傳上聞

### 壇廟

文廟在縣治東南隅學署左文昌宮在文廟右老關廟在縣署左城隍廟右新關廟在城隍廟左社稷壇在東嶽宮左側先農壇在南門外山川壇常雲壇厲壇俱在縣署南城隍廟在南門內火神咸豐縣志

### 卷三 禮教志 壇廟 宗教

三

廟在新關廟內馬王廟在新關廟內龍王廟在南門外秦牘祠在縣署大堂左側秦鄂祠在縣署大堂右側以上各處皆於歲時祀典有關除文昌宮城隍廟分由官紳會同管理外餘皆設立自官而由文武公署主其權者也

### 宗教

中國士民所信仰向有儒釋道三教之說儒教名曰尊孔其實孔子之道大甲至正包羅萬有外人稱為大政治家大教育家大哲學家凡所刪訂著述非若宗教家言炫異矜奇以期衆人之迷信也邑之崇儒教者不過於喪祭齋醮等事推行文公家禮而本神道設教之意混合而施行之此風傳自川黔邊境邑人近五十年

頗盛行之其次曰釋教信行之者殆與內地不相上下是以縣境佛寺僧寮不下數十處其建設最久者有數百年前古剎碑碣可考又次曰道教其信徒大半依託老子縣中道觀雖不逮佛寺之廣合計亦有十餘處二氏門徒又有男女之別各主其地不相牽混要皆以出家離鸞為重五十年前全縣人民信佛教者十之七信道教者十之三近則道教日就式微佛教迷信力亦漸減殺又有儒教以掊擊之是以近數年來託鉢乞緣之法不行而僧寺道觀彼亦自知勢成弩末並其破瓦頽垣亦幾難長保矣現邑中有奉大道齋者名曰混合儒釋道三教為一家非僧非尼男女牽引不婚不嫁其中間有潔白自愛之人然風氣所趨良莠相雜實為

教化之累百年內有回教徒數戶移住境內近頗蕃息而亦不過不食犬豕等肉略與眾異基督教信者尤寡三十年前有挪威舊教教士於邑之西北一碗水附近謀立足地因從教皆二三宵小狂妄肇衅遂幡然變計去至今不復有其教中遺跡云

寺觀

寺觀皆由各地方士民公立然祀典所載之神城鄉亦多設廟崇奉而招男女僧道為住持如萬壽宮一在縣城內一在丁寨場如禹王宮一在西門外一在清水塘一在活龍坪一在大路壩一在丁寨如關廟除縣城外一在縣南五里一在忠堡一在馬河壩一在丁寨一在蝦蟆池一在石人坪一在活龍坪一在大路壩一在

龍潭司如文昌宮除縣城外一在丁寨一在馬河壩一在蝦蟆池  
一在楊崗如川主廟一在縣南五里一在縣南十里他如軒轅廟  
在新關廟後三閭宮在縣西門外興國寺在西門外奎星閣巧聖  
宮三義廟均在西門外又觀音礮雷祖廟五通廟地主官轄神廟  
亦俱在西門外又鎮江廟財神廟延真觀在縣西東嶽宮在南門  
外迴龍寺在縣西四里觀音閣在東嶽宮側觀音寺在縣西百里  
之興隆場天王廟在縣南五里墨池寺在縣西七十里虎溪寺在  
寒溪離城四十里尖山寺在縣南十二里三佛廟在縣南二十五  
里靜樂寺在大寨坪無邊寺在青崗嶺柳池寺龍洞寺在清水塘  
鐵牌寺在唐崖朝陽寺一在生基坪一在水壩張爺廟元武山大

咸豐縣志

卷三

禮教志

寺觀

寺堂皆在唐崖方廣寺帝主宮在忠堡興隆寺在新田坡側之細  
心窩把水寺在大村白雲觀板橋寺天橋山寺在丁寨晏公祠亦  
在丁寨靈珠觀在燕子岫碧山寺天橋寺在楊崗八角廟在蒲草  
塘玉泉山在大茂坡靈山寺一在茶園壩距縣治三十里一在黑  
崗距縣治百二十里道宏山在茶園溝龍泉寺在白水雲霧山寺  
在二台坪靜竹寺在馬河壩迎水寺金子殿皆在活龍坪山王廟  
在水壩以上寺觀三十年前其上者頗稱殷富次亦足備香火現  
在二氏之教式微各地民風日益刁健除僧道浪費及提歸公款  
以資挹注外其尚稱充裕者合計不及十之二餘五六成皆日就  
頹敗又二三成則破瓦坍垣殆有不終日之勢云

風俗

縣境地瘠民貧風尚古樸民俗視施南全郡略同而亦有小異者  
試略紀之春正月元旦天未曙焚香燭祀祖先擇吉行禮方舉家  
出行謂之出天行至各神廟焚香親族交相拜賀城市閉門三日  
謂之闔財門鄉間則否彼此拜賀新年並招飲春酒上九後鄉城  
有龍燈戲雜以紙製獅象麒麟鱗介諸物競出驅疫至元宵止又  
有布製獅子戲及紙糊龍船車子等戲沿門舞蹈唱歌元宵燃爆  
竹祀神謂之祀新年近塚家家送燈遠望之如繁星是夜燈火花  
爆達旦不休此後學童擇日上學商賈擇日開市農家擇日駕牛  
山居之民趕種馬鈴薯社日採蒿作炊雜以肉糜相饋送謂之社

咸豐縣志

卷三 風俗

三十九

飯新塚以白紙懸竹竿插其上謂之掛社童子往往結伴競放紙  
鳶藉以舒其氣脈清明掃墓仍掛紙竿上謂之掛清有修理祖塋  
者於前後三日內併工成之不忘方位皆吉也世族率於宗祠用  
少牢祀其先人老少燕飲盡歡是日家家皆插柳葉於門男婦皆  
簪柳葉於首農人量氣候之暖寒於此節前後播種下秧夏四月  
八日以朱紙書嫁毛蟲字粘壁間五月五日懸蒲艾於門飲雄黃  
酒以雄黃點小兒額及手足心采百草煎湯澡洗搗蒜和雄黃水  
徧灑門戶及牆陰以避蛇蟲先期各以角黍餅乾相餽遺亦有贈  
香扇者俗以是日為小端陽十五日為大端陽開始於馬伏波將  
軍十三日為關帝會舉行祭祀先一日雨謂之磨刀雨二十八日

相傳為城隍生日先期市人盛儀仗迎神以童子扮臺閣故事旌  
旗鼓吹觀者如堵六月六日俗傳是日晒衣服書畫不易霉壞蓄  
和醬水亦佳農人亦於六日攜雞酒祀田間謂之團苗秋七月七  
夕看雲色以天河去來久暫占秋收豐歉諺云天河搭尾脊家家  
有飯喫中元節前以紙錢封包或以金銀錠裝籠書祖先名諱所  
謂清明祀墳中元祀名祭於中庭男女上食如生三日焚之於外  
各廟作盂蘭會賑濟無主孤魂又以香蘸油徧熬山徑謂之路燭  
八月中秋農人喜以新糯蒸熟搗成饅頭徧食其家人士大夫家  
以月餅棗梨相餽遺有艱於子者親友子弟僱人竊鄰圃大瓜裹  
以紅綾導以鼓樂踵其門曰送瓜取生育多子之義主人具酒食

明年生子筵宴相酬往往有驗二十七日學徒釀金為孔子聖誕  
會九月九日載酒登高搗米粉為糕采茱萸為酒士人率登高以  
詩文相唱和九月十九日俗謂觀音會期婦女多結伴入廟進香  
縉紳家則不盡然立冬日俗傳宜晴又宜霜語云一斤霜卜來年  
木棉旺仲冬三一日宜晴諺云冬月三一晴穀米一般平十二月  
二十三夜祀竈神或妄言二十四日曰小年是日前後掃社字宰  
豬羊作饅頭親友相餽遺曰送年節除日閤家聚食曰團年長幼  
次第揖拜親鄰互相往來曰辭年除夕間有不辭年者惟各家必  
易門神貼春聯祭先祖五祀焚紙錢包封一如中元節間有不燒  
包者是夕新舊塚子孫必親往送燈火其上歸而祀竈曰接竈神

還家再置酒燃爐守歲至出行後乃歸就寢息

縣境山多田少一切耕作皆用牛犂大抵高原宜黃牛平地宜水牛至遠鄉絕崖危坳耕以人力平地農家恃稻田為正糧而補助以蕎麥豆豌豆高粱農家以玉蜀黍為正糧而補助以甘薯馬鈴薯全縣年歲多以高山收成定豐歉蓋民間食稻者十之三四食雜糧者十之六七故也山糧最忌七八風謂之秋風

百工多係本地居民亦有自外來者前五十年工貨不厚而匠作頗佳如木石雕刻銅鐵裁縫等器物具在可知也近則工拙且惰而傭值則較往日增高十年前丁寨有鐵工能以臆造新法製後膛槍極快利界坪有木工製木盆不用木屑糝絮能盛油經久無

咸豐縣志

卷三 風俗

四十一

絲毫浸漏後皆由遠商雇以去今不復有其人如欲提倡工藝不必抑其增長傭值但當設法考其藝之工拙課其功之勤惰

商民概係鹽布菽粟為生涯山貨如桐茶漆楮吳于藍靛凍綠皮多歸外來行商專其利近年商會萌芽收買漆楮本地商民亦不能分利者城市無茶館酒肆固緣商務不旺亦民俗簡樸之所致也

縣境巫醫並行向年信巫者較眾富貴之家稍有不豫即延醫調治不惜藥貲貧賤者自嫌力薄又多不達於理以為木根草頭奏效迂緩又有巫師詭詞煽惑以為祈禱懺悔立可延年解厄冥冥中必大有神在也近來風氣漸開道教式微業巫者日見減少醫

之為道遂為士大夫家所普通講求云

土人以油炸米花豆乾芝蔴黃豆諸物和茶葉作湯泡之名曰油茶客至則獻之以致敬旅店中亦有鬻此者行人便之外四里人間有嗜此成癖者一日不飲則神不清爽鄉俗以冬初煮高粱釀甕中次年夏灌以熱水挿竹管於甕口客至分吸之名曰啞酒龍潭安撫司田某詩曰萬顆明珠共一甕玉侯到此也低頭五龍捧著擎天柱吸盡長江水倒流即謂此也近年飲油茶者較前減少而啞酒幾至不經見云

城市婚葬祝壽諸宴會海味山珍動輒耗費不如是主人自覺減色附郭殷富亦如之有心世道者所宜交相勸勉崇節儉以為惜

咸豐縣志

卷三 風俗

四十二

福之地又近十年來沿開宴送禮之舊習每於秋冬以後藉故置酒希圖收受餽禮以牟微利而應急需不知彼來我往輸入者無幾又銷耗於酒食徵逐之中財力之困半由於斯有地方之責者最宜先事而嚴禁也

邑人平居皆大布之衣大帛之冠非遇慶賀宴會雖縉紳家鮮著紈綺而其縫製之形式大率士夫之服雅商賈之服華城市之服隨時鄉村之服近古婦女素尚貞樸無論貧富不遊春不治容鄉城皆勤女紅且競以針繡為能事惟善織者少村市皆有機坊土布多係機坊織之

縣境山多田少林莽森陰稍乾則有年雨靈則歉收雖近日人稠

聚處但收穫過半亦足接濟惟包穀不能經年屯積多銷耗於煮酒熬糖磨粉三者一遇歲凶糧食價值倍形昂貴貧民強半採蕨搗粉為食謂之發地倉蓋以蕨根歷年蔓延掘取多獲故也若頻遇荒歉蕨根無出甚至採剝草莖樹皮以為食者是在當道者先事豫防或臨時賑濟庶免流離之苦又土人生計全恃農業嘗見向年積穀之家每遇飢歲輒遭地痞訛索悍吏勒捐殊乖古昔藏富於民之意合計本境所產穀米糶歸黔江施南者十恒二三貨幣輸入亦裕民之一道是在官斯土者準王制餘一餘三之法妥為保護而已

縣境與四川西屬接壤徑僻山深囑匪不時攔入誘結本地游民咸豐縣志

卷三 風俗

四十三

賭博窩藏或於僻地掠奪人物或於村集攫取人財互相瓜分加以民國新造蜀省糜爛鄰境一帶土匪不時膺聚思逞為目前計以團練保甲制禦盜賊較之警察文明辦法於緝捕尤有把握冠禮俱遵家禮將婚前夕父母祀祖先致祝詞宴客並先期請親友子弟未婚者十人陪之謂之賀郎女家亦擇吉延有福賢婦為之筭謂之上頭請親鄰待字之女十人陪宴謂之帶花酒婚禮俱遵家禮壻至婦家親迎奠雁納采曰插香納幣曰過禮女家不取聘金男家不索厚奩迎新婦日鼓樂儀仗二大紅燈前導綵輿至女家麾輿從出以斗覆轎前女兄弟扶女出立斗上拜辭祖先撒著一束仍拾納女袖中取不家食之義新婦至門壻家陳



香燭清酒雄雞一祀女家護送神於大門外曰回煞女輿至堂門小姑執燈以篩罩體女出輿後紅衣拜伏與男子行拜堂禮別以福德兼備之婦引拜次晨廟見後拜見舅姑以次拜諸族戚曰分大小擇族中賢而有福者先拜之曰開拜後曰圓拜亦如之

喪葬多用文公家禮縉紳世族親喪必延德爵俱備者為大賓代題木主或祀於正寢或祀於宗祠居喪者不與宴會不赴綵觴三十年前盛行佛教人死率用僧道木魚鐃鼓誦經禮佛初死曰開路繼曰遠棺將葬前日戚友畢集皆縞素曰開奠富貴之家弔客愈多至有靈輓經過途人皆贈素巾曰開普奠後百日內作佛事曰應七三年內或用僧道或延士人分別誦經禮拜曰道場枉死

咸豐縣志

卷三 風俗

四十四

者別延巫教為之曰牛角道場皆化紙錢冥鏹以多為貴近來風氣漸開僧道退化士大夫家用儒教者遂佔多數

祭禮當中元除夕二節祭先祖五祀於正寢近日寄籍者多創建宗祠別於春秋仲或清明日舉行祀祖禮篤報本之思土著人家漸相師法此風既盛古道可復矣

壽誕三四十歲時無過問者五十人間有慶祝至六十後子孫視其力之厚薄通知戚友製錦稱觴歌優雜進屆誕辰戚友具衣冠詣祝前夕戚友內眷亦盛粧拜慶宴飲而歸大率可以榮其親者無弗為也



咸豐縣志卷四

財賦志

戶口

古者力役之征準諸民數漢口算晉戶調所由制也明嘉靖奏行條編法張江陵執政始力行之其會稽錄合戶口田賦為一事前清順治十三年定賦役全書分上中下三則又有水鄉山鄉二則雍正七年湖廣總督邁柱奏准丁隨糧派之法施屬山鄉地多下則故自乾隆以後徵輸之數供支給者僅十一焉雖曰入不敷出亦以邊鄙門戶所關不能不通籌而酌劑也咸豐自未設縣以來戶口之多寡頗難詳悉然考隋書以下自唐迄元其屬在本郡者

咸豐縣志

卷四

財賦志

戶口

四十五

莫不代有增加明鼎旣遷旋歸流郡志載府屬戶口原數共二萬七千七百一十八戶原額隨糧及改土案內勘出人丁並歷屆編審滋生人丁土著不成丁男女大小共十一萬七千四百三十三丁口道光十二年奉文編查保甲清理戶口共十一萬八千七百九十五戶九十年九萬二千一百二十三丁口是此九十八年內戶口增加至九倍之多洎同治初年編查民數共十八萬六百八十五戶一百零七萬八千八百三十八丁口是此三十餘年內戶口又增十之二準此以為比例則咸豐縣之戶口其歲有增加也必矣又縣志載初次編查閩縣舊管新收民數一萬八千零七十四戶編審隨糧原額由改土案內勘出人丁暨滋生人丁土著不成丁



男女大小共九萬一千三百四十五丁口雖不詳編查年分然大致在道光中年同治四年編查闔邑新收民數一萬八千三百八十四戶共計男女大小十萬一千七百六十一丁口約計三十年內雖屢遭兵燹戶口亦增加至一分有餘惟續府志載光緒六年咸豐查報戶口與同治四年無一增減然猶照舊抄錄虛應故事也至光緒三十三年奉文清查戶口開辦選舉孫令星煜以妨己權利秘不宣播捏報全縣戶口異常減少大受駁斥嗣後縣官委紳調查仍未詳確總之咸邑自同光以來四川彭黔移住之民源源不絕且土地墾闢亦有加無已試就已往增加之率為比例全縣實在丁口約在十六七萬左右也

咸豐縣志

卷四

物產 田賦

四十六

### 田賦

咸邑田賦舊府志載自設縣後陸續開墾陞科至同治初年統計縣屬八里人口田地及帶墾隨征丁銀共銀三百四十五兩六錢二分二釐又除荒蕪田地銀二兩六錢七分二釐外實徵起運充餉銀三百四十三兩三錢五分一釐隨征加一一火耗銀三十五兩七錢二分二釐二共征銀三百六十九兩七分三釐秋糧並未加耗外有正西接壤黔江縣之習土田地所征之稅每年協解黔江縣庫平銀七十兩之譜按縣屬舊糧雖較來鳳為重而歸流後田土開墾代有增加考舊制自乾隆以後從未陞科同治初且有稟報荒蕪減征者意其時必因三次兵燹田地輟轉官吏不得已

遂報短解且查現在民戶完納地丁甚多不均之處此非從實丈量田畝不足以期核實而昭公允至以本縣人民完納之稅銀無故解歸他省他縣尤為不協公理輿情當此改革更新時代是在本地官民明以斷之堅以持之毋致再蹈前此之陋習也

按本縣係由大田所改設前明二百餘年所官軍糧半由酉陽黔江按年協濟自前清初年酉黔互訟黔人遂由歸地而漸免濟所軍糧又未幾因改土歸流西境多故黔邑駐有重兵並強吾邑民協解銀兩以為報酬今值民國初建公道大伸既無野蠻政府以抑制而左右之吾民從此庶可息肩而咸黔兩邑膏齒之邦亦永消猜忌而益敦和好矣

咸豐縣志

卷四 物產

四十七

物產

郡志載明史巡撫劉懋條議言施州延表頗廣物產最饒唐宋地理志所載施屬貢品按之現今土產又不盡同試就現時經見之產臚列於左

穀屬俱有種田者以水稻為正糧稻穀有各種其通行者一曰杭土人呼為黏穀曰白腳黏曰大小貴陽黏種者最多曰麻黏曰百早黏熟較早而子粒稀少曰馬尾黏最遲收而實較壯又有托黏青黏沙黏等皆可相土宜種之白腳黏熟期得中殼薄多米種者尤多一曰秫土人呼為糯穀有寸殼糯矮子糯之別寸殼糯顆粒長收數較遜種矮子糯者頗多又有哆口糯半邊黏種者較少色

穀本草名玉蜀黍高下皆宜惟平原所產房實較大山坡所產房實皆小至收成之關係則包穀常佔十之六稻穀祇佔十之四麥亦有數種通行者以紅麥三月黃為最多紅麥即麵麥每年皆宜惟熟稍遲有碍正糧不便多種三月黃荒年最宜可療飢並可釀酒然不宜多種以其味淡而值賤也菽豆種田畔及包穀土中向年出產頗豐近因農政不修出產較少梁黍亦有出產以不逮包穀之多收穫者無幾豌豆處處皆有惟種者無多僅供蔬菜之用薯有數種紅薯味甚甘山地多種之清明下種芒種後剪藤栽之霜降後收掘窖藏之可作來年數月之糧又有白薯俗呼腳板薯蓋山藥之類馬鈴薯一名洋芋亦有紅白二種正月種四五月收

貧民倚為救飢之用間有用佐蔬菜者味較淡

油菜苗可食熟時其子粒可榨出油此惟丁寨一帶盛行之近因禁種粟惟此與麥聊作抵制忠堡產藍靛草菸處處產之惟少輸出者綿麻亦可種近尚未諳培壅之法蒺藜山中最多可食掘根澄粉可以備荒然必間三五年乃可掘取

蔬屬俱有白菜蘿蔔青菜俱多胡蘿蔔味最佳勝於他處瓜屬俱有王瓜南瓜苦瓜冬瓜絲瓜最多苦瓜盛夏食之最有益絞瓜筍瓜味亦佳洋合一名襄荷其根葉似薑其味略似薑頭芋頭有水旱二種根與莖皆可食旱芋山地可種水芋水田種之士人以之作蔬磨芋一名筠蕒可磨作漿凝如豆腐土人呼為磨芋豆腐作

時須不語語卽不成村婦俗傳固如是又有藕薑葱蒜韭豇豆筋豆花椒黃花香菌胡麻等產地蠶一名地牯牛鹽漬之可作蔬又有水田所產之高筍葉似蒼蒲莖可作蔬筍屬春有南竹荆竹水竹等筍秋有慈竹筍皆可作蔬南竹冬生者為冬筍其味最美

菓屬俱有桃李栗梨棗杏花紅最多胡桃楊崗梨最稱佳品

木屬以松杉椿柏檜樟椴桐梓榆楊柳為最易培植楠木有二種曰花楠曰香楠其脈理多現山水花草等紋土人呼為影木又曰瘿木以枝柯拳曲處尤多花紋也用作桌几屏風拜匣等具最可玩陰沈木須掘土得之土人云其木為棺入土則日重千年後陷

咸豐縣志

卷四 物產

四十九

入土可數十丈構木性堅直可以扛輿

有用植物如茶漆桑桐子梧子棗子吳萸子凍綠皮皆為本地天然出產茶樹有二種其種自園圃者採其葉可作茗有雨前茶火前茶之名皆稱佳品其種自山林者冬季摘實可榨出油味較菜油罌粟油尤香美漆梔現為土產大宗餘尚未甚發達

竹屬有十二種曰荆竹斑竹南竹水竹慈竹苦竹紫竹鳳尾竹茨竹冷竹羅漢竹化竹前六種皆家常應用品荆竹斑竹南竹用處尤多

花之蕃生數百種蘭桂菊蓮紫荆牡丹尤為常見之品菊花有酷愛之培至百餘種者植物之多此可概見

藥屬如木瓜大黃桑寄生黨參山茨苦參黃連五加皮何首烏厚  
樸黃精半夏夏枯草金銀花牛膝麝香桑椹麥門冬薏苡仁吳萸  
荆芥杜仲土茯苓蜂露房薄荷天麻白芨骨碎補夜明砂防風白  
合望月砂車前子歲蕤紫蘇香附子獨活硃砂青蒿天花粉地骨  
皮木通皂莢覆盆子木別子通草紫草南星益母草土龍骨枸杞  
遠志金英子白菊花大棗天精土茴香白蘇皮川烏常山葛花沙  
參川練子歲靈仙香茹前胡紅胡穀精草大茴香枳殼葛根枳實  
赤芍藥兔絲子桃仁杏仁李仁棗仁千里光天門冬松節蘇子蒙  
花石蒼蒲蒼耳子槐角鉤藤旱連草白茅根神曲麥芽續斷天泡  
子側柏葉青皮水銀茜草瓜萐仁柏子仁竹油艾皆藥室應用之

品其他草本木本以及園圃箐林隨地掇拾多成妙劑又舊府志  
石合草其苗繞樹作藤能治瘡腫金稜草有葉無花可療筋骨疼  
龍牙草株高二尺春夏採之治赤白痢金星草治發背皆本地特  
產蜂蜜出產亦多最妙合藥然惟山居農家畜之故輸出者絕少  
禽之孳育亦數百種除家畜雞鴨鵝外鳧鵠鷓鴣味至美人或  
用以作饅雉錦雞毛羽皆有用鳥類有大者漁人豢以捕魚竹雞鳴  
則呼泥滑滑居竹林多斑文據土人云畜之可制白蟻鳴三十六  
聲者佳又鴉鳴鵲噪農人每以占吉凶鸚鵡八哥圓其舌可教為  
簡單語言吐壽雞土鶯歌畫眉等有籠以出售遠方者今惟畫眉  
八哥玩者尤多其餘簷際麻雀以及山間啾嘈無用小鳥種類尤

繁

獸屬馬牛羊犬豕駱最多牛有二種水牛大宜水田值稍貴黃牛小宜高原稍賤近因其皮行銷工廠其大者價幾與水牛埒駱騾父馬母其種多傳自外來者野獸如虎豹豺狐狸獼猴獾麇山羊獺白面狸野豬茨豬兔貂鼠馬彪等鹿白面狸味最美土人號為山珍十年前西南山中虎患特甚豺狗之患不時發見本年近城一帶傷人頗多

鱗屬有鯉鱔鰕鮒細鱗把崖白甲娃娃等魚鯉與細鱗最多味亦最美以石河產較泥河產尤清芬也

介屬以驚蚌螺螄為多餘不常見

咸豐縣志

卷四 物產

五十一

土貨有白齒草紙皮紙本炭牛毛毯等然皆家常應用非輸出品之大宗

礦產惟石灰煤炭任人開採不加限制石灰各地皆有煤炭平陽里最多樂鄉里次之舊志載乾隆五十年總督特成額巡撫吳坦以湖北各營及銀匠鋪需用銷觔向係購自河南湖南兩省特就長楊來鳳咸豐三縣奏明開採嗣後又額定府屬六縣歲辦硝各二千觔以正月起限定四個月內解繳省局掣批資府核驗逾限短少承辦縣官議處咸豐額辦硝二千觔領工料腳價銀一百零二兩後又奉派辦砲硝一百四十八觔二兩二錢領工料腳價銀七兩六錢三分仍於原開之黑崗山羊崗兩處創挖其實本縣石



尚處處均產硝近年採辦者多產額亦漸減少老屋深邃者地板下亦產硝但不甚佳鐵鑛近百年來採辦者多製成鋼鐵除本縣自用外輸出鄰縣者亦復不少銅鑛惟銅廠溝袁家溝羊蹄蓋張家坪等處曾經發洩據土人云苗皆最旺小界坪出水銀硃砂四十年前有人開辦惜未暢旺龍潭司梅子坪陰家溝出大理文石可作屏硯圖章雞公嶺碗廠銷路亦廣食鹽現無出產然樂鄉里之鹹井溝鹽井均永豐里之鹹池時有鹹水湧出西北邊境龍嘴河西南邊境白家河亦有鹹水出見將來或可設法開鑿煮鹽以挽回外溢之利權云

雜稅

咸豐縣志

卷四

物產

雜稅

五十二

田房稅向無定額儘收儘解然以往官吏率藉此為津潤之資約計全縣每年田房契價至多不逾五六萬緡少亦可登二三萬緡綿花牙行一名每年完納稅銀五錢鹽牙行向在清水塘布牙行向在城外西街同治初年均已繳銷鐵廠因本省例無礦稅概係土人自行開採官府給以破銼廢鐵鎔鑄鍋鑊字樣收取規費年納二百餘串近五年前因開辦學堂警察合全縣三十餘場共收斗市肉釐豬牛布鹽雜捐錢年共二千餘串漆捐曾託恩施代辦年收錢三百串黑崗茶釐無定數至多亦約二百串又額行四川彭水縣陸路鹽引三百七十二張清水塘以北至利川一帶又常有四川石鹽入境向例因萬縣鹽局年致本縣地方文武官津貼

銀一千餘兩故本縣於食鹽落地均未重抽稅釐

領款

府縣舊志載由縣按年請領之款文廟春秋祭祀銀四十兩崇聖祠春秋祭祀銀七兩名宦鄉賢春秋祭祀銀七兩文昌宮武廟春秋祭銀各三十五兩七錢四分六釐山川壇春秋祭祀銀十兩先農壇銀五兩常雩祭銀五兩霜降祭銀二兩香燭米折銀一兩五分邑厲壇祭銀十兩米折銀一兩二錢二分各官廉俸知縣俸銀四十五兩養廉銀八百兩役一百二十名共工銀六百六十兩訓導俸銀四十兩齋馬銀十八兩門斗名半工役銀十兩零八錢巡檢俸銀三十一兩五錢二分養廉銀七十五兩役二十名共工

咸豐縣志

卷四

領款

五十三

銀一百二十兩器械銀八兩典史俸銀三十一兩五錢二分養廉銀七十五兩役二十名共工銀一百二十兩器械銀八兩鄉飲銀六兩又額養孤貧八名共銀二十兩一錢六分歸奏銷案內光緒三十三年總督張之洞以邊缺瘠苦年加知縣津貼銀四千兩由省給發以資辦公按施屬瘠苦宣咸尤甚而近年津貼之款咸較多於宣干兩蓋施郡當川湘二省邊要之衝恩宣利建僅當一面惟來咸兩邑界連川湘並與黔境逼近緝捕盜犯更為繁難咸豐地面寥廓瘠苦視來鳳尤過之云

蠲卹

咸豐稅額簡少而以地瘠民貧又當川黔門戶朝廷欲紓西顧之

憂不能不格外加惠以通民隱而廣招徠舊府縣志載乾隆三年正月定施南賦額奉旨乾隆二年未完秋糧一併豁免嘉慶元年正月奉旨前此恩詔普免案內先儘乾隆六十年被水勘不成災等州縣暨施南府屬六縣作為首次於是年蠲免七月蠲免施南府屬六縣應徵各款正項及耗羨各課錢糧又奉旨恩施來鳳咸豐利川建始宣恩等縣應彙同被水等州縣共四十三州縣以嘉慶丙辰至戊午年共蠲免三次八年正月奉恩詔恩施宣恩來鳳咸豐建始等縣被賊滋擾地丁錢糧全行蠲免光緒庚寅年施屬歉荒特甚咸豐丁寨一帶益以水災奇變總督張之洞奏撥銀十餘萬兩派員赴施賑濟咸亦與焉本年鄂軍政府通飭民國初建

所有以往民欠錢糧概行豁免至去年下季錢糧已經完納者又經臨時縣議事會公決著於本年上忙應納數內減半征收以示體恤

咸豐縣志卷五

武備志

歷代兵事

吾鄉自巴國開基將軍蔓子殉義保城已露戰爭之蹟戰國而後隸屬不常至蜀漢有建平連營之舉吾彥有建平增兵之謀楚蜀門戶此惟要害惟縣境與旁鄰郡縣千餘年尚未分治所遇兵事皆詳施南府志及其他郡縣志中後周而下咸來兩縣合為縣或柔遠州郡屬除恩施建始外較為文治被逮之區元改為散毛司數十年中屢梗朝命甚至合川湘黔三省官兵協力進攻而既躡旋起迄無寧歲雖曰蝸角僻處幾於燧臂當車而亦種族之見有

咸豐縣志

卷五

武備志 歷代兵事

五十五

未盡忘於中明史洪武五年正月衛國公鄧愈為征南將軍江夏侯周德興江陰侯吳良副之分道討洞蠻夏四月愈平散毛諸崗明史列傳梅思祖夏邑人張銓定遠人洪武十四年四川水盡源通塔平散毛諸蠻長官作亂命思祖等為副將軍與江夏侯周德興帥師討平之置施州衛軍民指揮使司銓封定遠伯又明史土司傳二十三年涼國公藍玉克散毛崗禽刺惹長官覃大旺等萬餘人置大田軍民千戶所舊衛志載是役有合肥徐凱者字子安初為都指揮使從玉克散毛禽覃大旺等萬餘人又討施南司土官覃大勝等斬獲甚衆先受厚賞陞副羗將軍都督冉氏家譜載成化十一年酉陽宣慰冉雲以剿賊楊尚白崖塘等處奉旨受賞

舊衛志載嘉靖中支羅士寇黃中叛勾結施南散毛二司楚撫谷  
虛中遣將領永順五寨及本衛官軍攻剿施南散毛土司悉平磔  
黃中於市隆慶五年參政馮成監軍副使張大業討金崗叛蠻賈  
璧平之其屯兵處今名國公寨萬歷天啟崇禎以及永明偏安之  
世散毛唐崖大旺東流諸土司時有不靖雜見於邢楊梅冉張氏  
諸譜中而梅拱辰楊正麟二公武烈尤為卓著前清嘉慶元年白  
蓮教撲入來鳳知縣康又民督率紳士設卡防堵是時白蓮教屯  
旗鼓寨前兩廣總督孫士毅統兵由茶園溪進剿旋卒於軍次年  
白蓮教又自川入境經清水塘龍潭司犯宣恩咸豐十一年九月  
十三日黔蜀流寇李洪糾合粵匪數萬由黔江縣城突過線壩要

咸豐縣志

卷五

武備志 歷代兵事

五十六

隘由丁寨擾咸豐縣城十五日陷來鳳縣城至十二月二十五日  
因湖南兵勇阻截甚力反撲麂子峽施南協副將惠春宜昌鎮游  
擊興祿都司雙慶等死之王戌正月初一日石達開由湖南過永  
順里耶濟河來統衆十餘萬與來鳳大股合初二日寇咸豐黔匪  
被官軍兜剿尾石回窺十四日由利川遁入蜀境所過焚燬居民  
集場其避賊入洞者多遭燻斃南軍亦於是日收復來鳳縣城是  
役也惠春等敗於線壩死於麂子峽其失機一由宜昌鎮某如惠  
春遣援兵命將無統一由施南咸豐守土官以濟餉事畏謹敦逼  
前進所致且軍無紀律置身絕地惟咸豐鄉勇戰頗力守備魏連  
陞生員秦鍾俊皆丁寨人死尤烈癸亥七月石達開餘黨李福猷

回竄縣境至丁寨場開防堵甚嚴仍由張家坪沙子場繞道犯酉陽秀山邊境而去

### 綠營舊制

宋史屢載施州義軍勇健可用惟無一定兵額續文獻通考載明制施州衛指揮使指揮同知指揮僉事左右中千戶所千戶百戶共領兵四千六百七十九名觀此則大田一所分領兵亦必不少惟唐氏衛志謂嘉靖以後施州兵時增時撤前額又未可據為成例又宋氏府志謂明祖以土司滋擾設衛廣屯欲使官省餽運而人自為戰也其後兵不能衛民反借民以衛兵又借客兵以衛衛則見於鄒維璉之志序是有衛而無兵矣協濟餉十年不至則見

咸豐縣志

卷五

綠營舊制

五十七

於朱光祚爭復額餉之碑是有兵而無餉矣其他免頭攬納官吏侵漁而兵枵腹雜見於章志王志者又不一蓋作法雖善而日久弊生前清一革屯里之弊而全資於帑其法較善康熙四年以荆州鎮前營游擊移駐施州衛雍正十三年改協轄左右二營咸豐縣駐左營守備一員把總一員確心窩額外外委一員又唐崖司駐把總一員活龍坪駐外委一員咸豐縣城額兵一百一十七名唐崖汛額兵五十七名活龍坪汛額兵一十九名乾隆以後時有撤減至咸同年間兵額猶存十之八同治十二年施南設操防營卽就額兵一千二百餘名揀選二百名逐日操練巡防各縣近十年內裁汰綠營遇有鄰境盜匪告警全恃省派巡防軍駐紮巡衛

迄去年咸豐綠營兵弁一律裁盡施南又有新軍一營輪派梭巡  
以助防軍之不及國變後防軍一律改編陸軍而兵式上耳目為  
之一新矣

俸餉

駐咸守備一員合俸薪養廉蔬菜心紅馬匹額領銀三百三十一  
兩五錢八釐把總二員合俸薪養廉馬匹額領銀各一百四十六  
兩八錢外委一員合養廉馬戰餉米馬乾額領銀五十四兩七錢  
二分確心窩額外外委領馬戰餉米馬乾銀三十六兩七錢二分  
舊制馬兵每名額領銀三十六兩七錢二分戰兵每名額領銀二  
十四兩五錢二分守兵每名額領銀十四兩五錢二分舊縣志載

咸豐縣志

卷五

俸餉 塘汛

五十八

駐咸馬兵三十一戰兵二十七守兵一百三十七共一百九十五  
名證諸府志僅多額兵二名當綠營未議裁撤之時每年應領兵  
丁餉銀三千六百七十八兩八分合官弁俸銀七百十五兩七錢  
四分八釐每年應領帑銀四千三百九十餘兩以作防守本省門  
戶之用

塘汛

舊制咸豐縣守備把總分防十二塘每塘兵五名曰梅家山塘忠  
堡場塘梅子坪塘十字路塘土老坪塘水車坪塘張家坪塘壘王  
牌塘楊崗場塘邢家寨塘頭莊壩塘地壩寨塘唐崖汛把總分防  
一汛九塘每塘兵五名曰活龍坪汛馬家池塘梳桿均塘小水坪

塘金崗塘中界坡塘兩河口塘大壩塘七里壩塘武弁官署及汎塘地面皆有圖籍備案可查歷年以來塘兵陸續裁減武弁借名侵佔除原有地段丈尺外又多越界管領之處沿襲既久遂為營下固有產業今緣營既全裁撤則此等地方為本縣人民公有物其有待於清查管理也亟矣

### 團練

團練即因保甲之法分團分甲抽其丁壯而操練之以防內盜以禦外匪其說由來舊矣至湘人倡辦團練以張武功大江南北翕然從風吾咸自嘉道以來官司屢奉通飭辦團然故事奉行張弛隨時所便咸豐十一年線壩麈子峽之役丁寨鄉勇較施宜官軍

咸豐縣志

卷五

團練

五十九

為號能戰一本團之練丁也同治元年恩施知縣多壽擬定團練章程二十條通詳各大憲批飭各州縣悉遵行之是時咸豐團練頗為認真大指十家為牌十牌為甲十甲為團皆各有長重要地方每團又有正副團首之別兵械旗幟製備操演一稟成法故凡三經兵事土匪蠢蠢欲動率藉團練之力先事撲滅計自盧令慎徽以迄余令思訓袁令鏞魏令慶昭先後懲辦土匪之案多起可考而知也承平日久團練寢廢光緒中葉頗思整頓邑令奉省通飭團紳須由本府加札昭鄭重也惟時無外寇告警奉行官紳至有藉名苛派反滋擾累者議遂中寢近三年來警察法行而團練冊籍益共束之高閣不復一寓目矣自去年秋冬時局改革外匪



內奸窺伺竊發深識之士均謂目前治標之法仍非整頓民團不為功不禁拭目俟之

### 警察

警察之法方今文明各國通用之中國自變法以來通都大邑皆辦有警察然輿論謂惟天津漢口成都為稍有成效所費已屬不貲咸豐警察肇自光緒三十四年奉文開辦城廂警察次年並由湖北巡警道詳派警察畢業學生張光祖到縣督率辦理知縣徐培招本城游民及散役十人充學習警察宣統二年並開辦巡警教練所另招良家子弟入所學習即由省派警員更添聘本縣之諳習警務者教之以一學期畢業意在籌款陸續開辦鄉鎮警察

咸豐縣志

卷五

警察

六十

以款絀尚未即行再閱一年而革命軍遂起矣去年秋間警員警生皆同鳥獸散合計歷年開支之款雖未盡如警署所規定完全設立而費已全擲虛牝求一形式文明之影響已不可得遑問禁暴戢奸吁豈獨吾咸一邑為然哉

抑予尤有疑者咸邑地鄰川省一切風俗人心殆與川東略相近前年曾歷四川督幕至宣統二年十二月蜀督奏報憲政成績全省一百四十餘屬城廂警察盡數成立鄉鎮警察亦開辦十之二三方謂新政進步甚速而治安有慶也未幾外任繁縣乃親見盜賊之充斥劫案之層出較未辦警察時增至數倍而匪犯且因停止刑訊愈覺有情無恐且日肆其劫盜之謀推究

原因羣歸咎於警察審判二者優柔養奸甚至嘖嘖謂警兵通匪教練所學生為賊徒逋逃藪卽有一二潔己奉公之警員至因不能偵緝盜匪惟斤斤因衛生忿爭小故致商民與警兵齟齬刁難輾轉成仇如所聞見聞警署毆警官者難僕指數豈警察之法不可行哉亦由民政部所頒定章程辦法及逐年豫備之功令一律開放未能通籌全局因地因時而量予變通耳何者以往部頒警察作用係按各國文明地方人民程度為之準則而當初事改革之會無論何國當不如是之程度均齊况以中國幅幘之廣人類之繁通都大邑以警察文明法行之但能實事求是自能收形式文明之效若僻壤偏陬又民俗剽悍素

號多盜不為嚴禁急捕極枯而斧斤之良懦已岌岌不可終日是豈拘留罰金之令所能一概使之革面洗心者乎現在蜀事糜爛已達極點警察一舉除重慶成都兩城外無復再有一人之迹去年十月十八日成都省城兵匪肆劫一二日內公私掃盪一洗而空商店公館稍有蓄積皆被劫無一戶遺漏聞其先期調查詳確不爽毫髮者警察為之也為今之計蜀難一日不平吾咸可暫緩辦警察以團練為止暴之本圖從速妥籌經費事急則挑練壯丁日討申儆以輔兵力之不及稍緩則治城練丁若干名選練長管領之四鄉暫團而不練或分期抽練略仿豫備後備辦法則盜匪庶可抵禦待至時局大定鄰警無聞然

後從容趨重警務以企完全文明之幸福不更秩序井然而無  
握苗助長之悔哉

咸豐縣志卷六

官師志

文職表

縣境自後周置縣宋置州元置府命官分職志乘闕如然猶併來境以為治至洪武分司設所以駐防兼司民事二百年內遂有專官舊志載明大田所百戶共十一人曰梅昇楊成鄭瑜丁德楊再荆田世忠丁穆貴張觀音蔣春徐凱徐文魁不辨時代以今考之惟鄭瑜丁德張觀音蔣春梅昇係明初大田千戶楊成為楊公保之父非大田千戶楊再荆丁穆貴徐文魁乃襲大田千戶者徐凱乃洪武時衛指揮以功陞都督至襲大田百戶為徐楷之謫而

咸豐縣志

卷六

官師志

文職表

六十三

漏未收入者有石山冉霏冉舜卿皆大田千戶載在明史冉應義冉應禮冉應信楊公保徐騰達梅世相舒成祖田茂壁張仕元蔣天佑許成祖邢源皆明初先後任大田千戶子孫世襲載在各家譜牒其掌印千戶兼理民刑案牘略如文職令尉之類惟所志自童氏稿本燬於兵燹張志又紀載脫畧除十一人外前清僅載王公鈕正己二人凌亂殘闕未便列表故此志斷自乾隆元年設縣後為始而以文職武職分列焉

知縣

通判 駐唐崖

訓導

巡檢 駐張坪

典史

以下  
慕泰生

陝西三原進士

王

浙江山陰

朱

山西

孟詩讚

順天宛平元年任

元年

監生

平進元  
年任

趙棠

順天大興九年任

戈居邦 江西南昌 舉人 岑映奎 廣西陵 雲生員

孫建權 浙江海鹽 舉人 楊琨 湖南新 化進士

張禹 山西孝義 舉人 王夢齡 浙江桐 鄉貢生

陳世瑛 山西平定 舉人 劉超 直隸通 州歲貢

雷澤源 廣西新安 舉人 趙嵩 興山 舉人

史琮 山西太平 進士 鄭廷基 順天 大興

沈永潤 浙江 嘉興 舉人

史 琮 山西太平 進士 趙嵩 興山 舉人

鄭廷基 順天 大興 舉人

高元佑 陝西韓 城人 舉人

陳家猷 順天大 興人 舉人

潘憲武 貴州貴 築進士

張玉 湖南安 鄉人 舉人

魏文炳 黃岡 舉人

晏廷權 湖南巴 陵人 舉人

趙廷璋 浙江東 陽進士

劉光藜 大石 舉人

王士升 直隸昌 黎進士

史易 奉天進 士 舉人

卜維吉 直隸天 津舉人

胡烜 孝感 舉人

咸豐縣志 卷六 官師志 六十四

史易 奉天進士 四十七年任	王士升 直隸昌黎進士 四十二年任	趙廷璋 浙江東陽進士 四十二年任	張玉 湖南安鄉人 四十年任	潘憲武 貴州貴築進士 三十八年任	史琮 山西太平進士 三十八年任	雷澤源 廣西新安舉人 三十八年任	陳世瑛 山西平定舉人 三十八年任	張禹 山西孝義舉人 三十八年任	孫建權 浙江海鹽舉人 三十八年任	戈居邦 江西南昌舉人 三十八年任
卜維吉 直隸天津舉人 四十六年任	劉光藜 大石舉人 四十六年任	晏廷權 湖南巴陵人 四十六年任	魏文炳 黃岡舉人 三十九年任	高元佑 陝西韓城人 三十五年任	鄭廷基 順天大興舉人 三十二年任	沈永潤 浙江嘉興舉人 三十二年任	趙嵩 興山舉人 三十二年任	王夢齡 浙江桐鄉貢生 三十二年任	楊琨 湖南新化進士 三十二年任	岑映奎 廣西陵雲生員 三十二年任
			陳家猷 順天大興人 四十年任					夏煌 石首舉人 二十七年任	姚銘 貴州修文 十二年任	
								俞南溟 福建寧化 十八年任	諸兆雲 浙江山陰 十六年任	
								傅廷理 廣東滄源 十九年任		
								閻錦 漢軍鑲黃旗 二十八年任		

九年任

張曾赦 安徽桐城舉人

四十九年任

梁修翔 廣東高要人

五十六年任

楊馥孫 浙江平湖舉人

十四年任

五十八年任

康又民 江西龍泉拔貢

朱炘 江西南昌舉人

汪有燕

元年任

黃家燧 福建閩縣舉人

秦飛鵬 陝西邵陽舉人

陳初 福建新化監生

高慶泰 隨州舉人

牛中開 山東章邱舉人

十年任

咸豐縣志

卷六 官師志

文職表

六十五

十二年任

秦錫疇 江蘇金匱舉人

佛寧阿 滿洲益州監生

龍從文 竹溪感貢

何漢光 廣東長樂人

鍾邦蓮 浙江山陰人

十四年任

祥福 滿洲紅旗生員

四柱 滿洲白旗監生

何昌猷 江夏舉人

葉書 廣東歸善人

黃楷

十八年任

八年任

十九年任

兀尊德 陝西監田進士

二十一年任

吳觀樂 福建閩縣舉人

計連 浙江錢塘監生

魯元 黃陂舉人

石炳奇 順天大興人

唐方耀 湖南寶慶別榜

黃道 湖南沅陵監生

二十三任

十四年任

沈國雁 浙江會稽人

阮秉衡 順天大興人

文 以下道光 藝 京旂進士二年

夏文蔚 雲南昆明進士

十二年任

林寅

三年任

李士高 浙江山陰吏員

三年任

趙鵬翔 直隸臨城進士

六年任

繆廷滢 江蘇江陰監生

咸豐縣志 卷六

官師志 文職表

六十六

朱霽 滿州舉人

賀青蓮 滿州人

楊承鏞 浙江定海人

李芳 直隸鹽山人

陸恩紱 浙江蕭山監生

九年任

二年任

十二年任是年九月奉部文裁撤唐

楊明善 順天宛平人

進士十年任

李錫吉

徐炳然

劉士杰 順天宛平人

五年任

孫培基 山東福山人

萬啟奎 江西南昌監生

段旭 江西南昌人

舉人 錢喬雲 江蘇長洲

書人

舉人 鄭長齡 直隸豐潤

舉人

袁昌暉

彭仲芳 廣東舉人

吏員 王久益 甘肅武威

員吏

倪明達 廣東潮陽

宋映長 浙江錢塘人

夏獻寅 江西監生

李如璠 廣東香山監生

黃元泰

咸豐縣志 卷六

官師志

文職表

六十七

附生 吳慶元

貢生元 年任

熊啟愚 松滋

錢悌 浙江上虞人

平震

舉人 張丙暉 河南偃師

貢生元 年任

李泰齊 鍾祥

毛學詩

舉人 繼輔 滿洲黃旗

舉人

應鑿階 福建延平

舉人 單復梓 山東黃縣

九年任

楊必昌 南昌貢生

程兆梧 浙江紹興人



盧慎徽 汀州福建

舉人八年任

程桂珊 天門

十一年粵匪擄去

陳浚川 四川人 十一年任

以下同治

馮端禮 河南

元年署

高維嶽 江夏貢生

元年署

俞利彬 安徽歙縣人 元年任

陳維模 浙江紹興

元年任

鮑含章 麻城副榜

元年任

高正鑫

彭紹鼎 江蘇溧陽人 三年任

張梓 陝西宜城

附貢二年任

三年任

袁鏞 江西人 七年任

七年任

張鵬翰 陝西長安人 五年任

胡斌 舉人 五年任

何紹輔 四川定遠監生 七年任

咸豐縣志 卷六 官師志

文職表

六十八

余思訓 湖南長沙

解元九年任

八年任

傅作霖 四川巴縣

生員十二年任

以下光緒

陳富文 廣東鎮平

優貢二年代

向崇基 四川成都

舉人二年任

邱蓮峰

五年任

鄒 嶧 泗州

進士五年任

魏慶昭 涪州

監生七年任

汪曾唯 浙江錢塘

雲騎尉附貢八年任

王金城 湖南郴州

九年任

劉壽椿 湖南龍陽

附貢九年任

咸豐縣志

卷六 官紳志

文職表

六十九

劉正德 湖南茶陵

監生十一年任

段承霖 雲南呈貢

進士十二年代

李九江 甘肅秋道

進士十二年任

呂福恒 山東濟寧

附貢十三年任

余良才 四川萬縣

監生十六年任

楊承先 棗陽

附貢七年任

王懋功 湖南

舉人八年任

李承東

八年任

張述傳

八年任

張述傳 十年任

汪國椿 河南

廩貢十三年兼署

崔炳

十三年任

劉承緒 直隸人 十三年任

黎海潮 通城

舉人十四年任

江廷璋 四川監源人 十四年任

廖恩樹 湖南長沙人十六

年代

王賜恩

二十四年任

董慶昌 山東德州

監生二十六年任

吳應丙 江蘇揚州

夜貢二十年任

趙曾蕃 安徽太湖

附貢二十年任

咸豐縣志

卷六官師志 文職表

七十

周壽昌 江蘇監生

二十一年任

秦毓麒 江蘇嘉定

舉人三十一年任

孫星煜 山東蓬萊

進士三十三年任

宣統 徐培 廣西臨桂

進士元年任

黃錫麟 湖南武陵

人三年代

劉煥奎 貴州人

二十年任

楊楷 廣西蒼梧

二十五年年任

舒鎮觀 廣東附貢

二十五年任

胡長治 四川長壽人

八年任

何增榮 四川人

任

祝慈望 湖南人

十八年年任

袁逢丙 附貢

二十二年任

祝慈望 二十三年任

祝慈望

張鳴鳳 四川西昌

袁逢丙 三十四年

舉人二年任

右列各官均以實缺及署事者為限其中間有代理較久或在任內經手事件於本地重要公務及特別見聞有關者亦併錄入以供將來考證之資至近二十年來司訓以下各官匪惟贅疣直同駟僧故凡在職未久由道府札委者概從略焉

武職表

縣境自大田設所以來官斯土者大率命以武職考有明舊制惟掌印軍民守禦千戶所得兼理民事略如令尉之職其他漢土千

咸豐縣志

卷六

官師志

文職表

七十一

百戶僅管屯墾守衛諸務亦如今千把外委之屬又所地原有施州營把總一員惟代遠姓氏無稽今亦斷自設縣後置守備把總等官為限

右營守備 城守把總 唐崖把總

以下嘉慶

盧得新 穀城人

趙

甲

施

龔宏基 鶴峰人

以下乾隆

王文進 元年任

龔學序 湖南溆浦人

人六 年任

趙宏榜 湖南零陵人

人十 年任

楊炎 陝西寧湖

熊景泰

黃成文 東湖人

譚永祿

陳大福 宜都人

元年任

張永清 穀城人

向光龍

史可富 恩施人

五年任

從大智 湖南芷江人

李光盛 恩施人

朱允明 枝江人

十七年任

人十三  
年任

王貴陝西長安人 吳開泰嶺南

袁天倫恩施人 以下道光

十八  
年任

王桐鄖陽人 姜忠懷東湖

楊應忠恩施

四十一  
年任

蕭應得東湖 李安國江西

劉鳳興山人

四年  
年任

馬貴東湖

王廷芳恩施

四十六  
年任

張俊杰江夏 漆鵬陞江西

六年  
年任

羅永貴東湖 鄧士科恩施 袁開炳恩施

四十八  
年任

田業昌湖南 朱槐興山人

十二年  
年任

朱代富東湖 田宗炳鶴

五十二  
年任

陳安信湖南 滕美貴恩施

盧萬忠江夏 周忠福宜昌

咸豐縣志 卷六 官師志 文職表

七十二

五十五  
年任

張正隆江夏 唐武釗宜

十九  
年任

潘占魁恩施 可觀富

七年  
任

周忠福 丁啟祥恩施

許大濱 陳大福宜都

李友富隨州

以下  
同治

向占魁江夏

鄧先明恩施

元年  
署

閻作勝四川

周登庸江夏 洪登庸鶴 馬

元年  
任

何紹凌湖南

關發旺宜昌

人七  
年任

雷洪亮施恩 闕發旺

瞿明哲本縣以下 劉藻芬江蘇

李大俊施恩

右列各官乾嘉以來防衛盜匪尚資得力故雖趙桓之士馬首所向畏敬者多咸同而下迄於裁撤綠營此等武弁直虛糜俸餉而已

官師列傳

鈕正己江南吳縣人康熙季年任大田掌印千戶時土司豪強侵佔客民田地甚多歷任長官率多優容顧忌公至開誠布公廉明素著土司畏服五十四年取歷年漢土互控田土不清之案百餘起判令或退或贖一律斷結詳銷俾各帖然相安並於城西興國

咸豐縣志

卷六 官師列傳

七十三

寺銘鐘紀案以杜翻異後遷桑植守備以熟悉苗情特疏改恩施知縣涖任亦著賢聲政績詳施南府志

潘憲武貴州貴筑進士乾隆三十八年涖任在咸四年清慎簡易不務煩苛居官多載依然儒素爾公解組竟乏歸貲真廉吏也

張曾救安徽桐城舉人在咸四年創建學宮懸賞捕鴟其為治清簡廉平愛才如命嫉惡如仇署中書懷云緇袍布襪已多年萬戶安危繫一肩吏肯讀書方不俗官能愛士始稱賢療飢豈可吞烏啄止渴何容飲盜泉我亦焚香無敢告惟臨赤子莫瞞天自出京華面撲塵下車纔得息勞薪山深恰稱瀟疏性俗厚猶含太古春肯為宦情成濁吏常愁教養外窮民只莫愛錢兼莫懶不然那不

負皇仁後署來鳳知縣重修書院培植人才政績均詳舊府志  
楊馥孫浙江平湖人性至孝為政恩威並用不避權貴故事府書  
協兵因公下縣恃符惡索為害閭閻公執法杖之上下為之斂跡  
康人氏江西太和拔貢由恩施縣丞署咸豐知縣嘉慶元年白蓮  
教擾來鳳督率紳士設卡防禦咸邑賴以安堵後以政績卓異陞  
興國州牧

黃家燧福建閩縣舉人躬履清和勤於課士題署中楹聯曰士農  
工商爾宜各安本分是非曲直我總不昧良心今存

吳觀樂福建閩縣舉人在任三載清廉有守勤於課士書院題有  
敬業樂羣匾額題署內楹聯曰眼前皆赤子頭上有青天今去公

咸豐縣志

卷六

官師列傳

七十四

在任時已百年而其循聲猶在士林口碑云

李士高浙江山陰吏員節儉慈明愛民如子至鋤奸禁暴則絕不  
姑息士民仰之如父母馬又曾宰宣恩去後立位生祀之

楊明善順天宛平進士在任年餘聽斷明決吏畏民愛後歷任天  
門蘄州等處屢著賢聲咸豐三年在鄂殉節士民間而哀之

彭仲芳廣東舉人在任五年捐廉創設賓興士赴鄉闈者資斧有  
賴後任羅田令殉難以上見舊府志

袁 鏞江西人在任年餘安良除暴任事勤能去後三十餘年上  
官以熟悉情形仍委署任甫視事盜匪棍徒聞風斂跡未幾卒於  
任所

劉壽椿湖南龍陽附貢在任二年慈惠素著操守亦廉

趙曾蕃安徽太湖附貢在任二年聽斷精明賢能懋著尤能率屬以廉杜絕苞苴

胡 烜孝感舉人司鐸咸邑十餘年敦品勵學振興文教廣授生徒成就多人

魯 元黃陂舉人訓導咸邑九年品學兼優多所造就

賀青蓮蒲圻舉人任訓導十七年品端學優課士不倦造就多人至今稱道弗衰後陞漢陽府學教授 以上三人均見舊府志

楊承先棗陽附貢禮賢友士崇尚風節時縣令貪橫頗思陵轍士類賴公保全甚多在任二年卒士林醵金助其子扶柩歸里

咸豐縣志

卷六

官師列傳

七十五

黎海潮通城舉人品端學粹其訓迪士類尤先德行後文藝故事廉饒及書斗應領銀兩教官全行吞蝕公至掃除積弊無絲毫苟雖同僚議其孤介干譽弗恤也其他處事接物清高和厚實為近數十年教官所罕見

補遺

沈慶明景泰中湖廣按察司僉事巡行至施倡建學宮又因公至大田駐節日久城西興國寺題詠甚多

童和字明甫別號客星明正德時本衛世襲指揮僉事博學有文武才初平獠向能蜀馭藍二賊又從征石阡方四及廣西斷藤峽等處俱有功歷靖州參將遷淮安總兵著有施州衛大田所二志



周正考樊川詩俱燬於兵燹因公駐成時甚久城西興國寺題詠頗多歿祀施郡鄉賢以上見舊府志

余麟牛口驛丞明萬歷元年湘王浚荊州委麟臨所丈征開墾田土編戶條糧見其深溝陡菁崖多土少民不堪命勉強丈征編銀二百五十四兩五錢將本所前項銀兩改為湘府祿米見舊縣志以上三人非守土官惟按臨日久功德在民特附錄焉

咸豐縣志卷七

選舉志

貢舉表 孝廉方正武舉附

據府志載未分縣以前如都亭里及南巖常平等鄉皆介於利咸  
宣來之間其時科舉人才頗為不少然舊志叙分縣緣起於來咸  
稱土流翻治於利宣稱土司舊疆又郡司馬商寶意大史詩曰椎  
髻雕題巖若何利宣餘習未消磨觀此則未設縣以前文明咸來  
二邑較為優勝人物亦必二邑為多又童氏修志大田所與施州  
衛並重尤見此邦文獻具在非其他草昧初開者比惟既採入全  
府志中未便於代遠年深之餘專掠此美即有按之邑人家譜墓  
碣可以證明少數者又恐終多里漏之憾今姑從闕筆即斷自歸  
流後為始而嘉道以上遺漏仍不免焉

咸豐縣志

卷七 選舉志 貢舉表

七十七

感貢

恩貢

拔貢

鄉榜中式

孝廉方正武舉

以下 雍正 徐世德

楊光宣 新化縣訓

張其廉

導

王龍

倪富遠

以下 乾隆 胡世柏

蔣世載

譚鑿 四川江北

蔣琇

楊勝忠 陝西德城

廳同知

蔣珂

縣知

蔣世凱 孫維鑄

張文興 劉宗貴 劉介雲

張其寶 縣教諭

梅如楷

文運開 議叙州吏

日

祝嵩陵 張正榮

以下 冉廣耀 鄭永烈 校諭

蔣世槐 漢陽府學 耿邦桂 李景隆

訓導 郭如昂

咸豐縣志 卷七 選舉志 貢舉表

唐峰

蕭德昭

馮世玘 涿州吏目

汪本一 馮世瑤

張思誠 蘄州訓導 楊秀浩

李兆慶

以下 楊秀棟 穀城縣訓導 楊秀煜 候選教諭

導 嚴道鍾

文士才 黃容吉

文士衡 李培林 馮永旭 候選直隸

冉永海

文運開

熊金榜

熊彥青

七十八

游行旆

宋文藻

文有典

張光杰

國子監  
學正

丁秀錢

熊飛

楊思儼

李右春

馮建寅

咸豐縣志

卷七

選舉志

貢舉表

七十九

唐桀

馮永暹

王偉

縣知

冉裕智

覃吉祥

饒鴻漸

楊亨衢

判

以下

李文階

宋名驥

徐正旭

選教

楊思臣

余建中

蔣亨發

張國賓

朱英

楊守悰

直州判

劉建章

諭

徐正承

馮延緒

王英明

劉敬亭

賀人驥

直隸慶雲

縣知縣公青道

舉人仕至漢陽

府學教授寄籍

咸豐四十餘年

人隨學成中式

後仍回蒲圻縣

原籍

黎景安

游光培

朱鳳章

以下

劉正方

光緒

候選

訓導

候選

以下

咸豐

縣知

候選

直隸

慶雲

漢陽

寄籍

咸豐

中式

蒲圻

縣

原籍

候選

直隸

楊思愉	鄧炳麟 <small>四川候補</small>						
周鼎	<small>直州判</small>						
徐大煜	曹懋勳				徐大煜 <small>署四</small>		
袁昌緒	秦烈				<small>縣知</small>		
劉自立	秦秀彰 <small>候選直州</small>				鄧文榮 <small>署用</small>		
劉炳文	<small>判</small>				<small>縣知</small>		
徐大垓	徐大均						
尹懋崧				王承猷 <small>現任武昌</small>			劉雲翥 <small>六品頂戴</small> 秦國鏞 <small>現官參謀</small>
蔣祥鎮				<small>縣知事</small>			秦國城 <small>六品頂戴</small> 長
				覃香臣 <small>候選直州</small>			
				<small>判</small>			
				秦秀珊			
				秦國達			

咸豐縣志 卷七 選舉志 貢舉表

八十

右列貢舉人才寥寥無幾或者病之不知制藝取士乃朱明消磨士氣之陰謀滿清踵而行之吾邑百八十年來顯達者少雖緣邊遠阻人前程而亦多士志氣高尚不肯理頭鑽研詞藝之末方今實學早已發明士果有志增光上國正不必鯁鯁以科目減色為嫌也

仕籍表 武職封贈世襲附

按施州自隋唐以來人才輩出元明而後民氣樸勇以武功顯者

尤實繁有徒惟未經分縣其人既登諸舊府志即難確定為何屬人嘗就土著各大姓家譜詳悉搜錄凡府縣志所登載遺漏者約十之五然時代莫辨傳聞異辭茲所收亦惟以前清仕籍中人有子孫廬墓者為限而近五十年乃加詳焉

文職

武職

封贈

廕襲

以下雍正 邢應試 議叙候補州吏目

徐嘉猷 施州衛千總

覃邦舜 襲金崗安撫改

彭朝珍 吏員試用從九品

世襲千總

駱久元 吏員試用從九品

田貴龍 襲龍潭安撫改世撫改世襲千總

襲千總

覃梓桂 襲唐崖長

咸豐縣志

卷七 仕籍表

八十一

以下乾隆 庚大魁 吏員以從九品選用

覃廷建 山東德州營參將

覃廷建 邦舜子襲千總

趙大朋 吏員以從九品選用

覃廷建 山東德州營參將

田朝舉 貴龍子襲千總

陳洪禮 吏員以從九品選用

覃光烈 梓桂子襲把總

楊光萱 恩貢新化縣訓導

田勝祖 朝舉子襲千總

馮祖顯 由州同積功議敘以同知用

覃世培 光烈子襲把總

劉介 拔貢雲夢縣教諭

田萬春 勝祖子襲千總

蔣進綬 廩生議敘六品軍功

文運開 歲貢議敘州吏目

以下嘉慶 楊勝忠 恩貢陝西褒城縣知縣

王庸 崔霸把總

官司改世襲把總

蔣世魁 附貢湖南湘陰縣丞署沅江縣

田朝齊 六品軍功

楊勝岳 增生貴州思南府經歷署桐梓

朱順臯 六品軍功

楊昌試 以子勝岳贈文林郎

楊勝岳 增生貴州思南府經歷署桐梓

劉有慶 六品軍功

趙錦文 吏員四川五統橋巡檢

姚成章 四川五統橋把總

馮祖乾 以子世玘封文林郎

馮世玘 歲貢直隸涿州吏目以功保知縣

游春 六品軍功

楊勝榘 附貢直隸赤城縣典史陞獨石

郗有松 六品軍功

梅如璉 附貢福建全州經歷

羅文治 長樂把總

楊肇椿 原名秀炳湖南水監渡巡

楊定品 六品軍功

咸豐縣志 卷七 任籍表

檢

文中和 附生六品軍功

熊大文 增生六品軍功

游葵 監生六品軍功

馮祖頤 增生六品軍功以縣丞用

鄭永烈 恩貢枝江縣教諭

蔣世槐 歲貢漢陽府學訓導

燕宗賢 南坪把總

蔣進誨 以子世槐封修職佐

張思誠 歲貢新州訓導

楊秀浩 拔貢候選教諭

楊秀棟 歲貢穀城縣訓導

以下道光

馮永旭 拔貢候選教諭

張光杰 歲貢候選訓導加國子監

學正 銜

丁秀錢 歲貢儘先選用訓導

楊秀詣 東名崇德儘先選用從九

楊秀熾 更名榮椿儘先選用從九

以下 咸豐 楊思儼 歲貢儘先選用訓導

魏連陞 留川補用守備加都

秦鍾俊 附生以均難贈把總

王 偉 恩貢廣東大司捕縣知縣署街

王文煥 以子偉贈朝議大夫

鎮平 鄧秀毓 附貢刑部主事安徽清吏司

徐正位 以江浙軍功保補用

鄧顯俊 以孫秀毓贈奉政大夫

咸豐且縣志 卷七 仕籍表

司行走加員外郎行

秦雲龍 四川候補通判署奉節興文青 馮德衡 五品藍翎儘先補用

鄧勝友 以子秀毓贈奉政大夫

神等知縣會理知州松潘同千總 知雷波慶府通判事

秦朝品 庠生以子雲龍贈奉

徐正旭 恩貢候選教諭加六品銜

秦馨元 署來鳳千總後陞都夫

饒鴻漸 拔貢候選直州判

徐正旭 候選教諭以子大煜

楊守悫 恩貢候選直州判

田紹建 六品軍功

贈奉政大夫

王 鏞 署四川酉陽直隸州州同

瞿明哲 署唐屋汛把總

劉正心 四川試用縣丞

姚光富 福建候補縣丞

華耀武 總兵銜貴州補用副

李文階 歲貢候選訓導

將



以下  
光緒 劉正方 歲貢候選訓導

王朝武 副將銜福建補用參

徐正承 恩貢候選教諭

張質 拔貢候選直州判

秦勳 候補縣丞

鄧炳麟 恩貢候補四川直州判署

漢縣 典史

王紹荃 候補四川縣丞代理火石壩直

州判龔澣 巡檢等處

劉第章 候補湖南巡檢署城步縣

江頭巡檢 新甯典史

咸豐縣志 卷七 職籍表

朱肇端 拔貢候補湖南直州判

徐大煜 舉人署四川瀘縣知縣

鄧文榮 副榜分省補用知縣

劉煉 四川試用典史

王承猷 拔貢候補安徽直州判現

任武昌 縣知事

覃香臣 拔貢候選直州判

參謀部 科長

秦國鏞 陸軍部騎兵上校任

右列各員特囿於一人之間見遺漏在所不免至者諸先達歷任各處多以賢能廉惠著稱從無貪劣脂韋習氣卒以恬退涵直未獲大竟其用是亦可見前清顯宦大僚類相矜以

門戶黨援而官常吏治不遐深計若吾邊遠瑰奇埋沒固自有寧韋布而榮終不屑就軒冕而辱者爾



咸豐縣志卷八

人物志

列傳 孝友 忠武 義行

楊世貴明大田掌印千戶楊景春次子兄世洪病故之嗣例應承襲以弟世高材武能光大其族遂甘心固讓世高襲職且以忠君盡職為訓並名其子曰再讓明夙志亦以杜爭端也今其後嗣一遷石板堡一遷黔江兩會壩族繁人衆書香不絕世高襲後值隆慶萬歷間諸夷猖獗智勇兼施恩威並濟閭境以安有子八人為楊氏肇興之祖孫正麟武功卓著難兄難弟可謂兩美並濟矣馮祖乾字健元前清太學生明指揮將軍朝鵬之曾孫儀表威重

咸豐縣志

卷八 人物志 列傳

八十六

性尤樸誠父顯文勤儉起家後以子祖顯贈奉政大夫先生奉養服勞最得親心與弟顥頤友于甚篤至老弗衰性尤樂善喜施生平創修橋梁道路及應有寺廟甚夥馮氏故邑望族多篤行君子而資衣率稱領袖者當以先生為最垂老髮重黑目重明時家倍充裕兩弟皆登仕籍又以子世玘誥封文林郎居同五世眼觀八代洵義門福德士也卒年八十有七孫曾顯達者多人

徐登爵字國士幼業儒一試不售遂絕意仕進乾隆中其父維瑾晚年以岳家大訟京控株連時先生弟兄已析居諸昆季俱規避不顧獨挺身請代聽解赴省三年訟直乃歸家貲耗盡而昆季仍悍然弗恤先生毫不較量友于之愛一如往日生平篤厚正直曾



拾遺金不昧嘉慶白蓮教之亂躬率鄉勇防堵出力不受薦舉其  
淡然榮利多類此垂老以士民公呈由縣請獎八品頂戴知府尹  
英圖贈耆德可風匾額卒年八十孫曾列膠庠者十餘人

劉光貴大路壩人家貧有孝行咸豐六年五月十八日地震山崩  
壓斃村民無遺類光貴皇遽奉母奔出入飛湍走石中竟免於難  
事後詢之據述恍入桃源深處不知世有滄桑之變者胡中丞林  
翼純純孝格天額盧令慎徽為之立傳詳舊府志

陸必瑞龍坪人篤天倫事母尤孝顛沛流離中無忘也咸豐己未  
年五月大水淹盡田廬瑞負母置高處旋就水次撈取財物失足  
落水適有木漂過跨抱其上出沒洪波中無敢援手者岸上有人

咸豐縣志 卷八 人物志 列傳

八十七

惟聞瑞號呼曰陸某命在頃刻無生還理家有老母愛我者祈寄  
聲我兄弟當善養母如我在售我分業甘旨可供也流百餘里呼  
如一後遇漁舟得不死人皆謂純孝格天云盧令慎徽作陸孝子  
傳詳舊府志

劉毓瀛邑庠生家貧以舌耕代養同治壬戌母年九十方春粵匪  
入境閭里皆空母不去毓瀛侍左右匪脅以從不屈遂被害  
向義文天性純篤少失怙事母查數十年色養不衰刑于妻子俾  
母得終柏舟之志鄉黨咸敬愛之曰真順子也

周立璜丁寨人賣卜供母母病割股作羹以進病尋愈又楊勝志  
割股調羹愈父疾劉玉麟切指療父疾

均見舊府志

石成玉邑西平陽里人家甚貧母胡氏老而病劇醫藥罔效成玉焚香禱割股烹啖母竟豁然若矢張坪巡檢為題苦孝格天額續見

府志

彭兆興本農家子咸豐六年夏江水突漲及其廬父及妻子皆漂去兆興躍入急浪中救父得免見續府志

粟大志太和里年家寨十二齡童子也嘗從張新翹茂才讀其至性篤倫已為一堂所推壬戌正月石達開由來鳳竄咸豐盤踞年家寨一帶賊入粟宅合家半避惟大志奉其老瞽祖母不忍離左右一日賊殺貓烹熟叱瞽母分食不應賊怒捶其兩手大志謂祖母氣息奄奄朝不保夕叩頭乞輕又一日賊舉刀欲斷祖母喉

咸豐縣志

卷八 人物志 列傳

八十八

即長跪賊前泣下沾襟且言甘容婉願以身代賊怒抱大志出門外大志從容泣曰童子死何所憾惟親恩未報祖德未酬請稍緩向天禮拜畢遂被害時是月十三日未時事也處士張桂軒並作歌以弔之

楊文佐早歲失怙家甚貧一弟尚幼文佐勤苦力耕後貿易川湖間獲稍贏其弟乃求析居弟竟以樗蒲破家文佐輒分己產以給之如是者三而產復罄仍招與同居子孫亦善體文佐意弟夫婦皆先文佐卒葬皆從厚文佐年八十七卒見續府志

劉正坤父元泰性嗜學遇族中子姪讀書者嘗以酒食獎勵正坤其長子也幼瞽父垂死囑曰汝以瞽廢讀汝弟方性敏必使讀書

成名否則吾目不瞑坤泣受命未幾母亦卒家僅破屋一椽薄田四十畝力作勤苦以節縮所餘俾弟從師衣食稍佳者皆推與弟自御則粗糲敗絮而已及粵匪犯縣境劫掠一空仍不令弟廢學後弟方遊泮食餼旋貢成均知縣鄒嶧為題孝友可風額而字正坤曰厚倫蓋紀實也見續府志

張光楚字新翹幼敦重勤學逾冠遊泮隨侍祖思誠學博任所蘄州人文淵藪士尚浮華思誠率以端介樸誠風氣為之一變先生隨侍未久以時方多故奉其祖歸里咸豐辛酉年粵匪擾縣境合家避匿山中兄光杰為匪所獲情急號呼二弟救我先生自林莽中趨出哀乞羣匪釋兄願以身代不允許以重賄乃縱先生歸時

咸豐縣志

卷八

人物志

列傳

八十九

隆冬奔走冰天雪窖中經宿奉重貨達匪窟贖兄及兩姪回家先生制行端謹治家嚴明梅子坪本一荒村自先生卜宅於茲整飭風教俗為一變旋設集其間俾土人貿易稱便光緒初突來匪類盤踞躬率子弟驅逐整頓團甲闔境以安卒年七十二子孫克家者多人以上孝友

冉舜卿明大田千戶成化十一年隨其父霧及其叔西陽宣撫雲破賊於茅坪楊尚排尚清水堡白崖塘等處十三年雲奉勅進階霧亦受賞宏治六年雲子舜臣自請從征都勻苗舜卿與焉奉旨嘉獎七年賊平舜臣續敘前功自請加封兵部以為非例請進一階特旨進明威將軍未幾貴州土官妻米魯等叛攻劫諸寨川邊

大震舜卿又與舜臣隨督師王尚書討平之所得賞賚及賊財物即以分賜所部明土司列傳正德元年命大田千戶冉霽子舜卿為指揮僉事以自陳討川寇功也在邊鄙未弁迹近於伐而猶特沛綸音登諸史冊是亦足見殊功偉績真有不可淪沒者矣  
邢世臣明大田所千戶其始祖源隨湯和王驥征伐有功永樂時官大田所歷五代至世臣萬歷四年二月土司不靖奏曰竊大田所設在西南極邊土壤瘠薄在先朝宋元時並未附入版圖因九溪土蠻各路一隅自為酋長竹荒寢谷負固蟻穴不時出劫楚蜀毗連州縣商賈不通狂悖為害了無休息及我朝洪武初年兩次命將楊豹湯和統兵勦洗未獲全寇復於十八年上命藍玉領兵

咸豐縣志

卷八 人物志 列傳

九十

隨帶西陽平茶驛梅石野地壩等司柵兵由草菓崗進剿殺戮太衆上命藍玉不必盡洗但取各司姓名列為宣安長官共十四土司楚設施州衛蜀設黔江縣彭水縣相間關隘而設大田所於八面環夷腹心之中緊扼諸司之垣柵楚蜀就留西陽平剿等司隨征將卒一千一百一十員各把隘守禦後因土司亂法不常復諭臣所及本衛左所漢官兵五百五十員列為三十六屯且耕且守又設銅牌五面使稍有蠢動就便督剿毋容滋留楚蜀邊陲各有專治惟大田雖屬彈丸之土實以拳泥塞多孔而鎖鑰荆襄屏翰重夔朝廷紆西顧之憂赤子仰懷保之惠者誠重地也繼以武備廢弛復於隆慶年間因覃壁率散毛司反黃忠又率東流腊壁司

反雖禦寇有人而勤兵費餉亦勞當事之憂近年各司乘間擄掠吞佔屯堡抄劫人民臣與本所具疏奏委三勘雖云追退戶田而賊情狡悍散毛覃冲霄等仍以錢神通空事竟模稜了局諸蠻得志益肆猖狂破關攻城殺官劫印城野板蕩幾無孑遺茲因黔江彭水郁鎮等處逐節席捲施州衛地方俱為俘掠是土司有長蛇之勢漢民無鷓鴣之枝卽有未盡之民巖棲穴處狼奔豨突哀哀黔首無地請命臣自任職以來冰淵自矢夙夜不遑枕戈擐甲血戰三十餘載而狡馬思逞者迄今未有寧宇臣職司鎮撫有慚曠官謹將邊隅情形縷陳睿覽或剿或撫惟冀皇仁浩蕩垂恩蒼生臣亦得竭篤駘云云奏入上飭所司相機剿撫未幾亂平據邢氏

咸豐縣志

卷八人物志

列傳

九十一

族譜贊曰同國休戚故舊元勳非族蠢動烽燧時驚枕戈擐甲衣血常腥瀑泉保障南國干城是可以想其概矣

覃鼎明唐崖宣撫其先代覃文銘正德間征四川江津曹甫覃富征川寇麻六兒覃萬金嘉靖間征麻陽苗逆皆有功受賞至鼎尤樸勇善戰天啟元年隨征渝城寇生擒樊龍樊虎二年隨征水西安邦彥亦有功三年隨征奢從明奢世輝血戰報捷巡撫朱燮元奏陞宣慰使司以平西將軍參軍事賜建坊勒石荆南雄鎮楚蜀屏藩八字其雄武多智略足為一方保障已可概見未幾積勞病故子宗禹襲職崇禎三年川撫邵捷春調守夔府紫陽城時值衛民作亂馳歸平之張獻忠寇蜀率兵防堵於大寧縣斬二百餘級



擒賊兵五百十三人邵撫奏給宣慰使司新印前清康熙四年歸  
順職仍舊後又受吳三桂封十八年病故至子鉉受撫改給長官  
司印  
梅拱辰明大田千戶父鼎以武功陞指揮僉事至拱辰掌漢五所  
印散毛木冊二司時出劫掠勢甚猖獗忠堡屯適當其衝洪辰頌  
兵鎮守賊不敢犯崇禎時流寇大起川楚糜爛散毛覃勳麟木冊  
田生瓊乘瑕進逼倉卒不備力戰殉事聞以明威將軍子卹子元  
變襲職

楊正麟字秀若明武德將軍大田掌印千戶再荆之子襲職後值  
散毛大旺東流唐崖各土司肆行賊掠出沒無常公為清野堅壁

咸陽縣志

卷八

人物志

列傳

九十二

之謀踞險立寨民賴以安復率所兵奮身克敵奉部院何奏給都  
尉職銜並賜著建奇功匾額崇禎七年唐崖土叛突起環夷四出  
公血戰保全龍姓男婦三百餘口堂弟正堅正良叔再登俱陣亡  
復因東流腊壁攻劫蔣徐二寨公率所兵與胞弟正昌兩次擒斬  
蠻首活生命千有餘人九年大旺土司糾合羣夷四出焚掠公力  
戰解所城及劉李屯石板堡之圍鳳衛侯年文綬手書嘉公才長  
禦侮勇冠三軍制叛夷而安兆庶運韜略以鎮邊疆云云諸土以  
所地難犯移攻黔江彭水二邑公率弟正昌子天柱往援天柱陣  
亡卒以力戰擊退強寇黔邑安堵楚蜀督師據實上聞閣部某極  
加獎卹贈兩省干城額十二年酉陽叛苗間出掠擾近逼黔城公

往援斬獲甚衆川督呂大器奏公生長邊方曉暢軍事當羣夷慕  
張之際奮勇翦屠值中原板蕩之時矢心恢復加授總兵實職仍  
掌所印督理軍民事務十四年大旺土夷屢出滋擾奉旨剿洗事  
平欽差向奏給都督僉事劄副次年正月餘賊叛逼所城南境之  
獨樂關公免胄以見不擊而退是歲湖廣撫院核績疏公胸涵孫  
吳勇過賈育職司閩外號令肅於風霜績懋邊隅忠蓋貫乎日月  
時公與本所指揮舒相度將大田所與圖守禦官目軍民文冊彙  
呈御覽奉旨朕以頻年流寇蜂起武備廢弛爾楊正麟世邀厚賞  
茲復懋建殊功社稷之福生民之幸朕將有厚望焉所奏伊子楊  
天梯恭請襲職著該部行知湖廣督臣取具本衛供結照例承襲  
咸豐縣志

卷八

人物志 列傳

九十三

未幾即遭甲申之變公焚香北面日夜籲叩每以不獲生殉不手  
擊賊為憾前清定鼎土司乘間為亂衛所軍民仍奉朱明正朔而  
大田一隅全恃流官為之保障永明嗣統公率本所官弁再呈圖  
冊均蒙優詔褒答卒以事無可為憂憤成疾而終子天梯襲康熙  
四年歸順五年始繳印辭職

楊天註明大田掌印千戶正麟子崇禎九年土司攻黔柱隨父往  
援所向有功多所全活賊悉率精銳復戰陣亡崇祀黔邑

見舊府志

秦鍾俊邑庠生慷慨有膽略咸豐辛酉年粵匪踞蜀黔邑大肆淫  
掠時副將惠春統兵防堵線壩後招練勇從戎九月來鳳陷惠春  
移營忠堡後復與馬歲杪合兵勇還薄來城至麂子峽因前約南

軍夾攻愆期致腹背受敵師潰擄後入城脅之降罵不絕口且拾  
輒擊之賊怒本棉裹俊浸油投諸火遇害事聞贈把總賜卹祀忠  
義祠邑名士多為詩文哭之丁金舫明經一律云髻齡鼓篋記從  
遊馬帳談兵幾度秋縱使拋輒能擊賊可憐投筆不封侯骨堆白  
雪尸橫野血染紅花嶺帶愁一片雄心灰劫火淚隨斑管落雙眸  
魏連陞本名連岑咸豐年間西南行省糜爛陞匹馬從戎轉戰川  
黔皆有功保留川補用守備辛酉八月聞黔匪擾楚施請假回籍  
適惠副將春由線壩移營忠堡檄陞充先鋒官壬戌正月惠以宜  
昌及湖南援兵齊集而石達開又自湖南來不得已進逼紅花嶺  
防堵一日隨惠率廿餘人往探敵不虞敵率大股來撲陞神色不

咸豐縣志

卷八

人物志 列傳

九十四

動橫矛向前大呼曰敢來者戰敵懼不敢進從容掖惠而歸後因  
惠約湘軍夾攻愆期致為敵敗公殉節焉方惠之被圍也陞手殺  
數十人本可衝鋒出惠亦命之去陞不從曰死爾何懼馬卒以衆  
寡不敵同與於難其見危授命如此因無子卹典不及僅予祀忠  
義祠以上忠武

楊勝忠字蓋臣明武德將軍再荆之第五世孫父昌麒衛屬優文  
庠行誼敦重和易族黨交推乾隆丙戌六邑先輩公請建棚廣額  
首捐數百金為赴省公費是准後又命其弟與子姪合力蕙事士  
林至今稱之蓋臣先生少聰慧早歲遊庠旋食廩餼復肄業恩施  
宋廣文鰲及荆宜諸名宿之門文藝益精進歲科試屢冠其曹尤

樹施宜古學一幟鄉試屢薦不售士論惜之乾隆三十八年先生奉父命往施監修考棚三載又創建本縣學宮捐貲出力人皆敬服保送童試二十年從未受人贊儀有貧乏者賙以筆墨之資乾隆元年來邑教匪突起戕賊焚掠時承平百餘年遠聞大變楊尚地方尤密邇日夜烽燧告警游民奔竄先生率子姪佃戶百餘人往羅錫坪等處設卡堵禦月餘賊知有備不敢犯境及大兵進剿公率堂兄占魁捐貲募勇前往與官兵營得勝城先後奮擊十餘次凱旋後督憲畢奏賞一等軍功以知縣儘先選用家居表率族鄰儀型鄉里人無間言十四年邑令秦錫疇舉鄉飲大賓屢辭不就卒年七十六後選陝西環城縣知縣而先生已前歸道山矣今

咸豐縣志

卷八 人物志 列傳

九十五

其孫曾先後繼起列序者多人

楊勝岳字履南號小崧別號芥海幼性敏讀書識大體受南淮吳白華學使知列邑庠屢試優等嘉慶元年來邑教匪滋事募勇於璇玑羅錫坪等處日夜防堵咸賴以安後大兵進剿隨翼長何進逼賊巢雖親冒矢石未嘗妄戮一人事平蒙制軍畢奏賞一等軍功以府經歷不論雙單月選用十八年銓貴州思南府經歷單車就道抵任值歲凶督辦賑務民賴以安革除向來佐貳蠅營擅受惡習民間歌以頌之又常奉大府檄平反大盜冤獄公餘與後進講論文學宏獎寒畯成就者多程松亭學使接臨贈以聯曰竹國聲華於我當尊兄事梓鄉齒德惟君獨抱婆心蓋程本同鄉也二

十三年得保以潔己奉公才明年健調浪洞軍糧丞又兼攝丙妹  
錦屏印務浪為苗疆重地鎮兵千餘名遠近供納軍糧官為收放  
向因耗米最為民害先生歷別其弊猾吏無由肆其侵漁治南百  
餘里有河灘險水急行船必需絳夫兩岸狎苗賴以生活鹽商圖  
便輒自募產幾釀大變乃輕騎簡從擇老吏一二人至其地諭以  
商毋惜貲苗毋過索眾皆羅拜聽從道光二年黔撫以苗民愛戴  
堪膺民社題署桐梓縣令桐屬重案向多延擱先生銳意振刷聽  
訟如家人反覆推求必得其情而後已未幾告歸里創修宗祠督  
子姪訂正家譜捐田一庄為家塾以教貧族子弟卒年八十所著  
有知二園詩文集數卷子秀詰孫守慎均以才學名於時

魏道宗字登岸幼業儒博通經史屢試不售遂絕意仕進然猶手  
不釋卷老年猶篤嘗有詩曰平生守拙無他術到處逢人勸讀書  
時吾鄉因土司蹂躪後繼以水患疊臻生聚艱難嚮學者寡先生  
極力提倡族鄰子弟有能文者獎勵倍至近年人才輩出丁寨地  
方遂為本邑人文淵藪魏氏祖籍本江右明隆慶初遷咸先生倡  
設清明會手修家譜一稟歐陽六一成法又著家訓格言若干卷  
附以前賢列傳及有善可錄有功可紀者無不備載卒年八十有  
餘

秦朝品邑庠生誥封奉政大夫幼警敏有肆應才尤善居積不事  
股削而家稱富有性喜施樂善創修緊要橋梁道路約數十餘處

西北江上流多水患東自土老坪而北西自桐車壩而下春夏水漲石橋輒坍塌不便行人先生勉為其難歲修每獨任之數十年如一日又應募培修廟宇多所年飢必赴市觀米價稍昂則遍假諸鄰減價售之風潮遂因以平道咸間海重多故吏治不修先生前知大亂將作豫修崗砦以為保護族鄰之地未幾即遭辛酉壬戌之變洵卓識也卒年七十子廷瑞以吏治名於時

徐國典字徽五郡庠生生有異稟讀書目數行並下詩文杼寫性靈皆成妙諦尺牘尤超妙神似倉山至才長肆應詞對敏捷每當廣坐劇談雖隔數重室聽之皆了了可辨邑有疑難要公官府非就見諮詢未由辨生平如創設老賓興蔚文培英兩書院暨總辦

咸豐縣志

卷八

人物志 列傳

九十七

軍需十餘年上不誤公下不病民當事者皆屈己聽命久無間言邑俗故好訟出其公事餘暇勸息兩造執爭保全身命者二三百戶垂老杜門養病逾十年遠近有爭訟不休為府縣所未斷結者相約踵門求一言剖判寢息其忠信明決類如此卒年七十子正旭亦以學行重一時

劉宗仁城南二道河人性敦樸善居積致富咸同以來兵荒屢告邑有義舉如軍需賑濟等事每慨助巨貲以為之倡晚年尤喜施濟附郭貧民賴以全活者甚衆卒年八十五

覃樹德篤倫端品至性過人妻金氏深得父母歡心生子勲中病故時樹德年二十誓不再娶四十入邑庠居鄉教授以禮節自持

有以續絃請者輒笑置之孫吉祥以學行名一時見續府志  
王文煥城南教場壩人性質樸誠言語不苟濟困扶危不遺餘力  
嘗設家塾收族中子弟教之鄉里有紛爭事力為排解費重貲不  
惜子偉官縣令以吏治著一時見續府志

王偉字輔臣恩貢生官廣東大埔知縣調署鎮平縣以母老去職  
旋里色養以終先生幼聰慧讀書目數行下尤究心經世之學貢  
後以軍需防堵功保知縣以直隸州升用謁選入都銓粵令居官  
勤慎政通人和里居詩酒自娛耕讀教子益振家聲邑有疑難要  
公輒授意諸子出與贊襄事罔弗舉其立品清高有古循吏退老  
林泉與樵夫牧子溷迹之遺風卒年六十四子鏞紹荃孫雲龍見  
咸豐縣志

卷八 人物志 列傳

九十八

選舉志餘亦多克家者

徐正旭字寅軒恩貢生同治初以軍需防堵功獎六品銜就職候  
選教諭先生幼精舉子業入庠後兩試秋闈一膺房薦素究心經  
世學尤喜談儒先性理書皆手抄裒輯成帙昕夕把玩因內無昆  
委家貧親老不得已里居教授先品行後文藝邑名士多出其門  
行誼誠敬仁恕暗室勿欺畢生未嘗袒裼箕踞及為便易草書其  
端正不苟類如此所為文醇厚靜穆望而知為耆德碩士邑令劉  
壽椿舉鄉飲大賓通詳有案至老以物望所歸尤惓惓於本縣地  
方公益善舉嘗手書重要事件於座右以自課遇便即次第行之  
如整理賓興書院及賑荒施衣即送善書其最著者也易簣前日

猶出大力完人夫婦二事至捐己業禁人竭澤而漁手製碑記授子荼錄稿斟酌字句畢而逝子六椿見藝文志煜見選舉志餘尚多克家者

秦雲龍原名廷瑞字濤安幼讀書知大義不屑屑章句學咸同兵事棘募鄉勇勦賊屢立功繼以入貲晉職至都司同治初年粵匪漸平靖以行伍頗難展抱負因請註銷都司職援例捐通判分發四川試用到省後值駱文忠丁文誠二公先後督蜀整頓吏治一切脂韋卑鄙之徒皆望風解綬去先生屢蒙眷注有疑難事輒相委任後歷署松潘同知夔府雷波等通判奉節興文青神等知縣會理知州所至皆有循聲奉節鮑氏會理祿氏一以勲貴陵鄉里

咸豐縣志

卷八 人物志 列傳

九十九

一以土酋肆淫殺守令過事優容民受其害先生蒞任繩以法然奉節內地公論難淆先生雖被中傷而士民愛戴至今猶有秦青天之稱會理三面界番夷地方官方欲主持公道為民請命而寧遠某守且以要譽生事為罪直至宣統元年祿氏以爭襲內亂趙次珊尚書奏請改土歸流而先生為國為民之苦衷乃益彰著云子勲烈見選舉志餘亦多以積學名者

邱秀毓字碧嵩幼孤母氏馮教養成立年未冠以縣試第一人遊泮旋因軍需防堵功議敘府經歷謁選入京捐升刑部主事供職分安徽清吏司加員外郎銜居官清白尤喜疎財賑貧乏同鄉傳孝廉朝欽留學京師春闈報罷病甚先生照料醫藥久而不厭傳



卒並助厚貲扶櫬歸里僚友有窘急者輒捐己囊分潤之旋因母老告歸里居十餘年邑有重要公事官紳咸就取決以定衆議行止其為人和平樂易不露圭角族戚咸嘉賴焉子炳麟孫文榮見選舉志餘亦多有聲譽序者

劉正方字楚城歲貢生候選訓導幼性敏篤學逾冠遊洋益肆力經史貢後友教鄉里尤精岐黃活人最多晚年家小康輒喜周濟貧乏光緒中葉邑地以瘠薄疊遇歉歲先生捐貲設粥廠食流氓暨本境極貧之戶全活無算所著救荒十二策上諸當道多蒙採行家設藥肆遇無力者施診治不取藥貲向願以艱嗣為慮晚年數舉子年七十卒至今口碑猶留於咸里云

咸豐縣志

卷八

人物志 列傳

一百

邵秋湖字曉泉太學生幼警敏善居積家遂小康後延覃衡翹茂才教其子讀一日謂覃君曰凡各姓族繁人衆家殷實而世綿延者胥由前輩積德而來徒擁厚貲不講樹人之功愚夫也吾地頻年歉收道殣相望因罄其歷年所積慨然捐穀百餘石約里中同志數人董其事常年則貸於次貧者薄取息責必償極貧者賑之荒年則全數賑濟貧民丙申丁酉間穀盡又獨捐百餘石分別賑貸亦如前合十餘年計其所全活救濟者不下千餘人惜年未五十卒至今鄉里盛稱之

吳相珍字寶山精明端厚豐財好施所置橋梁修道路甚夥遇凶年穀必賤售不足則貴糶於鄰境而賤糶之同治間川匪劉石林

倡亂相珍捐貲團練獲首惡保六品軍功 見續府志

咸豐縣志

卷八

人物志 列傳

百零一

咸豐縣志卷九

人物志

列傳 文苑 列女

楊光萱字子茂雍正時恩貢生時南北尚未分闈先生由明經銓今湖南新化縣訓導清慎自持為同僚上官所敬愛門下高足騰聲藝苑者實繁有徒後以引病歸里從遊者無遠近皆抱經負笈而來裁成講授造就多人楊氏當明世以武勛起家嗣後淵源家學以文翰著稱者接踵而起先生為之倡也卒年七十八子昌生孫勝科亦以積學能文名

蔣世槐字蔭亭歲貢生博學能文尤工詩任漢陽府學訓導主講咸豐縣志卷九人物志列傳

百零二

晴川書院數年門下士被其裁成騰聲藝苑者實繁有徒先生當道咸多事之秋以冷官小隱外患內訌每一感觸輒託諸吟咏是故在漢多載撫藩上憲率以箋扇索吟題莆落稿士林爭傳誦焉粵西事棘先生知武漢將大受蹂躪謝病歸里時蒲圻賀渠塘任教授本故交以先生方蒙憲眷挽留弗聽未幾武漢殘破賀奔波受累始服先見之明卒年九十六所著有縣志稿知日齋詩文集若干卷因乏嗣無人梓行府縣志所附錄特其近體中之一種耳同時有蕭德昭郭如昂汪本一三明經年稍長皆以能文名時有蕭郭汪蔣四才子之目

楊秀浩初字曉湖改曉溪遊泮後就學江漢書院執贄陳愚谷先

生之門深以遠到相期後受鮑覺生侍郎知列拔萃科嘉慶甲戌科奉旨照舉人一體會試榜後以教諭註選以親老告歸里力學彌篤族鄰遠士從學成名者不少所著詩文甚富皆清雅有逸致稿散佚無存

楊秀煜字燦亭恩貢生候選教諭幼性敏勤學早歲明經其為文純正樸實具有根柢嘗友教蜀中門下士發跡者衆黔命蓋紹曾名解元也奇其文延入幕禮為上賓適縣試代主文衡所賞拔皆真才晚年教授鄉里邑名士多出其門所著有詩經集解若干卷卒年七十八子守璫孫思愉皆以積學能文名

馮永旭字曉湖拔貢生年十七遊洋下帷攻古十二年不履城市

咸豐縣志

卷九 人物志 列傳

百零三

貢後朝考以直州判用人勸其留京候銓試因父老遂毅然旋里邑養以終嘗謁祖墓忠州遂遊黔涪達夔萬一帶訪求前人遺跡經瞿塘魚腹觀武侯八陣圖下三峽由巴東歸所至皆有詩文紀實生平慎交遊謹取與雖家近縣城非公不入友教四方遇寒士尤體恤倍至門下多品學兼優之士七試秋闈四膺薦薦竟不售晚年益精書法遠近馳名子延緒貢生亦以能文名

見續府志

文有典字菊人歲貢生祖運閩叔士衡士才皆以明經擅文名先生幼性敏勤學嘗年遊泮益下帷攻苦博極羣書貢後因嗜學成癖絕意仕進友教三十年所獲脩脯餘積輒以購古今書史南皮張文襄督學時年少負氣其觀風試題百餘種欲以奇闢繁難困

鄂士所收錄少完卷先生方家居如題應付遣子姪賁呈大蒙激賞獎品頗豐手書家藏古史存疑是天與高才割愛難一聯寄贈並傳語邑士以不得一見為憾後文襄視學蜀西猶向王鶴笙二尹問先生起居其傾慕如此晚受蜀中大吏之聘周遊岷峨嘉涪間胸襟尤濶遠卒以淡情利祿辭歸里光緒初邑有教案奸民藉故羅織多人先生慨然以身犯難未幾事平卒年八十所著有袁文箋註若干卷駢文一種較石琢堂袁文箋正增補尤多歷代狀元譜若干卷自唐以來各為小傳叙其事實出處縣志稿詩文集若干卷其他小學讀本數種因子孫不克肖未盡梓行

宋文藻字古香歲貢生幼性敏勤學其為文才思縱橫不落庸腐咸豐縣志

卷九

人物志

列傳

百零四

且詞賦擅長遊泮後每試輒冠多士古體詩典麗清新多表彰節義之作近體亦淵茂越俗及教五十年門下士遍黔利思來諸邑有聲譽序者不下百餘人卒年八十三歲所著有縣志稿詩文集若干卷子名驥歲貢生亦有文名

丁秀鏡字金舫歲貢生候選訓導幼沈靜好學為賀渠塘學博所激賞遊泮後尤肆力經史詞章之學有聲譽序賀蒲圻名孝廉司鐸十七載造就多人每謂先生為衣鉢大弟子書法歐陽詢晚年尤逼真入妙每晨起盥沐畢必為真草書若干字數十年如一日是以書名噪遠近遊宦遠商皆以一得真蹟為寶其為人端肅和易素敦孝友尤喜培植文教門下士發跡者多易簪前月自為輓

聯輓詩處分家事了了洵達士也卒年七十所著有留鶴山人詩文集

張光杰字俊甫髫年遊泮肄業江漢書院多載七試鄉闈兩膺薦不第僅以歲貢就職候選訓導友教三十年門下士發跡者衆其為文樸實清雅一稟先型晚年益勵節行領袖士林有澹臺子羽之目同治三年邑令張梓聘修縣志尅期歲事現梓行者即其所手著也卒年七十子明泰更名質拔貢生有文名

覃吉祥字福田恩貢生幼性魯刻苦力學有曾參之目稍長才思勃發所業大進試輒冠軍歲科試文藝恒為學使所激賞鄉闈屢膺房薦卒不獲售士論惜之教授先品行後文藝邑名士多出其咸豐縣志

卷九

人物志 列傳

百零五

門其為人樸實正大望重一時且孝行卓著性好施濟至今父老猶稱頌之子香臣見選舉志

秦馨元原名鍾嶽字澧洲幼業儒饒幹濟才屢試不售道咸間兵事日棘因兼習弓馬一試中選同治初以功任來鳳千總後保都司復從戎鄂湘川黔諸省所至皆有詩文紀實卒以性豪邁徑直動與上官齟齬不獲大竟其用中歲告歸里邑有要公成就取決行止庚寅歲饑兼大水為災流氓羣聚思逞先生率子弟腰刀首巾立呼首要切責解散之全活甚衆其威重服人類如此晚年以鄉望最孚充本縣高等小學堂長兼任修身圖書等教科未幾卒於家先生素工詩古體尤豪放多逸致隸書峭拔饒骨力畫水墨

大寫尤擅長二者得名久老境益歸平淡多超妙入神之作所著有豹皮集林麓山莊詩集若干卷子七秀彰國鑄國達見選舉志餘均能克家

李文階字東聯歲貢生候選訓導幼性敏勤學咸豐辛酉之難與兄文吉為粵匪所得索重賄以贖時家故寒畯僅備一人貨先生因讓兄贖歸粵匪挈以西行至利川金字山卒以警智乘間脫於厄歸里益肆力經史一試遊庠旋食廩餼其為文清真雅正風骨尤高友教三十餘年成就多士待兄嫂諸姪極厚以養以教數十年如一日至今鄉里猶稱之

徐大椿字壽林邑廩生幼刻苦力學博覽羣書其為文典重堂皇

咸豐縣志

卷九 人物志 列傳

百零六

按之沈實稿脫輒傾動老師宿儒弱冠即友教鄉塾課徒稍暇不廢左右圖史遇有心得手抄等身每歲試學博恒以品端學優上諸使署榜放皆異等教授成就多才尤擅長理繁治劇邑有要公如賓興書院學堂等總攬通籌事宜之原委財政之纖悉算無遺策素為同事所推服本縣高等小學開辦涪州施鶴笙廉訪時方守施以品端學邃鄉望素孚稟充校長廼開辦未久積勞病故士論惜之所著有漫筆紀聞十二卷左史類聯八卷知事齋讀書記四卷待梓

劉華陔原名端冕字季軒邑諸生博學能文屢試輒冠其曹家故殷實多藏書瀏覽皆遍當時邑士富度儲號鴻博者以城西劉氏

為最先生性孤介好為奇闊高論皆有書史以敷佐之聽者翕然  
罔敢異議其為文淵茂雄直無纖毫脂韋卑靡習氣詩亦稱是年  
未五十卒士林惜之所著述甚富今皆散佚無存

劉敬亭字子寅恩貢生少聰穎讀書過目便成誦無遺忘弱冠以  
詞賦樹幟文壇試輒高等尤工近體詩信手拈來皆成妙趣其豔  
情諸作頗思奪杜牧之李義山之席書法脫胎松雪老人雖骨韻  
未逮而落筆不俗實為士林所推惜年未五十卒子永壽現官教  
育司總務科科員

馮延緒字纘臣恩貢生髫齡遊泮益勵志學業有聲黌序其為文  
敏捷暢沛不落小家數言十七試鄉闈房薦者五次堂備者二次

咸豐縣志

卷九

人物志 一列傳

百零七

卒以數奇不獲售齎志以歿士林惜之所著詩文甚富科舉既廢  
遂皆散佚無存

王英明字靜生恩貢生弱冠能文試輒冠軍年五十始受張文襄  
公知以第一人遊泮獎許倍至並於江漢炳靈集選刻其制藝先  
生性方介與人交輒和易好為俳諧解頤之談其為文尖銳沈摯  
無腦滿腸肥之病卒年七十六

蔣祥鍾字靈荃郡廩生幼聰穎有神童之目六歲時其舅氏張海  
陽孝廉過訪將歸送之蔣誦曰我送舅氏曰至來鳳張笑曰何以  
贈之答曰惟有青山遠送君其他詞對敏捷具有雅致亦皆稱是  
年未冠以歲試第一人遊泮科試即列優等食餼文字詞賦均蒙



學使獎許倍至所著有醉經山房詩鈔二卷清新俊逸兼有其長年僅二十二卒士論惜之以上文苑

覃田氏明唐崖宣慰覃鼎之妻龍潭安撫田氏女也相夫教子皆以忠勇著一時夫鼎於天啟七年故子宗堯襲職頗肆行不道田氏繩以禮法迨堯奉調赴荊州剿流寇尚事悉賴主持內則地方安謐外則轉輸無乏未幾宗堯死事弟宗禹承襲樸勇一如其父田乃優游以樂餘年性好善樂施尤喜奉佛嘗朝四川峩眉山隨侍奴婢百餘人沿途皆為擇配歸里後創建大寺堂牌樓街道煥乎一新至今猶為邑中百蹟云

蔣覃氏蔣進明之妻故土官覃梓椿之女年十九夫故撫孤守節咸豐縣志

卷九 人物志 列

百零八

事姑以孝聞勤苦持家動中禮法戚里稱之乾隆四年旌

劉三姑笄少守貞捐軀明志乾隆五十四年旌熊遇溪明經碑誌云瀑泉西北百二十里有地曰通草灣桃源人劉姓者攜家居此女三姑及笄未字惡少廖某窺其美假事挑姑姑避之謹廖伺姑出汲窘於途姑大號得免比歸聲出淚滴憤不欲生母方以未及污解慰之姑乘間彌縫上下衣履使連結如一縊死邑侯張公嘉其節處廖以極刑請於朝建坊旌獎土人因以牌樓名其山蓋乾隆五十四年事也越道光乙巳予授徒茲土姻長張慎齋先生致仕歸屬訪其事予至故墟敗瓦朽木無一存者碑碣為山石崩掉不復可尋徒見奇峰壁立溪流滑而遺蹟杳矣幸二三父老道

其始末猶詳焉竊嘆自昔至今纔六十年何銷蝕至於如斯若歷時愈久文獻無徵誰復知其節烈有如是哉聞嘗為吳君寶山及其弟方毅昆仲道及此事謂此女亮節卓然向列郡志今乃墳塚模糊幾不可以辨識宜勒諸貞珉以垂永久以光潛德惟於有力者是望焉二君以為然遂慨然捐修而碑亭遂巍然重新是亦勇於赴義者之所為也予雖拙於才亦樂誌於石且綜其事而論之古之所謂殺身成仁舍生取義者每出於烈丈夫今不圖於巾幗中髣髴遇之也且夫貞女特僻壤窮鄉中一弱息耳耳不聞保姆之訓日未睹女誡之書獨其羞惡之性是非之心堅於金石不可屈抑吾意強暴樓逼時直欲齧其人而死之矣顧力有所不能因

咸丰縣志

卷九

人物志 列傳

百零九

即以其死死之而邑宰張公果能處廖以極刑按其人而置之死其貞魂詎不快然於地下哉嗟彼狂徒胡犯貞烈既烈且貞冰霜比潔有其侵之項領流血而吾獨異近世縱淫之徒何幸不遇此女得保首領以終又異乎姣而誨淫貽羞帷薄者胡不令此女一唾其面吁嘻惜哉而劉貞女者至今凜凜有生氣矣宋古蕪明經有烈女行云為訪香檀入幽谷羣芳中有女貞木鸚鵡欲啄女兒花河姑下視天應哭烈哉貞女劉三姑隨命持家阿母俱生成麗質招人妒倏來濁水流明珠久貯深閨誰覲面桃花不合牆頭見伏戎惡少向而狙風語華言佯相煽風狂且暴屢將侵狡童有意妾無心閨門謹閉魚潛沼燒香不敢立花陰一朝緹紫晨出汲四

顧無人勢岌岌向天大號賊膽驚雨欲淋花花未濕網羅幸脫歸  
來曼婉轉嬌啼香魂顫阿母聞之慰藉深妾恐狂且情猶戀只愁  
門前或再逢繡履羅裳密密縫針線未停腸已碎拚將一命絕狂  
蜂夜深悄把房櫳閉珠淚闌干啼聲細拜謝命娘養女恩今生難  
報雙親惠慘把吳綾七尺裁瓊花入夢豈重開勢將為厲來殺賊  
貞魂不肯上陽臺邑宰張公賢令尹採風及此聞之憫旋將惡少  
寘典刑頸血澆墳慰幽眵更為表奏請於朝丹詔飛來下九霄牌  
坊棹楔輝金碧劉氏三姑烈女標瀑泉世族多賢媛亮節英風輝  
史傳那知貧女解完貞不憚捐軀憑素練考厥朝代書簡編乾隆  
五十有四年詎今纔經六十載瓦敗碑殘蝕雨煙遇溪先生好訪

咸豐縣志

卷九

人物志

列傳

百一十

古與我同心館斯土偶尋斷碣立斜陽相視惻然愁肺腑先生作  
傳識芳烈我亦長歌眦欲裂從古佳人福不佳貌則芙蓉腸則鐵  
延陵昆季古賢流慷慨耐金績此樓祇許貞魂長坐臥不許遊蝶  
漫尋秋鬼物有靈爭守衛此人此樓長萬歲村童竈婢拜下風相  
對貞烈皆垂涕樓成重過牌樓山樓下清溪水一灣流水似為嗚  
咽語貞魂猶自怨紅顏

田蕭氏田錦興妻年十九夫故撫孤守節滿例府縣稟奉湖北布  
政使諭本司查得該氏心堅鐵石志勵冰霜十六于歸方切宜家  
之詠三春喪偶永懷分鏡之悲奉堂上之翁姑克全孝養撫膝前  
之襁褓兼盡慈嚴何乃時運不齊命途多舛既慟椿萱之已萎旋

悲蘭桂之早凋實捨地而呼天真血枯而腸斷乃含飴破涕復為  
夢裏空勞爰擇嗣承祧殊費心中計畫節以孝而愈彰志遇難而  
彌篤守節三十二年屆年五十一歲既年例之相符應旌揚之特  
錫嘉慶五年旌後人為建坊永豐里之小水田至今巍然猶存  
劉張氏劉正友之妻年十八夫故守節道光十年學使王贈松柏  
長榮匾額

楊甘氏文林郎楊昌試妻年二十二夫故守節三十二年卒邑令  
張南溪廣文劉韓書肅紫庭欲為援例請旌以年例未符力辭未  
幾歿胡廣文烜銘其墓子勝岳孫秀請見選舉志

徐冉氏贈承德郎徐世久之妻年二十六夫故守節二子俱幼氏

咸豐縣志

卷九

人物志

列傳

百十一

以母道兼父道勤於訓誨課讀尤嚴二子業儒成名行誼皆為邑  
人所推重家故寒素而性好施濟晚年小康近鄰貧民待以舉火  
者甚衆年七十一卒貧民慟哭如喪考妣其德惠感人可想見矣  
子國典國治生員孫正旭見選舉志

李劉氏文童李興周妻雲夢於諭劉介之女年十六夫故守節奉  
翁姑撫姪承桃克紹家聲邑令向崇基為作節孝頌其略云是劉  
介女巾幗之傑能讀父書賢女合轍于歸匝月所天遽亡懷清守  
潔以孝高堂猶子為子藐姑承祀曜靈不弔哭子濺淚幸已生孫  
禮祀是續孫也克家得延世澤養之教之嗚嗚孺泣五十五年大  
節昭問評子桑梓譽遍榆枌

王黃氏贈奉政大夫王文煥之妻儒士黃義和女年二十九夫故守節撫孤家雖貧奉翁姑必備甘旨侍姑病恒衣不解帶及卒哀毀逾常後家小康每紹夫志為義舉訓子嚴尤戒濫交子偉官大埔知縣道光二十八年邑大饑督子買糧賑濟同治六年又值凶災復諭諸孫減價平糶兩次全活甚衆年八十一卒光緒八年請旌

鄧馮氏贈奉政大夫鄧勝友之妻年二十五夫故守節時鄧氏親族方以孤寡可魚肉屢尋衅生事氏故望族女性敏幹獨力捍擋內訌外侮賴以寧謐初家僅小康躬操女紅生計漸裕又念遺孤莞孑非顯揚未由愜父願迺延內姪馮曉湖明經教其子與婿後

咸豐縣志

卷九

人物志 列傳

百十二

子官刑部婿支承祜官兵部皆稱職著賢聲由氏善教之力也後又延師教其孫與外孫皆成名晚年家益富饒尤好善樂施有巴婦懷清之譽同治初旌表節孝卒年八十子秀毓孫炳麟見選舉志孫慧麟貢生石麟太學生

徐曾氏贈文林郎處士徐國潤之妻年二十六夫故守節時長子次子俱幼遺腹生季子家故寒素氏持躬以禮且勤女紅教子有方持家有法迨三子成名家亦漸康尤喜推解衣食以濟窮乏族鄰稱賢德焉卒年五十六子正涵太學生正承見選舉志正綿庠生孫大標附生大均恩貢大垓歲貢

蕭田氏蕭志珍妻旌表建坊田節婦蕭氏女也年二十夫故守節

卒年七十二學使王文在以砥節懷清表其閭

蔣覃氏蔣英華妻同治壬戌春避難山谷中賊搜獲之罵賊不屈墜崖死

謝田氏謝廷賜妻年三十同治元年正月十一日粵匪竄境避賊洞中賊圍數日洞破氏誓死不屈奪刀自刎賊忿碎其屍光緒八年旌

田邢氏田敬德妻年二十八夫故守節卒年六十一旌

董譚氏董元泰妻年十八適董兩載泰回常德原籍不返氏無子女翁姑依母家守節以終卒年七十

朱周氏生員周德高孫女適儒童朱英歲壬戌年二十一避難入

咸豐縣志

卷九

人物志

列傳

百十三

洞賊至恐被辱赴陰河死同治三年邑令學博同贈節烈可風匾額

黃冉氏監生黃承德之妻其女適同里吳宗祺壬戌春避賊洞中為賊所逼母女攜手墜崖而死

洪李氏太和里洪秀枝之妻年二十歸洪生一子夫遠出不歸家故貧里人憐之有勸其改醮者氏指其子曰洪氏血食賴有此耳吾去則嬰兒誰依諸公毋狗彘我也里人慙且敬之後為子娶媳覃氏生三孫不幸子與兩孫俱歿僅一孫方在抱氏溫言慰藉與覃氏日勤針黹夜則紡績姑婦二人相依為命云

袁鄧氏文童袁通顯妻刑部主事秀毓之胞姊年二十五夫故守

節四十餘年卒撫子仁全以養以教克振宗聲孫鳳鳴鳳喙俱附  
生縣城南闢建有節孝專坊

楊黃氏楊廷璋妻年二十六守節孝親撫遺孤二成立巡撫胡林  
翼為請旌題節孝昭垂額

楊羅氏文章楊正峰妻年十九夫故欲以死殉孀姑泣勸始忍死  
守節奉姑極盡孝養已旌

覃田氏年十八為覃靜山繼室原配遺孤二氏撫之如己出壬戌  
粵匪過境全家避難斷水峽石崖中賊窮搜挾靜山以去氏挈子  
墜崖百仞飢渴三日免歸撫子成立以養以教逾三十年歿子慶  
遠遊洋家亦小康皆氏積勞茹苦之所致也宣統元年旌提學高

咸豐縣志

卷九 人物志

列傳

百十四

贈清標彤管匾額

支徐氏恩貢生候選教諭徐正承之長女幼字四川彭水縣兵部  
主事支永祜之次子名家壽年甫十九夫故過門守貞三十餘年  
以侄承祧俾故天宗祀不絕族鄰稱賢媛焉宣統元年旌

咸邑民風樸厚士夫家禮教相傳罔敢失墜至閨幃之內名節自  
礪從一而終者較之通都大邑尤為數見不鮮第搜羅未備遺珠  
不免即如志乘所登事實仍多缺略然吉光片羽睹其名已足想  
見其人茲照錄之如廖銜相妻田氏蔣某妻周氏田錦華妻蕭氏  
李天麟妻彭氏武舉熊金榜妻李氏黃天忠妻胡氏滕成先妻李  
氏陳德大妻詹氏李均成妻戴氏楊昌隆妻冉氏宋瑰萬妻蔣氏

李正培妻周氏謝正元妻魯氏姚勝珊妻楊氏袁章煥妻梁氏李  
正權妻宋氏蕭宏贊妻季氏楊繼貞妻袁氏郤文祥妻王氏楊秀  
洪妻程氏宋朝選妻曾氏宋朝榜妻江氏馮世均妻王氏熊錫陽  
妻張氏李天福妻楊氏萬志珍妻田氏嚴大堂妻周氏嚴修文妻  
周氏田先來妻王氏覃廷璠妻黃氏黃義和妻熊氏劉正隆妻嚴  
氏以上見舊府志又向日顯妻查氏王世裕妻楊氏嚴道衛妻楊  
氏周心富妻嚴氏馮德偉妻張氏楊秀汾妻梅氏葉光宙妻孫氏  
周國瑚妻黃氏馮德佩妻張氏王洪高妻龔氏王大淮妻魯氏王  
太漢妻陳氏賴嘉會妻謝氏張蓋芝妻吳氏劉仕選妻孟氏劉啟  
柏妻譚氏以上亦係舊府志本縣志纂錄者又王廷珍妻黃氏謝

咸豐縣志

卷九 人物志 列傳

百十五

營三妻劉氏勝代昌妻陸氏游行魁妻陳氏劉秀鍾妻李氏覃光  
藻妻周氏王吉美妻李氏李介堂妻田氏謝廷俊妻劉氏謝朝幹  
妻李氏張守桂妻王氏文生丁秀鍾妻嚴氏魏德明妻蕭氏楊勝  
發妻朱氏以上見續府志又續府志載馮貞女者馮慕濂之女幼  
字楊姓楊子殤誓不再字性敏而孝知詩書明大義言笑不苟年  
二十七卒自處分後事命其侄朝夕奠不用僧道葬必於父側尤  
惓惓屬兄嫂善事其母訓導魯元誌其墓而銘之又生員徐大蔡  
妻楊氏年二十三夫故守節十餘年卒蕭大宏妻再氏蕭大亨妻  
李氏蕭子俊妻楊氏李可知妻楊氏亦守節如例凡此皆貞淑賢  
媛雖未盡邀曠典而其芳躅遺徽要自不可磨滅也以上列女



咸豐縣志卷十

土司志

列傳 金崗司 龍潭司 唐崖司

金崗安撫司周巴子國地秦屬黔中郡漢屬武陵郡唐屬黔中都督府宋為磨崖洛浦地元置安撫司屬施州明玉珍僭擬為五路總管府明洪武四年金崗安撫司覃耳毛歸順尋叛二十三年定其地永樂五年置安撫司宣德三年令領石關崗長官司西萍蠻夷長官司隸施南宣撫司隆慶五年土舍覃壁殺兄據地叛命將平之削其爵為崗長以次支承主其地屬支羅百戶所後以功仍復安撫前清初屬施州衛康熙三年歸順十三年吳三桂據雲南

咸豐縣志

卷十

土司志 列傳

百十六

金崗屬焉至十九年歸順雍正十三年改流是時襲安撫者為覃邦舜改世襲千總至其子廷建改隸漢陽縣籍官山東德州營參將 按西萍一作西坪

龍潭安撫司周巴子國地秦屬黔中郡漢屬武陵郡唐屬黔中都督府宋為施州南砦地元置安撫司明玉珍改宣撫明洪武四年龍潭宣撫司田起喇 一作田應虎 歸順改安撫二十三年廢二十五年復置編戶八里領上下支羅二崗後支羅叛改所正德嘉靖間為其戚黃氏篡竊迨黃氏以罪誅滅田氏復為安撫其子孫頗以文章自娛中有以能詩名者前清康熙三年龍潭安撫歸順十三年吳三桂據雲南龍潭屬焉至十九年歸順雍正十三年改流是時

襲安撫者為田貴龍改世襲千總至其子朝舉孫勝祖改隸江夏縣籍

唐崖長官司舊府縣志從略然古時隸屬與金崗龍潭略同據覃氏家譜覃啟字處送元時有功以武略將軍授唐崖宣慰世職傳子直明洪武四年隨廖永忠征蜀降職病故先是直有子七長安毛分金崗司次耳毛分唐崖司三散毛分散毛司四非毛分東鄉司五宴毛分忠路司六花毛分施南司七小毛分毛港司俱授安撫宣慰之職自是多叛者洪武七年改唐崖安撫為長官司分唐崖者傳忠孝斌彥實文銘富萬金桂宗堯宗禹先後以武功復安撫宣慰職并分領蒼蒲活龍左右二副司一為黃璋一為秦國龍

咸豐縣志

卷十

土司志

列傳

百十七

明季唐崖最徭強每結散毛蜡壁木冊等司為本所患迄於明亡乃漸謐平前清修會典載唐崖為長官司緣康熙三年始歸順十三年吳三桂據雲南唐崖屬焉至十九年歸順後譚宏據四川又附焉次年歸順故降職雍正十三年改流是時襲長官者為覃梓桂改世襲把總至其侄光烈孫世培改隸漢陽籍

元明以來土司紀畧

縣境自周秦以來日漸開化且民俗純良較之他屬尚無犷悍喜亂之習控制殊易也五代及宋設州分治其視宣利兩邑頗有文野之分自蒙古入主中夏而民氣騷然動矣按元史世祖本紀至元十七年賜招收散毛等崗官吏衣緞十九年九月亦奚不薛

之北蠻尚向世雄兄弟及散毛諸尚叛命四川行省就遣亦奚不薛軍前往招撫之使與其主偕來明史洪武二十三年監玉等平散毛諸尚蠻遂分散毛司屬地之半為大田所置漢土千百戶等官以統治之永樂二年復設散毛施南二長官司先是洪武初諸土司長官來降者皆予原官蠻苗吳面兒之難諸土司地多荒廢長官亦罷承襲至是故土官覃友諒等以招撫蠻民請仍治所以其戶少降為長官司隸大田軍民千戶所以友諒為散毛長官覃添富為施南長官四年改施南散毛仍為宣撫司以友諒添富來朝故也又以田應虎為龍潭安撫時應虎來朝言其祖父自宋元來世為安撫自蠻亂併其地入散毛隔遠難治乞還原職治所又

木册長官田谷佐唐崖長官覃忠孝並言父祖世為安撫洪武初大軍平蜀民驚潰治所廢今谷佐招集三百餘戶請襲許之永樂五年復設忠路忠孝金崗三安撫司隸施州衛以覃英田大英覃天貴為之皆因洪武間蠻民散廢其治所今忠孝以故官子侄來朝奏請復設並從之各賜印章冠帶宣德二年設石關尚長官司西萍長官司隸金崗安撫皆以其酋長為之先是忠路安撫司等各奏前元故土官子孫牟酋蠻等各據蠻民久據綏尚今就招撫請設官授以職事兵部以聞帝以馭蠻當順其情所授諸司宜有等殺兵部議以四百戶以上者設長官司四百戶以下者設蠻夷長官司元土官子孫量授以職從所招官司管屬皆從之今三年

一朝貢如故事正統三年命散毛宣撫覃友諒之子瑄試職初友諒以罪斃獄至是本司以其子為蠻民信服乞襲職從之命試職以圖後效景泰三年禮部奏散毛宣撫司副使黃璠瑄罪當斬其妻與子忠貢馬贖罪瑄罪重法不可宥宣洽鈔以酬馬值從之宏治九年金崗安撫覃彥龍奏境內產杉木鬻金二千貯庫彥龍年老子惟一人恐身後土人爭奪乞解部工部議非貢典卻之正德四年散毛宣撫入貢後期部議半賞從之是時境內承平漢土相安舊府志載本衛指揮僉事童昶擬奏制夷四款其詞曰蠻獠多詐而少實負氣而好鬪事無大小興詞且奏委官行勘兩造俱避督責過急則據寨固守以後官司有奏無印者照腹內人民遞解

咸豐縣志

卷十

土司志

列傳

百十九

不與給引有印者非其該管部屬立案不行提問不出亦立案註銷計必擇廉明謹勤有司一員專撫夷情久於其任務使情形允當即不得已委之武戎亦必擇清廉者始可施衛所屬覃田二姓當宋元未分之前其勢甚盛故屢為邊患至國朝永樂以來二氏子弟分為十四司後世親者漸疏遂為仇敵勢分則患少蓋彼即不靖環視他司有內顧之憂此與主父偃令諸侯王得以戶邑分子弟同意真制夷長策國朝設立關隘把截甚嚴至今尚傳蠻不出境漢不入崗之語永樂二年令守臣招撫不意漸徙內地如施南金崗等司則入施州地矣宏治間忠路忠孝又徙施州都亭等里施南唐崖又侵黔江之夾口夫侵軼其地其貪未厭而守土之

不畏勢可畏也。宜先事制之。國初土官屬吏部。三年改兵部。七年子絕。許弟侄襲。永樂十五年例出十年。亦准承襲。天順二年許會奏就彼處冠帶。宏治二年許年未十五者亦管事。五年令土官襲於本衛習禮。三月回司理事。今皆蕩然。鄭端簡之論尤宜整頓矣。嘉靖七年龍潭安撫司每朝貢。牽領千人所過擾害。鳳陽巡撫唐龍以聞。禮部按舊制進貢不過百人。赴京不過十二人。命所司申飭。三十三年龍潭安撫黃俊素貪暴。據支羅尚寨。以睚眦殺人。係獄。會百草番反。俊子中請立功。為父贖罪。又自求為副指揮。賄當事者許之。後出益驕。乃與中及羣盜李仲實等恣行四川之雲陽。未節閩副使熊達等計擒俊。與仲實。俊死獄中。中自縛出降。執餘

咸豐縣志

卷十

二司志

列傳

百二十

黨譚景雷等自贖。帝命追戮。俊梟示。仲實等論斬。中謫戍。而賞有功者。隆慶四年金尚安撫土舍覃壁因爭印相殺。畏罪作亂。傷官軍。撫按請治。失事。諸臣罪。兵部言本衛孤懸境外。事起倉卒。宜從寬。貫以責。後功。帝然之。命所司相機剿撫。五年覃壁平。巡撫劉懋條議五事。一請以川東所轄巫山。建始。黔江。萬縣。改屬上荆道。一以荆州去施州衛遠不便。巡歷夷陵。西有傅友德所開。取蜀故道。名百里荒者。距荆州五百餘里。請以巴東之石碛司。巡檢。施州衛之州門驛。三會驛。并移近地。俾閭井聯絡。而於百里荒及東卜壠。仍創建碉堡。令千戶一人督班軍百人戍守。一施州延袤頗廣。物產最饒。衛官朘削。致民逃夷地。為亂。宜裁通判。設同知。轄治民蠻。

均平徭賦毋額外橫索一金尚世官不宜遽絕貸曹勝降安撫為  
尚長聽支羅所百戶提調一施州十四司應襲官舍必先白道院  
始許理事其擅立名號者請嚴治并令兵巡道每歲經施州豫行  
調集各官獎諭令赴學觀化從之神宗萬歷二十八年播州平給  
三宣慰八安撫司鼎銘曰惟星拱北惟水朝宗惟天王建極八方  
會同惟西南民土各世其封惟敬天勤民庶不墜爾祖厥功爾其  
不信視楊應龍按明史萬歷二十五年播州宣慰使楊應龍叛遂  
糾諸苗反寢及湖廣命李化龍總督川湖貴州軍務討之賊乘官  
軍未至率眾陷綦江盡殺城中人投屍蔽江楚黔道梗二十八年  
六月化龍集三省兵大破之應龍自縊死七子皆就擒詔磔應龍

咸豐縣志

卷十

土司志

列傳

百廿一

屍以其地置遵義平越二府分屬川貴遂賜鼎銘唐崖金崗龍潭  
皆與焉是時朝廷顧念西南邊陲而吾大田所地漢土雜處禍機  
潛伏尤切九重宵旰之憂是亦可見當日土司之勢力矣自應龍  
誅後大田一帶漸平靖數十年崇禎初流寇披猖始為梗抗既而  
合各司攻剗本所三十餘年前清康熙初始就蕩平然千百戶初  
罷承襲而土司一仍舊制雍正十年東鄉司覃壽春以長子得罪  
正法諸子不才呈請改流十一年忠建土司田興爵以橫暴不法  
侵龍山改設內地經南臬審實擬罪改流俱為恩施縣城十三年  
施南司覃禹鼎以淫惡抗提擬罪改流又容美土司田明如窮凶  
極惡覃禹鼎及覃壽春長子楚昭皆其壻也每犯罪輒匿容美屢

提不出當事以其先人從征紅苗有功置不問明如怙惡不悛至是特參拏問明如畏罪自經於是忠尚司田光祖等糾十五土司呈請歸流經湖廣總督遵柱題准分設縣治

### 前清改土歸流緣起

縣境自明洪武二十二年割散毛司地之半設大田所置漢土千百戶等官因糧於酉陽黔江等地置軍駐屯介於宣來咸利諸土司壤地之間終明之世尚足藉資控馭崇禎末年大田掌印千戶楊正麟千戶陞指揮僉事舒相度進呈輿圖官軍文冊內開漢千戶六員一楊正麟一舒相度一張其紳一蔣永鎮一蔣啟昌一梅元燮漢百戶五員一許天爵一徐日光一田惟貴一尚守仁一孫

咸豐縣志

卷十

土司志 列傳

百廿二

五達應襲土千戶八員楊昌祚冉天開楊國光冉時雍張世棟田永忠楊國元丁正惟又冉天明應襲指揮冉天梯應襲百戶邢啟鰲現任差操田國義現掌百戶印一所城東北三十里有清水堡蔣家壩又五十里有馬湖屯又五十里有龍坪堡係千戶蔣永鎮帶兵一百名屯守又五十里有白沙溪抵小關直至大巖壩鈿撈土交施南司界左有石虎關張角舖有歐啟元帶兵屯守而散毛司霸佔清水堡改名散毛河又霸佔蔣家壩改名鸞寨子施南司霸佔龍坪堡白沙溪小關大巖壩石虎關張角舖土魚塘三佛壩等處一所城東去十五里有土地關前通進水溪直至老鴉關路通散毛司木冊司直至忠堡屯有千戶梅拱辰帶兵一百名屯守

左有滴水關進通東流司內有馬官屯有百戶馬忠帶兵一百名屯守後因散毛司土官覃玉鑑覬覦馬官屯破開長荒一路名為新開山直至滴水關霸佔屯堡改為苦窩洞本所管甲具告當路因賄賂公行竟至寢閣一所城南去三十里有獨樂關高山堡內有獨樂坪小車溝萬家屯野貓屯有百戶趙武臣帶兵一百名屯守竟遭腊壁司土官田琦紫營獨樂坪霸佔小車溝唐家溝萬家屯野貓屯橫截所地梗塞不通各司出劫惟滴水獨樂二關最為緊要一所城正西八十里為石牙關內有蠻王牌有千戶張其紳帶兵一百名屯守以上皆前明舊案甲申國變流官土官志切同仇自宏先迄永明悉奉正朔前清康熙三年施始歸順十三年吳

三桂據雲南衛所附焉十九年歸順後又隸屬譚宏一年二十一年所官全罷世襲軍屯廢弛而土司豪強益為民害康熙五十四年十二月大田掌印軍民守禦所鈕正己因漢土互爭田地案內土司恃強侵佔鈕斷令土司退出所佔而令漢民備價贖取銘鐘紀案今存興國寺銘云為銘鐘紀案以垂久遠事竊惟余自丙戌夏蒞任以來目睹地方情形民生疾苦甚為憫惻以有限殘才之民處諸土環繞之中豈有不被其欺陵吞食者乎所以邊境田地為施南唐崖散毛木册腊壁各土司佔去不下百十餘處前任各牧雖欲詳請而諸土強佔終成懸擱余自愧德涼力棉午夜焦思但身任地方豈可因循置之度外是以獨於田畝侵佔不清等事



案內盡行斷退有約者酌付價值無據者量力開耕諸土司俱各樂從毫無嫌怨出有吐退印結賚院題達未為定案矣又思學校未設而士進無階田地拋荒而國儲難裕實為司牧之愧特詳定學額六名而文武生童蔚然特起適示招安給荒墾種而民屯田地鬱然漸熟矣猶幸所地雖屬邊方而民性愚直俗尚淳樸其士紳雖才華少遜於大邦而文理不遺於上古惟在官斯土者因地制宜順情化導臨事以見緩為先處己以忍耐為要土司可和而不可怨彝財可卻而不可染如以隨機變化斟酌損益未有不洽於人心者至於宏大富庶之獻實有待於繼起之高賢余則謝而未

能第巨條重案人心叵測日久變更土司又起爭端謹紀案銘鐘

咸豐縣志

卷十

土司志 列傳

百廿四

永垂不朽馬爾合計斷退之業一蔣世振黃金環陸譚李趙鍾楊騰曹等姓贖回施南司退出龍坪屯一官盛官選冉奇劍楊光玉田永先田永慶田永習田永洪田育明田之應官美等贖回唐崖司退出泗渡壩麻地壩冉寨屯大河邊謝家泉魚渡溪生地壩偏坡屯陶家田柿子坪官巖溝王家灘紅石底趙家堡銅廠魏家壩長沙壩一冉奇月粟美義陳子孝孫開舉廖彥亨梅珩張文孝徐應士蔣力賓冉奇劍贖回散毛司退出馬明屯清水堡麻骨溪忠堡屯梅家山三道河大寺小寺馬官屯一徐加位唐成贖回腊壁司退出唐家溝趙家山高灘堡土老坪一忠堡屯毗連之蠻寨溝向為木冊司侵佔係業主梅元和報糧納賦雍正十三年土司忱

於國威相率自請歸流裁大田所為咸豐縣金崗龍潭二安撫司  
唐崖長官司西萍蠻夷長官司所有地併入咸豐縣境

按冉氏家譜載四川黔江人朱衮邑令潘澄夏復鎮彝鄉碑記  
云黔自明初涼國公奉命入川取明玉珍令副將趙士英由巴  
東進後路取道施州衛大田所進黔江乃建石城一座安頓步  
官軍三千有奇日食涪州倉口控御諸夷時官軍就地開墾舊  
職指揮孫旺督領百總謝昂自龍橋起開魚灘小江大堆壩上  
下廟溪官村謝家壩過小河泉門口桐車壩穿岑高磧口兩河  
口耕種為業相傳已經百年酉陽司在明時降明玉珍獲罪於  
明曾貶其爵罰其兵米協濟湖廣大田所酉人以為苦率連吾

咸豐縣志

卷十

土司志 列傳

百廿五

黔遂起爭端訐奏御前成化時委張巡道臨勘以泉門口小河  
為界將大堆壩穿岑高磧口兩河口斷給土人其謝家壩官村  
上下廟溪小江魚灘龍橋斷歸黔人止令幫麥糧數石轉解大  
田所國朝定鼎潘侯知黔事甫入境荆賊據城侯請兵恢復城  
堡出民水火土司冉奇鑣乘變借帑解麥糧之說捏詳妄爭蒙  
上憲遣黔武彭三縣會勘袒黔袒酉持議不一朱郡守陳刑廳  
詳賈楊兩守道李制軍佟劉兩撫軍裁定正賦歸之庫土地復  
之黔勒石永遵酉人懾服云云冉右之崇文曰朱氏此記殊嫌  
偏袒如明氏與明同起義兵酉之降五珍非與明人為梗不得  
以為獲罪且洪武四年大兵入蜀我宣慰如彪公即使弟如虎

之子應顯助討納款於白帝城明年復遣弟如喜貢方物而明  
史云洪武五年置酉陽州以如彪為知州八年改為宣撫司仍  
以如彪為使惟地理志云酉陽宣慰司洪武五年四月仍置以  
酉陽州兼酉陽宣慰司州尋廢八年正月改宣慰司為宣撫司  
屬四州都司似乎有貶降之迹然初則改置為州宣慰不過兼  
銜至八年廢州改宣慰為宣撫則天下大定官制改革故方輿  
記要等書皆云升為宣撫司貶爵之言未見其可據也至協濟  
大田所軍米酉既服屬於明則明兵屯止之地原當接濟其軍  
糧且酉去大田所近而於重慶遠舍附近之接濟而遠於重慶  
運納宣撫肯為之乎考明代賦役之制如彭水秋糧起運松潘

新塘食米一百石威州安遠倉米七百一十一石非彭水有罪  
罰之使幫松潘威州也且撥運酉陽宣撫司儒學倉米一百八  
十三石非有罪而使之幫酉陽司也黔人既爭佔謝家壩等地  
而麥糧仍歸運於酉故王岑公起而訟之當時流官左袒其類  
而於土官故從屈抑朱氏記之而復歸罪於酉未可言三代之  
直道再考余家別譜云洪武二十五年散毛司覃構部落向天  
富等作亂朝命藍玉討賊調酉陽土兵一萬三千人隨征散毛  
平以附近九靈地歸酉陽以黔江之酉陽山為界時酉司領兵  
者為冉如豹同侄應義應禮應信部落土目楊田許劉彭張李  
覃何等姓永樂三年授如豹施州衛指揮使大田所設千百戶

十五員土軍十漢軍五授應義應禮應信俱大田所千戶石梅  
平茶石耶亦設千戶楊田二姓授千戶其許劉彭張李覃何等  
姓俱封百戶應義以上軍二百戶在所守鎮子孫每年入酉陽  
於本族內收幫補軍需名曰幫軍錢糧酉陽之大糧則名秋糧  
納解湖廣施州衛云云所載原委頗詳朱氏但知明初征明玉  
珍後路取道大田之事而不知有二十五年征散毛司之事但  
知有協濟麥糧之事而不知有幫軍錢糧之事但知有爭地許  
奏之事而不知有授職酬功之事宜其左袒鄉邦失於考據也  
○按洪武四年討明氏者乃湯和傅友德非涼國公藍玉二十  
三年藍玉征散毛司朱氏始因傳聞之謠而牽引言之云爾



咸豐縣志卷十一

氏族志

列傳 土家 客家

條徐蕭索隸魯國之編氓王謝朱張修江東之門閥有土有人載筆者三致意焉矧今民族主義與國家主義相輔而行則雖一鄉一邑間凡生斯長斯聚族於斯者目不能不循流溯源期與其父子弟兄世世守此田廬毋致漸趨淘汰之列也今就本縣氏族列之大指分土家客家二種土家者土司之裔其嫡派多徙籍武漢各地留住者半係支庶之家客家者自明以來或宦或商寄籍斯土而子孫蕃衍為邑望族者也

咸豐縣志

卷十一 氏族志 列傳

百廿八

唐崖金崗覃氏為本地土人之最古後漢書南蠻列傳有漢中蠻覃兒健宋史林栗傳有施民覃汝翌與知思州田汝弼二人惡今邑之覃氏大抵汝翌之族裔也按唐崖草譜覃啟字處送元時有功以武略將軍授唐崖宣慰世職傳子直明初隨廖永忠征蜀降職病故有子七長安毛分金崗司次耳毛分唐崖司三散毛分散毛司四飛毛分東鄉司五宴毛分忠路司六花毛分施南司七小毛分茅港司自是多叛者後皆歸順終明之世唐崖金崗覃氏世長其地今散處各里中者皆覃啟之後裔也又永樂二里有覃氏自湖南澧州來者當與安毛耳毛之後別為一支澧州轄今慈利縣即古澧中地今澧州之覃氏當為兒健之族裔按覃氏譜有白圭



伯堅二人為覃氏最初分支之鼻祖湖南北覃氏各祖其一又按利川縣志忠路司始祖覃伯堅瞿唐人宋慶元中以從征吳曦功授施州行軍總管伯堅生普諸普諸生耳毛野毛化毛耳毛分忠路司舊府志明洪武四年金尚安撫司覃耳毛歸順與唐崖所祖者同名未知孰是

周書蠻夷列傳蠻者族類蕃衍世為寇亂魏人失馭其暴滋甚有冉氏向氏田氏者陬落乃盛僭號王侯龍潭田氏其一也舊府志載田起喇明史一作田應虎洪武四年以龍潭宣撫司歸順改安撫世主其地又嘉靖三十三年龍潭安撫黃俊貪暴不法畏罪作亂後與其子中俱伏誅田氏仍為安撫今其附近田氏一族皆起或豐縣志卷十一氏族志列傳百廿九

喇之後裔也黃氏散處邑之各里世系未詳

明洪武時唐崖宣慰司設左右二副司左蒼蒲司官黃璋右活龍

司官秦國龍今兩地有黃氏秦氏族大抵璋國龍之後裔也以上土家

楊公保原籍江南淮安府山陽縣人父成隨明魏國公徐達立功

官陝西西安前護衛漢正營印守禦世龍卒戶洪武二十三年調

湖廣施州衛大田所世襲二十五年公保抵任歷瓊玉景春世洪

凡四世始分支至再荆正麟而族始大今佔籍邑西平陽里者約

千有餘戶

再應義原籍四川酉陽司宣慰使如彪之子明洪武二十三年與弟應禮應信隨其叔如豹隸藍玉軍征故毛諸酋有功後如豹授

施州衛指揮二十五年應義應禮應信俱授大田千百戶等職明  
史土司列傳正德元年命大田千戶冉霽子舜卿為指揮僉事以  
自陳討川寇功也崇禎時有冉天梯者應襲土百戶冉應義之裔  
天明應襲土指揮天開時陞應襲土千戶今邑屬冉姓散處平陽  
禮忠二里尤多大指應義弟兄之嫡裔也

蔣春原籍江南鳳陽府元和縣人明初官大田千戶歷禮忠嵩廷  
玉蘭昇承祖洪策至永鎮凡十一世襲職今永豐下平陽二里之  
蔣氏一族皆春之嫡裔也

張官音原籍山東濟南府宜城縣人始遷湖北武昌府江夏縣洪  
武二十三年官大田所掌印千戶歷羽昇悟通清壽相鵠信義一

成豐縣志

卷十一 氏族志 列傳

百三十一

鯉一魁其紳凡八世至前清康熙四年停世襲今永豐里子房溝  
張氏即官音之嫡裔也

徐騰達原籍江南鳳陽府人明中山王達族兄弟偕兄紹達弟可  
達隨中山王立功兄官蜀省弟官黔省騰達隨藍玉征散毛諸崗  
洪武二十三年官大田千戶同時有合肥徐凱者由施州衛指揮  
以功陞副羗將軍都督與騰達亦屬同族騰達寄籍後歷世杰荃  
晟儼威伯華楷文魁日光凡九世至前清康熙四年停襲舊志載  
徐楷官大田百戶陞總兵徐文魁由大田百戶陞都司又崇禎時  
有掌印百戶徐日光載在楊正麟所進圖冊中皆其世系之章章  
可考者今樂鄉里丁寨徐氏皆騰達之後裔也

丁德原籍江南鳳陽府人明初從龍歷隨征川滇黔等處蠻苗有功官大田千戶子富襲職以武功由副千戶陞正千戶舊志載丁穆貴大田百戶又明末年丁希恩官大田副千戶子正維襲今樂鄉里丁寨丁氏即德穆貴之後裔也

梅世相原籍江南鳳陽府潁川縣人明初官大田副千戶歷八世至應元陞正千戶鼎陞指揮僉事拱辰掌漢五所印遭散毛土司覃勳麟木冊土司田生瓊劫印殺死贈明威將軍長子元燮襲至前清康熙四年停襲今下平陽里忠堡梅氏即世相之後裔也

邢源原籍江南鳳陽府人明永樂時官大田千戶歷輔昂裕鏗廷瑞廷璧世臣仲元啟龍啟鰲凡十一世至前清康熙四年停襲今咸豐縣志

卷十一 氏族志 列傳

百卅一

樂鄉平陽二里邢氏即邢源之後裔也

蔣天佑原籍黃州府麻城縣人明時官大田掌印百戶至明末蔣應昌承襲今其後嗣未詳

舒成祖原籍黃州府蘄水縣人明初官大田千戶歷九世至舒宏以功陞指揮僉事長子舒相度承襲今其後嗣未詳

許成祖原籍四川酉陽人明初官大田百戶歷九世至許天爵承襲今其後嗣未詳

田茂璧一作冒碧原籍南浦縣人明初官大田千戶歷十世至田九池應襲子國義曾掌本衛千戶印今其後嗣未詳

張仕元原籍未詳明初官大田副千戶歷九世至世棟應襲今其



後嗣未詳

楊正太原籍四川酉陽地壩里人明末官大田土千戶子光元應襲田國寶原籍四川酉陽車碧人明末官大田土千戶子永忠應襲又田惟貴尚守仁孫武略孫撫相皆明末百戶楊昌祚楊國光皆明末千戶以上諸人皆寄籍本縣惟其子姓氏微末由確定誰為其嫡裔也 以上因官

丁寨魏大其始祖遷江西臨江府新淦縣人明隆慶元年因商由蜀徙大田所之西江口屢世忠厚前清中葉生齒日蕃今於丁寨場東北聚族居者皆其裔也

永豐里馮氏其始祖朝鵬四川忠州世襲指揮崇禎時以楚亂追賊至施旋值甲申之變施夔夔爛歸蜀道梗土司向其妻以女遂卜居於月臺山前清康乾以後族日昌盛今附城馮氏皆朝鵬之後裔也

永豐里袁氏原籍湖南靖州人康熙時由商至本所遂家於是嘉道以後人立蔚起今貓兒嶺蠻刀溝邢家溝袁氏其祖籍大略從同也

永豐里劉氏原籍湖南常德府武陵縣人乾隆末年由商至成遂家於是嘉慶初漸臻饒裕人才輩出道光以來稱邑中望族者凡六十年今附郭劉氏及忠堡劉氏皆其嫡支也又城南二道河亦武陵原籍先後寄籍於成嘉道間興家致富同治末年族人劉采

成豐縣志

卷十一 氏族志 列傳

百卅二

九庶常名鳳苞者從戎滇南過訪寄寓經年贈遺頗豐

樂鄉里蒲草塘鄧氏原籍湖南辰州人乾隆時由商至咸道光初起家富饒咸同以後人文蔚起今為咸望族焉

龍洞嚴氏原籍貴州思南府人乾隆時由商至咸嘉慶間興家致富今禮忠仁孝義悌三里皆有嚴氏產業稱邑中富室者近八十有餘年

樂鄉里楊氏原籍湖南辰州府人乾隆時由商至咸家於蒲草塘福家嶺一帶嘉道以後丁口日繁然聚族而居不喜誦讀二十年前語言聲口自成縣中特別一種土音今則殆與多數人民同化子弟嚮學者眾人才亦較前為多

咸豐縣志

卷十一

氏族志

列傳

百卅三

樂鄉里曾氏原籍湖南常德府人乾隆時由商至咸嘉道以來丁口日繁今苦草坪鐵匠溝及來咸交界地皆其族裔也前清湘鄉曾相國曾與聯同宗

樂鄉里游氏原籍湖南人乾隆時由商至咸嘉道以來丁口繁衍家亦漸裕今唐家溝土老坪一帶皆其族裔也

平陽里蔣氏原籍湖南武陵縣人乾隆末年由商至咸嘉慶時漸致富有家於王母洞新場一帶今關地至廣為邑西邊巨族焉

忠堡祝氏原籍湖南人乾隆時由商至咸旋創業立名今其後裔戶口雖不多而家聲猶未替

龍潭司顏氏原籍湖南桃源人乾嘉間由商至咸咸同以來家日

豐當今智信太和兩里皆有顏氏戶口

樂鄉里丁寨秦氏原籍貴州安化縣人乾隆末年由商至咸遂家於是嘉慶時漸臻饒裕道咸以來人才輩出家亦殷富稱邑中望族焉

小水田葉氏原籍湖南慈利縣乾隆時由商寄籍致富人才輩出今其後裔散處永樂二里間

永豐里王氏原籍江西金谿縣嘉道間由商寄籍咸同以來家日豐富人才輩出今附郭王氏戶口無多而門第稱鼎盛焉

附郭張氏原籍江西吉水縣大坪蕭氏原籍湖南靖州土地坪張氏原籍湖南常德府澧王牌李氏原籍江西臨江府黃板灘李氏咸豐縣志

卷十一 氏族志

百三十四

老洞崖尹氏原籍湖南澧州馬河曹氏吳氏原籍江西九江府丁寨劉氏李氏原籍湖南又永豐里汪氏麻柳坳耿氏獨樂坪謝氏大村朱氏忠堡朱氏李子溪廖氏磨湯坪黎氏蛇盤溪黃氏大路壩溫氏太和仁孝二里劉氏茅壩瞿氏原籍未詳皆發跡有年異於後來寄籍之族云以上因商

石刻各氏特就見聞所及生聚教訓滿十家以上而素著名望者分別錄入如有遺漏宜明再為詳登

咸豐縣志卷十二

雜志

施郡或稱古夜郎國舊府志辨之謂今貴州遵義府即漢牂牁郡實為夜郎國地而施則非是前漢書列傳南夷君長以十數夜郎最大其西靡莫之屬以十數滇最大自滇以北君長以十數邛都最大此皆椎髻耕田有邑聚其外西自桐師以東北自葉榆名曰雋昆明編髮隨俗移徙亡常處無君長地方可數千里自雋以東北君長以十數徙柞都最大自柞以東北君長以十數冉駹最大其俗或土著或移徙在蜀之西自駹以東北君長以十數白馬最大皆氐類也此皆巴蜀西南外蠻夷也始楚威王時使將軍莊蹻

咸豐縣志

卷十二 雜志

百卅五

將軍循江上略巴黔中以西莊蹻者楚莊王苗裔也蹻至滇池方三百里旁平地肥饒數千里以兵威定屬楚欲歸報會秦擊奪楚巴黔中郡道塞不通迺以其衆王滇變服從其俗以長之觀此則周之未造巴為楚有自秦併巴為黔中郡施夔西南邊地遂牽合而有夜郎之稱吾咸在漢屬武陵郡又為南郡地是在當時政令風教儕於中土何必斷斷爭一詩人之去留而自齒於椎髻雕題之俗哉

後漢書巴郡南郡蠻本有五姓巴氏樊氏

音 氏

相氏鄭氏皆出

於武落鍾離山其山有赤黑二穴巴氏之子生於赤穴四姓之子皆生於黑穴未有君長俱事鬼神乃共擲劍於石穴約能中者奉

以為君巴氏子務相乃獨中之衆皆歎又令各乘土船約能浮者當以為君餘姓悉沈惟務相獨浮因共立之是為廩君乃乘土船從夷水至鹽陽清江水一名鹽水出都亭山鹽水有神女謂廩君曰此地廣大魚鹽所出願留共居廩君不許鹽神暮輒來取宿旦即化為蟲與諸蟲羣飛揜蔽日光天地晦冥積十餘日廩君思其便因射殺之天乃開明廩君於是君乎夷城四姓皆臣之廩君死魂魄世為白虎巴氏以虎飲人血遂以人祠焉秦惠王併巴中以巴氏為蠻夷君長世尚秦女其民爵比不更按巴為古國春秋桓公九年巴行人韓服通好上國見左氏傳自秦惠王併之廢為蠻夷君長世尚秦女以示羈縻而翦楚人之羽翼也土船神女諸說西漢人為之咸豐縣志

不過襲魚魯狐鳴之故智自誇酋長之為天授不必實有是事也劉放註巴氏之君可有爵耳民何故輒得之明衍民字竊謂民指樊疇相鄭四姓而言務相赤穴當是漢時土酋相傳云云不必其為巴子開國之君也舊志載巴蔓子尹珍於人物並祠鄉賢李氏宗汾以尹珍為母歛人在今貴州遵義府乃漢武平夜郎所置牂牁郡屬縣也於施無沙巴國即今重慶以東一帶地蔓子為巴將軍因施郡都亭山有巴蔓子墓遂收入人物義亦未安竊謂尹珍之入人物以夜郎屬地之故謬誤相沿允宜更正至按明一統志施州在春秋時為巴國東境地蔓子捐頭顱以全本國三城楚巴壤地毗連所許者必

與吾施為近桑梓存亡之所關係七援不已繼以身殉揆情度理安在蔓子之不為施人况都亭既載其墓則此偉人傑士之確為是邦鄉賢尤覺毫無疑義

舊府志載唐李白流夜郎時經此登城北碧波峰有把酒問月詩後置亭遂以問月名焉李氏宗汾據太白年譜肅宗至德二年丁酉二月永王璘兵敗白亡走彭澤坐繫潯陽獄宣慰大使崔渙御史中丞宋若思為推覆清雪若思率兵赴河南釋其囚使參軍事遂上書薦白才可用不報乾元戊戌二年即至德三年終以永王事長流夜郎次年己亥未至夜郎遇赦釋回憇江夏岳陽後如潯陽此集中有流夜郎半道承恩放還兼欣克復之美有懷示息秀

咸豐縣志 卷十一 雜志

才作也再把酒問月篇原註故人賈淳令予問之未顯流夜郎且白自詔流夜郎如於烏江留別及贈辛判官劉都使易秀才憶蒲桃花諸作不題曰流夜郎則題曰時竄夜郎是未至夜郎有作自序且然豈已至夜郎之所而自序所作顧獨不然乎洋洋數百言皆以白未至施為疑愚按唐時夜郎屬遵義好事者辨之詳矣考潯陽至夜郎一泝江而上至涪渝折而南下至遵義此一程也一泝江而上至夷陵舍舟登陸經施州酉陽涉烏江西行入遵義此又一程也就水道便宜言由蜀入楚無陸行之理由楚入蜀陸行者較多古今罪囚遣戍必有卒徒循驛遞解陸行輕舟冒險者絕少况白有烏江留別之詩及過五溪到夜郎之語此豈不可為白

嘗至施之碣證乎黃山谷詩夜郎留仙客即繼以施州肯回首李白寄王明府詩云去歲左遷夜郎郡今年勅放巫山陽是亦可見白即未至夜郎而施南酉陽烏江一帶必為足跡曾經之地陳氏詩施非夜郎考謂白自梓州聞赦得還往來皆由水道此臆說也明豫章鄒維璉重建問月亭記冠絕羣言而於李白遺跡毫無疑問亟錄之以供衆覽記曰李太白之在唐可謂流落不偶矣其身後遺跡所在憑弔珍惜有若甘棠是故潯陽則有太白湖漢陽則有太白樓江油則有太白臺姑蘇齊魯之間則有太白祠而施城北碧波山則有太白問月臺一峯特聳天濶無垠江山崖徑城郭煙樹無不在目天籟泉響鳥語猿聲無不在耳誠施城之大觀也

予初奉旨謫施親友作詩贈行皆指斯亭以為詞予曰璉無謫仙才而患難行素講習有年當不令此君在施獨邀千古及抵施訪之州人張熙寰李岐陽云年久亭圯正欲新構而時未遑一日二子載酒招余同遊果見奇絕如其所聞為之夷猶不忍去至是亭成問記於予予曰古今重太白與太白之所以為亭重者果酒與詩而已乎清平三調暗刺玉環此諷諫也人主倘悟禍水立消豈有馬嵬之事耶唐之宦者干政自高璫始媚竈實繁有徒太白於人主之前呼役如奴隸豈真使酒慢上無人臣禮蓋借酒以規刑餘賤役原非天子所當寵此諷諫也使人主能悟而不留弊以遺子孫又何至北司重於南衙天子在其掌中哉嗚呼太白似醉非

醉似狂非狂有遠識有深心而又有俠骨謂其為智士可直臣可  
酒僊詩聖足以盡之哉予猶羨其少時謁時相題江上釣鰲客相  
問以何為絲釣曰虹霓為絲明月為釣又問以何為餌曰天下無  
義氣丈夫為餌相悚然奇哉斯言已見直道事人落落難合之嘆  
矣不然以彼之才稍自委蛇卿相何難之有然則永王璘之事何  
如乎曰道迫脅不從揮金明節太白詩序甚詳九江王中丞昭雪  
疏詞亦甚明蘇子瞻曰太白能於僞伍中知郭子儀之為人傑豈  
不能知永王璘之無成此語足為千秋鐵案矣予願登斯亭者想  
見其為人即酒與詩才不逮謫僊但以義氣丈夫一語相體味勉  
力名行仰止古人無徒為太白充釣餌則太白重而亭亦重庶不

咸豐縣志

卷十二

雜志

百卅九

負乎構亭義舉哉此雖專屬施城記載而亦足與吾咸歌羅碧山  
諸勝蹟互相證明者也

黃山谷云予既作竹枝詞夜宿於歌羅驛夢李白相見於山間曰  
予往謫夜郎於此聞杜鵑作竹枝詩三疊世傳之否細憶集中無  
有請三調乃得之一聲望帝花片飛萬里明妃雪打圍馬上胡兒  
那解聽琵琶應道不如歸竹竿披面蛇倒退摩圍山間猢猻愁杜  
鵑無血可續淚何日金鷄赦九州命輕人醉甕頭船日瘦鬼門關  
外天北人墮淚南人笑青壁無梯開杜鵑詩載舊府志雜志中按  
黃庭堅謫涪時曾至施題詠甚多石通洞書有涪翁二字歌羅驛  
或以宣恩之高羅當之竊謂詞臣所經原不足輕重即論李之舍



舟登陸黃之由涪赴施中歷酉陽彭水黔江吾咸尚為必由之路  
斷不能因舊志云云遂謂宣之高羅為是咸之高羅山為非也  
舊府志以沙渠屬建平郡治今施南各縣地按沈約宋書州郡志  
吳孫休永安三年分宜都縣置建平郡領信陵興山秭歸沙渠四  
縣晉亦有建平郡太康元年吳平併合永初宋武帝年號郡國有南陵  
建始信陵興山永新永寧平樂七縣按太康地理志無南陵永新  
永寧平鄉新鄉五縣疑是東晉所立信陵興山沙渠吳所立建始  
晉初所立也又建平郡領七縣巫秭歸歸鄉北井泰昌沙渠新鄉  
此宋書所載也今按巫即巫山縣秭歸即今歸州歸鄉亦作歸州  
北井即今夔州大寧縣後周省入太昌按晉太昌後周改大昌大

昌亦即今夔州大寧縣惟沙渠新鄉不詳所在考水經註渠出南  
巴嶺流逕宕渠縣謂之宕渠水漢有宕渠縣明一統志渠縣本漢  
宕渠縣地李氏宗汾以為建平沙渠既無明文可考大抵不離四  
川順慶府所屬州縣近是且宋書云沙渠晉起居注太康元年立  
按沙渠是吳建平郡所領吳平不應方立是宋書不特未據太康  
地理志註明沙渠所屬併所立亦且不詳原志謂沙渠即施州何  
所據而云然不知此臆說也今即宋書州郡志考之吳孫休永安  
三年分宜都置建平郡領信陵興山秭歸沙渠四縣沙渠既隸建  
平分宜都郡置則沙渠必近宜都可知且與秭歸諸縣同隸建平  
則沙渠必與秭歸縣相連可知今施東近宜都東北近秭歸興山

其為沙渠固已確然可信何至越夔忠州即至順慶割一渠縣來屬之理尤有可據者則在夷水即今水經註夷水又東逕建平沙渠縣縣有巫城南岸山道五百里其水歷縣東出焉又夷水自沙渠入很山縣在今長陽縣西又東逕很山縣故城南又東北逕夷道縣北又東逕宜都縣北東入江沙渠為夷水所經下流入很山宜都則即夷水以定縣沙渠之屬施不大彰明較著乎安得謂無明文可證而牽一不相連屬之渠水且以一字偶同之渠縣當之况渠縣屬今綏定府非順慶目前地志舛誤乃爾真不足資一噓矣

後漢書南蠻列傳肅宗建初元年武陵澧中蠻陳從等反叛入零陽蠻界其冬零陽蠻五里精夫為郡擊破從等皆降三年冬澧中

咸豐縣志 卷十一 雜志

蠻覃兒健等復反攻燒零陽作唐孱陵界中明年春發荊州七郡及汝南潁川施刑徒吏士五千餘人拒守零陽募充中五里蠻精夫不叛者四千入擊里中賊五年覃兒健請降不許郡因進兵與戰於宏下大破之斬兒健首餘皆棄營走還澧中復遣乞降乃受之於是罷武陵屯兵賞賜各有差和帝永元四年澧中蠻潭戎等反燔燒郵亭殺掠吏民郡兵擊破降安帝元初二年澧中蠻以郡縣徭役失平懷怨恨遂結充中諸種二千餘人攻城殺長吏州郡募五里蠻六亭兵追擊破之皆散降賜五里六亭渠帥金帛各有差明年澧中澧中蠻復叛郡官募善蠻討平之按澧中縣名即今湖南慈利縣地充中即今湖北鶴峯以西地水經注酉水出故武

陵充縣之酉源山至沅陵縣南注沅與漢書註同明一統志充縣在慈利縣西二百四十里今鶴峯正當慈利之西計其道里亦相去不遠又明史地理志於散毛宣撫司則曰南有白水河一名酉溪自忠建宣撫司流入東南入永順司界於永順司則曰西南有白水溪即酉水下流入沅陵縣界於忠建司則曰南有白水河今宣恩東南一百二十里毗連鶴峰州界緣山東南行四十五里地名羅戈川白水河實源於此與湖廣通志源出宣恩鶴峰交界之說合又今酉水伏流經卯崗復出由百戶司流下辰河按卯字即卯字之訛卯酉音近殆古地而今異名者酉溪為五溪之一五溪在漢為蠻夷地而充中五里六亭之人實預東漢戡定之功觀此則咸豐縣志

卷十二 雜志

百四十二

充西之與溇中其開化遲速正自不同又馬援征五溪至上雋謂從壺頭則路近而水險從充則塗夷而運遠卒從壺頭進兵以今考之由辰州至鶴峰之交所謂遠而夷者殆舍咸來附近壤地莫屬也

湘陰黃石珊大令利川縣志謂即後周所置亭州以都亭山得名鹽水即其附郭縣攷摺確鑿至烏飛縣不詳所在以今考之清江建始既別有縣宣恩又毗連古清江縣則烏飛一縣其為屬永兩縣舊治當無疑義至隋省州存清江郡又改烏飛縣名開夷按開夷既為烏飛更名是時又曾別置充州充於宣恩為近尤可信烏飛專屬咸來舊疆也

宋史列傳林栗字黃仲知夔州施民覃汝翌與知思州田汝弼交惡汝弼卒汝翌率衆伐其喪弼子祖周深入報復兵交於二州之境施黔大震汝翌以重幣借兵諸峯而乞師於帥府栗以汝翌實招亂移檄罷兵令兵馬鈐轄按閱諸州密檄令攝州事汝翌抗拒伏誅田祖周懼與其母冉氏獻黔江田業計錢九十萬緡以贖罪蠻民遂安按思州即今貴州思南地今之酉陽唐亦曰思州田氏自宋時世官思州黔江田業之入於施殆所以貫潢池盜弄之辜而為施黔接壤難民稍資撫卹也與

宋史蠻夷列傳嘉祐三年以施州蠻向蕞勝所領州為安定州紹興十二年詔以施州南砦路夷人向再健襲父思遷職充銀青光

咸豐縣志

卷十二

雜志

百四十五

祿大夫檢校國子祭酒兼監察御史武騎尉知懿州事舊府志又載本傳荆湖南北路徼外有南北江蠻北江有上中下三溪州又有龍賜夫賜忠順保靜感化永順州凡六懿安遠新給富來寧南順高等州十一南江蠻自辰州達於邵陽各有谿峯觀此則咸來二邑之設州分治由來已久而官斯土者并領朝廷清要重職文化早開人才輩出殆可想見

元世祖本紀至元三十年四月師壁散毛崗勾答什用等四人各授蠻夷官以璽書遣歸三十五年五月散毛崗主覃順等來貢方物陞其崗為府明史土司列傳洪武五年散毛宣慰使都元帥覃野旺上偽夏所授甲十七年散毛沿邊安撫司安撫覃野旺之子

起喇來朝命為本司僉事是時大田尚未設所散毛司地兼今來  
咸二邑廣土衆民是以百餘年間朝廷恒重視其人心嚮恃而汲  
汲於控馭之方也

舊府志載明鄒維璉字德輝江西新建進士任考功郎中天啟三  
年以攻魏璫戍施一載後起南太僕少卿巡撫福建在施著作題  
詠甚多有友白集大夢草俱燬於兵燹其序李一鳳重修衛志序  
云夫天地風氣始於樸樸則開開則盛故聖人不能不用文以救  
忠質之窮第其過靡則節之故曰文明以止余觀施城雖鄰夷而  
漢官威儀士紳文學父老子弟彬彬如也乃去城不數里民則處於  
不華不夷之間以先王垂世大教莫如冠裳而民且有不冠之首

他又可知若然者豈以種雜槃弧難遊文明之治乎夫三代以上  
之中國南不過江黃吳楚四大國春秋夷之至於兩浙七閩百粵  
之區漢武始入職方前此斷髮文身章甫無用者今則家絃戶誦  
文學比於鄒魯何盛也毋亦風氣有必開之漸而人事又迎其機  
與之更始也且漢武初通西南夷使司馬相如馳檄諭蜀不有蜀  
不變服巴不易俗之語乎施鄰巴蜀此亦可鑒則安見其有作新  
而槃弧不可化而中國荒服不可進而鄒魯即施自隋唐以來本  
列州郡高帝為控馭十四土司省州入衛要非得已其設學籓諸  
生則數更豐於他郡可見聖神本意亟欲用夏變夷新此一方民  
而民可自外德化上可漫無勞來匡直之計哉然欲化民成俗又

當先體省州入衛之故而後措諸安全夫國初設衛以衛民耳其弊也借民衛衛又其弊也土著不能衛衛乃借客兵以衛衛此天下軍政之大弊也施更可異戶籍減額餉停夫既不能自衛矣而土著客兵之衛衛者亦安在甚至雉堞盡圯藩籬可撤此不過循渙而溺駕馬有戀棧之思連雞無俱棲之勢彼則孰以僻陋為虞耳不思恃陋而不備莒之所以見襲於楚者語曰非我族類其心必異安有斗大孤城逼處豺狼窟中而幸彼為孝子順孫永遠就我戎索哉且今雖羈縻漢法能如數十年前肅然不爽尺寸否察影見形智者事也吾願蒞斯土者無以燕樂侈遙制無以鞭長勒馬腹用對高帝用夏變夷之休命則李大夫岐陽修乘深意不過

咸豐縣志

卷十二 雜志

百四十五

在是即理藉空言以維封疆少報聖天子不殺之恩亦端在是矣僭為之序按鄒公直節光明史因戍施日久於此邦情狀知之最悉故其序李志也洞中衛所之要害一轉瞬間而劫殺蹂躪之禍蔓延三十餘年自非終藉客兵大力而土酋未由襲服且非百八十年前改土歸流以一勞圖永逸安在蠻雲瘴雨之鄉今竟同遊堯天舜日之宇哉

舊府志載郡司馬商盤字寶意浙江會稽進士乾隆十六年官施南下車採風詩曰尚花乾鳥不尋常天遣題詩到夜郎特較江南風土異雪中解籜見新篁放衙官似放參僧小院人稀寂寞增乾鵲楂楂鳩殼殼方晴忽雨總無憑冉駝遺種語侏僂大旺當年有

舊司苗錦如雲成五色勝他番褐紫駝尼遠山疊疊近山攢負郭  
人家佔地寬一帶枳籬茅舍畔儘多豕棚少牛欄蒨薇嘉產并來  
甃葱翠連坡忽滿疇春摘嫩苗秋貯粉全家糧食不須憂蠻俗新  
移尚未成不知紡織但知耕一城四面方如斗三分居民七分兵  
早禾晚稻積京坻擊鼓藜藜息蜡時白酒黃雞盛背籠明朝去賽  
竹王祠羊腸蟻穴路彎彎古蹟猶存振武關散木良材同一炬年  
年十月便燒山東西贊佐舊曾聞忠尚唐崖兩處分莫怪獐獐蠻  
語熟新來蠻府作參軍野性依人飲啄同白鵬養得羽毛豐一官  
潦倒無歸思不與開籠祇閉籠椎髻雕題態若何利宣餘習未消  
磨金環貫耳誰家女解唱鼃龜蛺蝶歌官符商引到山家綠雪紛

紛乍吐芽莫怪採茶時節好火前茶勝兩前茶是時府縣設治甫  
十餘年利川汪家營駐同知唐崖駐通判觀此可見當日控馭之  
法要以西北邊境尤重也而利宣開化較晚不遠來咸文明差早  
亦可想見

王協夢字松廬江西德化進士和平簡易正色率屬守施數載民  
康物阜復留心學校士之以文藝就質者靡不得益以去後升江  
南巡道迄今八十餘年施之人知與不知皆爭相稱道甲申按行  
至咸題詠甚多古體四首云山石似層冰一一水痕凍鴻濛未開  
時想見勢瀕洞浩乎挾天風滔滔孰與控凝結萬萬古猶訝波濤  
送方理春然開可代飯甑用巖前一記茅塗堅欲無縫山罅自成

畦山田綠方種方從山後來忽度山前去下下而高高沿緣百盤  
路籃輿行山腰徑可入縑素絕壁噴飛泉羣峰隱深樹此間著蕉  
團豈謂煙霞痼惜哉蜀道難羈遊寡歡趣且啖諸葛薇且飽懶殘  
芋山靈笑我俗鳴騶到山阿重巖歷石磴宛轉如旋螺居人共牽  
引直上無延俄恍師巴猿智連臂下飲河阮孚蠟遊屐視此應殊  
科部民樂趣事吾政敢側頗要須除害馬無為勞者歌石鼓定堅  
緻嵌空何玲瓏木髮土為膚綿亘蠻煙中崇山極鳥道絕澗開蠶  
叢山攢水亦聚氣本相通天生此略約底用丸泥封瀑泉自時  
耳飛雲應盪胸何當迷遊侶桐帽支吟筇居民勤苦官長賢良即  
此見一斑矣

科舉之制肇自有唐有明創為制藝取士一時讀書種子爭以是  
為進身之階亦風氣使然也吾咸自有明設所以來士之力學而  
奮跡者大率因宦寄籍如蔣張徐梅冉許邢楊諸姓為多前清初  
建楊氏一族獨佔優勝楊小崧大令瀑泉學記推崇先德其所紀  
叙要皆實錄記中溯源未設縣以前楊氏一門發跡者多他惟梅  
蔣張邢冉盧孫廖倪陳趙金許多陸徐而已乾隆丙戌咸來宣利  
先輩聯名請頒學額太守張飭各縣會印具詳並夾單陳請時楊  
公昌麒捐銀數百兩指定蔣公進綬帶領銀文冒雪徒步赴省具  
呈蒙院司題准今額惟前赴荆宜應試跋涉維難於是六邑公呈  
建考棚會詳題准咸之首事國學梅常菁馮祖乾張文淵廖洪魁



邢思爵田廷聘楊昌連廩生蔣珂增生張秉恕梅常華附生蔣進  
綬蔣進元蔣燦陳尚賢陸永臨多能覃錫年冉永海廖洪祿梅如  
菁武庠倪登貴蔣元邢登榜姚大德等沿鄉勸捐而董事郡城勞  
心勞力凡三年棚始成者恩貢楊勝忠國學梅常菁也乾隆四十  
六年學使南匯吳白華始就施試士然則邇日之培植文教熱心  
公益者楊白麒楊勝忠父子之功殆較蔣氏進綬為尤多云宜其  
族人自乾嘉而後騰聲譽序者之接踵而起也

宋史五行志太平興國元年五月施州麥秀兩歧端拱二年施州  
野蚘蟲生害稼大中祥符七年施州禾一莖九穗至十二穗嘉祐  
六年施州歌羅若生芝四本元符元年八月施州李木連理紹興

咸豐縣志

卷十二 雜志

百零八

二十三年八月施州大風雨

明湖廣通志永樂初施州地大震

舊府志前清嘉慶三年有年咸豐六年夏五月黔咸兩縣地震大  
路壩山崩由悔家壩板橋溪抵蛇盤溪三十餘里皆成湖壓斃居  
民以數百計李姓最多九年清明日晝晦夏四月龍坪大水漂沒  
集場居舍十一年夏四月雷震聖宮柱碎其楹龍之爪是月黃鹿  
入城同治二年龍坪禾穗三年復雙穗蒲草塘東門溝兩處水門  
四年柿子坪林雙穗

前清光緒十五年庚寅五月二十日樂鄉里大水淹沒田廬甚多  
西北江一帶陡漲至十餘丈之高十日始消受害者約四五千戶

先是十四年秋初霪雨兩三月不止五穀霉爛至次年春夏之交仍苦水滂故是歲水患實為亘古所僅見二十二年丁酉樂鄉里又大水害稼特甚惟較庚寅水災僅及其半聞父老云咸豐初年八月曾有漲率至如此者緣此水受平樂二里溪流甚多又由西北江下五里即入山崗伏流春夏雨多水滙入口褊狹田土易遭淹沒要惟庚寅丁酉及咸豐年間為最甚云

咸邑歲收之豐歉雖曰天事而民風之華樸農功之勤惰關係實居多數以予聞父老所傳述乾嘉以上無論矣道光咸豐間斗米百數錢及二三百錢為止甚有斗米不及小錢百枚者其豐稔之景象十年中恒五六馬李悝曰穀甚賤則傷農甚貴則傷民是時

家給人足親睦安謐如故也推究其原因田土之墾治父詔其子凡勉其弟深耕易耨倍極勤勞加以慶弔宴會以及日用交際概從儉約以故人民忭求胥泯乾饑無愆其聰明者有志功名而文明以啟謹愆者盡力隴畝而追呼無聞熙熙乎二代邗隆景運也同治而降習尚繁華澆漓小民生計日漸窘迫黠者流為痞匪愚者安於媮惰而糴事益少講求之人近四十年來惟同治八九年間及光緒庚辰辛巳間辛丑壬寅間為粗號有年餘則概稱歉歲至癸酉庚寅丁酉歲大饑道殣相望間有人相食者戊申己酉庚戌辛亥四年斗米價至千錢以外而民殊少餓殍以窮戶尚有他項職業而藜藿蔬菜猶足充三分糧也

前清咸同兵事為吾咸巨難時秦漢洲都尉躬與其役光緒壬寅嘗手書始末以告徐壽林明經實能於當日情狀言之鑿鑿亟登之以供記事之考證其略云咸豐十一年六月有客自川來言有賊由黔之蜀將抵南川初不介意七月賊信日熾咸來戒嚴居民扶老攜幼各避尚寨有言尚寨不足恃不如曠野可行可藏紛紛議論互相恐駭至有堅巢不守恒先遁去邑宰盧公慎徽始諭防堵無一至者惟吾叔履卿公名建毅然赴難徐徽五丁金舫兩先生同往忽探報八月十一日賊已抵羊角磧徐丁兩先生沿途各辦團練獨吾叔招募勇丁二百名明山叔招勇五十名偉久兄與嶽均附往焉適施南協惠公藹亭名春者亦率本協兵二百名干

總譚德芳把總嚴得勝外委沈光才同防線壩縣令又釋死囚五十名隨堵線壩來鳳縣令王公頌山檄捕廳高某帶勇一百名咸衫馮武級外委曹占元帶勇五十名駐紮線壩之上流龔家壩酉陽州牧王公名麟飛派勇一百名協防人心稍定居民始有遷回者八月十一日賊由羊角磧起行焚郁山鎮十二日破梅子關黔彭營都司譚公陣亡是日黔江城陷大掠燒殺然猶不知為何股賊也既而屢犯我營不得飛渡賊出示誘民始知為偽張丞相傳丞相所部許楊崔唐四檢點夥黨二萬之衆惟悍酋許檢點驍勇殘忍所向披靡無櫻其鋒九月十三日天尚未明賊由老鷹關大隊撲來對岸鳴角列陣以待礮聲騰沸震烈山谷吾叔令吾弟兄

死守河沿從辰至午不退一步賊爭渡屢次輒被擊退不料龔家壩兵潰賊由上流渡河暗繞石鼓柵登長嶺崗抄我腦後別股賊繞楊柳溝燒我老營斷我歸路嗟乎險矣哉對岸觀音崖寨民驚呼回首已鋒刃交加矣惠協戎已由老營奔馳吾叔弟兄二百名勇無路可出由石鼓柵賊來路拚命衝出重圍吾叔馬行稍遲返戈救出縣官所募亡命死囚已早作波臣矣吾叔侄且戰且走實天佑之豈人力哉是日回安樂洞作自守計盧公已攜眷遠避十五日賊破來鳳縣王公頌山死之惠協戎回郡會太守陳公名洪鍾檄縣再三懇邀非秦軍不克禦敵叔以年老辭獄與偉人兄招集舊部二百名添募二百名協戎贈名勁字營朗山公亦帶五十

名濤安公自備軍餉義勇五十名副惠協戎同剿又興遊戎祿雙都戎慶制兵千餘名各鄉團勇二千名有奇軍威復振駐紮馬鞍山是年腊月二十二日夜果後營劉觀察嶽昭細作來文約黎明在西北門齊集攻城彼此未諳遠近我軍到時劉觀察已奔北幸我峽裏突出賊不敢窮追觀察我軍已不能收隊兵相持多時觀察軍不能復出許賊率悍黨萬餘左右抄來嶽兄偉人執鞭督戰不許退縮賊亦不進黃旂賊又由左翼撲譚千總隊前彼即飛奔一軍動萬軍皆裂嗚呼全軍盡潰雖斬譚首不能償其萬分之罪也偉人只被俘以其文弱未加縛束飭跪不屈手拾磚擊中偽楊檢點頭怒極以木棉裹油焚身至死罵不絕口遇害在來城桃花

井畔後邑宰立石誌其事嗟乎我兄能不痛哉惠協戎興遊戎雙  
都戎周守備宗福朱守備關把總沈外委等同日陣亡者約二十  
一員其餘我部哨官魏守備連陞武生邢大玘制兵勇丁損至二  
千有奇果後營是日亦損弁兵三百有奇嶽雖獨生亦幾血濺首  
領兵匹馬單刀潰圍而出許賊率數騎跟追逼我斷溝中被執斷  
髮越坑舍騎而生次年即同治元年正月初二日南兵再集尾剿  
偽翼王石達開竄由龍山越咸豐連營二百餘里所至蹂躪劫掠  
一空復盤踞咸邑丁寨等處來鳳股匪仍負固堅守初九日龍山  
大軍江公率章武二營寶慶永順果健各軍共四十餘營進逼來  
鳳賊不能戰繞城奔走回竄咸豐與石達開合營由利川往涪州

咸豐縣志

卷十二

雜志

百五十二

遇唐軍門有根徐軍門邦道兩大將敗走遂趨川南出貴州雲南  
邊境欲抄成都腦後暗渡大渡河走生番獠地及至雅州遇伏  
被擒然石達開率前隊西行敗沒癸亥七月後隊由舊路仍竄咸  
豐丁寨悍酋李復猷賊之所謂李宰輔是也聞吾施兵備嚴折回  
由張坪司沙子場下龍潭過洪江浦市抵柳州越廣西到越南在  
今所謂降將黑旂劉永福或曰即李宰輔之舊部也此吾鄉數百  
年來一大劫運特詳記之以俾後人勿忘云

爾雅釋獸魑如小熊竊毛而黃注今建平山中有此獸狀如熊而  
小毛麕淺赤黃色俗呼為赤熊疏竊淺也狀如小熊淺毛而黃者  
名魑按廣韻麕音組與粗同說文疏也舊府志

杜詩云籠竹和煙滴露稍拖地慈竹筍出與林齊擇全不解一線  
粵粵如垂柳兩三月方解擇次年始見枝葉山深多霧午時露珠  
猶滴未嘗不歎詩人體物之工也 宋志

獸莫猛如虎施南則有一猪二熊三虎之謠猪有羣有獨羣者年  
未深無大異獨者經年久無可羣而羣亦莫敢近也合抱木齧如  
朽大石喙觸之立碎虎豹見之咸避莫敢鬥者 宋志

施黔中多白花蛇螫人必死縣中板簿多退丁者非蛇傷則虎傷  
之也卅連蠻獠三月草長蛇盛九月草衰蛇向蟄居民造毒藥取  
蛇倒懸之以刀刺其鼻下以器盛其血第一滴用以毒人立死故  
只取第二第三四者毒血一滴以麪和作四丸中此毒者先吐血

咸豐縣志

卷十一

雜志

百五十三

須臾五臟壅滿潰爛李純之少監云惟朱砂膏可治此毒純之以  
藥救人無數仍刻其方以救士民 談苑

蝦蟆池在衛城南二百八十里池中多蝦蟆方春水生輒跳擲岸  
上後渠生爪前趾變翼隨衆禽飛去變未成者土人常得於禽網  
中 童志

土產香楠而民不知蓄陳者絕少產茶而民拙於焙香者絕少產  
五加皮用以浸酒香美有殊效而民尚桂花酒三者皆恨事 宋志

俗以麪藥和雜糧於罈中久之成酒飲時開罈沃以沸湯置竹管  
其中曰啞篋先以一人吸啞篋曰開罈然彼此輪吸初吸時味甚  
濃厚頻添沸湯則味亦漸薄蓋蜀中釀法也鉛山蔣心餘太史雅

堂集有呶酒詩可謂曲盡其妙茲不贅登舊府志

南史解叔謙傳母有疾夜於庭中稽顙祈福聞空中語曰此病得丁公藤為酒便瘥即訪醫及本草註皆無識者乃求訪至宜都郡遙見山中一老公伐木問其所用荅曰此丁公藤療風尤驗謙便拜伏流涕具言來意此公愴然以四段與之并示以漬酒法叔謙受之願視此人不復知處依法為酒母病即瘥按東醫寶鑑湯液篇云味辛無毒主祛風補血衰者是其驗也一名南藤莖如馬鞭有節紫褐色葉如杏葉而尖今利川小溪河猴子崖有之舊府志

蓮池與柳池法兄弟也本蜀籍蓮池入吳柳池入楚各以道顯柳池結庵咸邑治北八十里法名無相所居虎豹馴伏苗民和輯咸豐縣志

咸豐縣志

卷十二 雜志

百零四

槃時吐火自焚鄉人建寺以祀宋志

曹和尚邑之麻柳壩人少年販布為業年三十八軟塘河觀音閣為僧後掛錫於胡家山嚴氏之家廟年八十餘持牟尼珠然大法炬自焚觀者如堵道光十八年三月望日事也又光緒初有吉和尚者亦邑之樂鄉里碗廠坪人入來鳳革勒車某寺為僧清修十餘年亦積薪自焚後頗著靈異於寺之遠近云

附溫貢二烈士合傳

水性使人通山性使人塞此就智識概畧論之也若就道德言則性取堅定每見僻遠山鄉人民徇疆樸直不甘臣虜一經激勵而發焉不可遏撼之不可撓此其大識大智根本道德不徒

斷斷較量聞見技能之未已也吾鄉自巴國故疆莫子殉義久為父老所豔稱秦漢而下州郡兼治迄於趙宋已駸駸乎戶詩書家禮樂競勝聲明文物之邦矣南渡後蒙古內侵中原雲擾而吾咸附近各州邑風氣自為屢躓旋起遂以土司傳四百年前清定鼎湖南北歸命較早而吾衛所土流官民延至康熙二十一年始奉正朔追溯前此捐身命竭膏血與外人爭獨立自治權以保存此漢代衣冠漢族名義者遺裔先民難僅指數而當辛亥仲秋鄂軍起義前八月有溫黃二烈士者固吾咸之傑士亦即山邑數百里內人民之代表也

溫烈士名朝鍾字靜澄一字果齋邑西信孚里大路壩人少孤

性敏讀書過目無忘下筆滔滔不輟時制科未廢同學皆攻舉子業烈士獨於經史外旁涉諸子百家佛道經典謂天下之理至賾至邃陋儒所未盡傳者非旁搜博採不足以窮天下之變而會其通歲甲辰為戚友敦促因族籍入四川黔江縣學賀者方盈門烈士謂所親曰此君主牢籠術漢族二百餘年之恥何榮譽足云返里布衣蔬食日與田夫野老言因果報應濟人利物刺刺不休後兼通岐黃舊學診病不問遠近寒暑風雨一呼即至至輒有效畢則勸其修德富者或導之作善己惟飢餐渴飲他無所受人遂呼溫神仙烈士方懷大志欲自韜晦更自號為恍惚道人家去黔城近偶因事至黔知其才者屢強以公務



不就惟言某利宜如何與某弊宜如何祛是非予奪不稍寬假  
丙午隨其師赴錦城更名溫而理應考通省師範學校主試者  
評曰文怪字怪名怪抑列二名有友慶曰從此可鑽研科學矣  
答曰子非不知科學之重恐學得屠龍無下手處棄而不就遍  
遊川黔兩湖探山川之要隘訪草澤之英雄聞鄂中有造炸彈  
者從之久而不傳旋又從一人學劍術會其師王雲笠以烈士  
妻女在幄竊竊然為似續憂苦招之始返於時黔邑程君芝軒  
歸自東瀛夙識其衷介入同盟會乃與咸黔二邑諸同志翻印  
滅漢八策激動人心旋倡風俗改良會由一鄉至各鄉到處演  
講人多悟焉邑紳黃玉山富於貲願竭家相助黔士王克明談

茂材各傾囊恣其所為勢力漸厚乃暗購軍火土礮又結鐵血  
英雄會隱以兵法布列其同黨繼此三四年內而近邑不入其  
黨者蓋亦少矣既而革命風潮騰於各行省湖北施鶴道出示  
通緝烈士時赴西北各鄉廣事聯絡邑令徐培亦學自東瀛者  
與烈士徹夜談謂時尚未可勿徒取禍烈士心卑其言迫於時  
勢改名孔保華潛歸往江津永川訪同盟友謀起兵有壯其志  
者賦詩贈行曰世界昏沈不計年風毛雨血盡烽煙誰能逐鹿  
行千里我欲屠龍下九淵提起環球烘白日掀翻滄海洗青天  
拚將一著成孤注免得情絲恨縷牽烈士途中偶占曰瀛海劫  
灰欲化塵神州獅睡孰為春龍將離沼雲先起虎未嘯林風已

生尼父尚輕亡國虜漢兒甘作醉鄉民皇天有命誅殘暴誰是  
攀鱗附翼人是年庚戌日俄協約報紙喧騰黔令王熾昌又藉  
名苛征烈士欲因以起義冬十一月下旬約同志聚議於彭水  
縣之鳳池山其仇温百川飛告黔咸兩邑咸令不為動而黔令  
集附近權紳議防剿遣武舉孫常禮率三百人防大壩口外委  
許瀛洲率三百人防八面山餘分紮四隘聲勢洶湧烈士左右  
僅二百人不得已多方激勵誓同一死乃薙髮下山別檄志士  
裴從之集數十人越八面山揚旗放礮牽制許軍自統所部二  
百人直奔大壩口與衆約曰吾等倡義掃除暴君汚吏救民水  
火所過地方口食外無絲毫犯官兵抵敵非有令不得妄開礮

官軍據要害窺其至礮斃温軍三人烈士從山頂旁擊飛取其  
統帶首級官軍如鳥獸散整隊入城大呼同胞父老子弟諸姑  
姊妹幸勿驚惶我原為同胞定大計謀大業驅除醜虜光復漢  
業城內亦多知烈士者義旗所指申明約束闐闐無驚縣令及  
權紳則聞風早遁蓋十二月初七日也或勸烈士設軍政府樓  
城固守馳檄四方以待響應答曰邑城小而糧乏持久非計且  
僅得一邑遽立政府以自大非吾輩素志今莫如先大破壞使  
彼無可收拾然後我所入易得志故城內一無佈置祇與父老  
子弟演說滿漢種界及專制政體之暴橫與各處官吏之貪污  
人民之苦楚凡有血氣者皆宜起而自強自治聞者淚下如是

一日復親至四鄉集同志應者約七八千人聚於兩會場人數既多器械尤缺畧為部署令軍人翦去髮辮戴白袖章外衣前後一律粉書國民軍各軍長官斜掛白帶於肩標明職銜等級每十人一棚十棚一隊五隊一營兩營一標四標一師各有長長以施雲山龐耀廷談會元陶純五等為最勇健衆擁烈士任軍司令總長王克明次長黃玉山任後勁主餉運倉卒成軍於十二日行抵城西五里之上沙壩暮雲漫天人馬俱飢寒特甚突來酉陽防軍及酉黔鄉團數百陣於西門外萬柳堤轟斃溫軍數人烈士率勁旅緣武陵山行後至仗劍奮呼期於一死相待父之官軍礮利能擊遠溫軍徒以義烈相感激鏖戰至二三

更時前仆後繼莫有退志烈士見事不濟徒薄死無益思退扼險要自固轉行至破水坪而電調川黔湘鄂大兵踵至四面合圍或勸其逃匿圖再舉烈士曰首其事者當其難何逃焉焚其會名冊隻身向官軍前大叱曰我溫某也一切皆我所為不與他人事酉陽州牧楊兆龍欲加拷訊烈士罵曰爾等皆漢人不知雪祖宗之恥反為仇盡力真沒天理良心問我何為欲殺則殺耳官兵分裂之蜀軍得其頭鄂湘分其手足時距起義纔十日耳報由川湖兩督奏獎官職者二十餘人烈士遇害時年三十二歲無子

黃烈士名明星字玉山邑西信孚里蛇盤溪人幼性敦樸讀書

通大義以不屑治章句學廢舉子業理家政究農商實業居積致富而孝親恭友厚族睦鄰里黨稱盛德焉前清光緒壬午以降歲屢荐饑烈士於凶年設賑糶局捐貲濟貧餘則每春施錢散種全活甚衆歷十餘年不少衰蛇盤溪至大路壩行徑磳确亘三十餘里居民苦之烈士慨捐千餘金砌石削巉越戊申己酉兩載工竣行旅翕然稱便又修善堂施醫藥棺板助育嬰學堂各義舉但屬公益雖巨貲不稍吝惜垂老以鄉望素孚充本里區長主持地方自治公務以慎以勤士民咸嘉賴焉歲丙午其戚溫朝鍾遊錦城遇陳君芝軒得革命秘書歸家倡風俗改良會烈士首贊成之隨延溫至其家縱談時勢預聞革黨秘謀

未幾又倡鐵血英雄會烈士即捐貲數百緡暗購軍火器械又助旅費遣其姪黃盛湘甥王治安遊川湘演說聯絡同志而附近志士談作霖王克明王雲登裴從之施雲山楊松柏陶繩武軍萬順黎美全何順臣謝國昌溫夢九溫子泉黎煥光鄒前三及其族人黃海山黃敦五黃凌雲等皆各輸財出力聲勢甚盛尤以烈士一門為濟乏內府歲庚戌革命風潮日益劇烈鄂督飛檄上游道府通緝黨人烈士等相語謂時期已至北美十三州同日獨立轉眼可卜當不止如隋元末造楊竿而起者之紛紛見告也加以黔令王熾昌方藉新政籌款以苛虐困良民遂偕溫王諸烈士聚議於彭水縣之鳳池山約日起兵不意溫百

川赴官告訐咸令徐培怒置百川於獄黔令則集團勇議防剿事宜溫軍不得已於十二月初七日倉卒統眾過蛇盤溪越大壩口破黔江縣王令潛逃斬武舉孫常禮革軍入城後因兵力單弱回本里號召壯士圖進取義兵八千人軍需火器胥於黃宅取給甫入城遇酉陽大隊兵圍相持未決而鄂湘蜀各官軍踵至合圍革軍敗北溫烈士及施雲山數十人死之烈士素有德鄉里競為庇護隱匿既聞首要諸人皆殉義且三省官弁爭以搜殺餘黨要功為鄉民累乃挺身見警務長陳錫光請解赴黔邑王令熾昌楊牧兆龍親鞫之皆直供不諱楊牧以事平又奉蜀督不許株連之電諭欲曲為解脫發署令文拯覆訊仍始

終執一詞乃於辛亥年四月初四日在黔城西關外與楊松柏同遇害時年六十有二也臨刑時神色自若但言我等為漢族死必能留名千載惜未親睹革命成功耳觀者皆為下淚痛罵文令殘毒非人烈士體豐腴素木訥於流俗少所訾議及與談古今名節義烈事輒激急奮發有不可遏抑之概以故得名晚而於革命諸子尤膠漆相投論者謂是役也非溫身任提倡末由鼓動川楚人心非黃始終毀家資助溫雖挾是大願仍跼蹐無所措手烈士死後文令意猶未慊復罰其子錢二千緡泊鄂軍起全蜀反正黔江軍政府迫於大義乃因子盛林籲訴免其追產入官同時有王克明字湘月者黔江世家子名著於鄉與

二烈士皆戚好起義時正忙婚娶強之始出曰君等  
過卒然天下大事多成於偶然願為臂助不成則以死繼之立  
率其侄王建邦等星馳雲合溫軍驟增數十倍事敗為其同  
姓指名出首王亦赴義不屈遂遭剖腹剖心之慘田產盡充公  
其侄建邦智勇深沈戰恒身先士卒敗後奔江楚辛亥十月馳  
歸約同志舉義再復黔江城以成死者之志民國元年予歸自  
蜀西震溫黃王三烈士之名亟欲廣徵軼事為合傳以垂於後  
適溫君夢九黃君凌雲先後以溫烈士傳黃烈士事略見示王  
氏以道遠不果來因畧加竄易紀其大節於此今民國成立黔  
邑官紳以義兵所至功德在民為三烈士設主合祀於范公祠

而吾鄂省垣方闢館稽勳廣事蒐羅所有亮節英光從此當益  
顯赫烈士有知其亦可以瞑目也與

贊曰予曩在日京與友人談革命謂宜熟誦大蘇留侯論為伊  
尹太公之謀不可為荆軻聶政之舉或者難之以為人人樂於  
為伊尹太公而憚於為荆軻聶政則相視莫敢先動將陳涉世  
家可以不作而蕭相末由傳開國元勳矣顧時處萬難才無偏  
重亦視力所能為何如耳當溫軍初起電聞予適客蜀督趙次  
珊幕中大吏以情形熟悉密檄權黔令為保薦酬庸也予再  
四固辭復面陳當道飭所司毋許張大株連蓋逆憫其時猶未  
可而吾鄉人肝腦頭顱將盡膏泥塗藩溷而無術拯掖也幸天

假之緣甫八閱月武昌首義遂告成功與有勞者利官來咸學生為多雖曰鄉之人義勇貞烈得天獨厚抑因吾邑烈士勉為其難遂迫不及待用答同仇於地下與故論者曰民國之興也成於種族革命者之手尤成於政治革命教育革命者之苦口婆心而鄂軍之起也激於爭路同志之奔走號呼尤激於邊鄙小邑之毫無挾持舍身犯難然天下大器破壞難建設亦不易繼自今鄉中父老子弟必有奇才異能出而任經營締造之責者不禁為諸烈士炘香祝之

咸豐縣反正以來紀事本末 冉焯字來稿

咸邑自溫黃諸烈士殉義以後有識之士羣曉然於公論既已

咸豐縣志

卷十二 雜志

百六十二

大張漢旗終當復振而非常之舉卒不能不有所憑藉時可乘則一隅奏功六合響應至若僻處邊疆又值前清陸防軍隊基布星羅欲以匹夫奮臂一呼出而與之決死生爭勝負曷若待時而動一反手間立睹神州光復之為愈也迨辛亥八月武昌首義閱數日電信傳播郡屬頗有聞者道府以下仍秘之直至九月初九日駐施陸軍管帶李如圭奉黎都督電令閩劄官民悉樹漢字白旂於時前縣令徐培方卸篆署令張鳴鳳驚懼失措商之城鄉士紳及前縣徐令徐維之吏才曾留學日本法政於世界大局較為了徹立贊成之鄉紳秦國鏞馮永濤袁焯蔣克勤徐大均鄧文架劉自立王永烈皆謂此吾漢旗人人當為

之事幸武漢志士先得我心尚何疑慮之有張頗悟勉從其請而閤邑士民則已懽聲雷動爭樹漢幟頌新國萬歲矣旋集各里紳民開保安會於興國寺籌款團練各保秩序則學員劉宏聲王承憲蕭焯耀馮家楨張明鰲等尤惟熱心出力惟是多事之秋人心不靖以二百餘年專制淫威一旦敗於庠序學徒偏裨卒伍之手其賢良者方以聞風而慶昇平其狡黠者且因變故而懷覬覦李管帶者軍人中具有普通智識者也施城反正時賴其平和手段俾全郡人民安堵雞犬無驚不意九月二十日竟為曾行道所戕致有朱揚武繼任朱固防軍管帶與陸軍素不相能而吾咸陸軍隊官劉鎮湘自朱任部長遂不能不有

張懋材王宗義諸人之更易當劉鎮湘在咸始遭張家坪旋圯之圍攻而匪黨不敢窺及內地繼有蔣吉亭會黨之煽動而商民不致遭其荼毒陸軍消患無形之功亦未可沒迨至劉鎮湘南下而張懋材以軍餉勒派鄉民王宗義以淫掠情同盜賊凡此皆官弁之胎禍釀亂皆不得謂吾咸民之自取也且縣境近鄰川湘黔三省俗尚淳良雖猝遇國變訛言四出本地居民仍安業不輕移徙張家坪當外匪出入要道向駐陸軍一棚自重九後拔隊回施九月十九日匪徒由來鳳誠一里木車壩孫賓家起事四出剽掠流氓附之其勢益張二十七日出掠至大河壩來邑西北最盛村集也距張家坪僅五十里居民聞耗十室



九驚時咸屬上平陽里紳民王復興吳秀峰冉福田蔣潤南冉漢章等聯團攻匪桐車壩紳民袁仁輔尹懋崧冉焯孚諸人亦憤匪黨不知民族大義妨害治安相與樹漢旂造土礮糾合民團預籌防剿而樂鄉里徐秦丁魏諸族亦籌餉集團為犄角分期操演部署初定匪已於是月晦日直入咸境盤踞平陽里旋坨之民家男女老弱避竄巖穴間者騷動及百里之外十月朔日民團倡義諸人率村民千餘分屯沿礮溪落人巖兩處扼其咽喉不一時來鳳鄉團楊政清田虎卿曾虎臣張子玉等報請施南陸軍六十餘人率鄉團七百餘人會同咸團攻擊匪皆用巨礮民團伺其將擊伏地避匿猱行漸進則以火焚其村落匪

燕火藥乘勢炸發火光大起匪又聚於一處四面皆民兵一時槍聲隆隆焚死及槍斃者積齒盈厠計殺著名匪首樊大江覃吉武向衡卿匡南山覃虎臣白玉方田金臣向輔臣楊光先共九人餘匪一百三十五人陸續追殺者亦三十餘人匪黨本甚衆剽悍者約三四百先分一股入後山抄掠故未能聚而殲之然亦是褫其魄矣是役也匪由鄰境竄入才負隅固守楊政清等尾追疾行咸邑團總吳月峰手巨礮擊遠命中戰尤勇匪死者百七十有奇團丁僅誤傷一人來咸兩邑團練之聲威大振袁仁輔冉焯孚等復以大局未定開保安會於普子山演說漢滿情形聞者悽然泣下已而提倡翦辮樂從者數十人時鄂軍

政府猶未布剪髮之令也繼又編查村民擇年壯者教以兵式體操其他平樂二里民團皆日討申傲以備不虞並為長衛桑梓之計南京政府成立變易政體改用陽歷至民國元年二月逸匪詹漢卿亦被西陽團紳邱福海遣人刺死蓋至是而匪氣雖惡民氣愈強矣三月二十一日又有李南陔彭老五李發發三人者聚匪七百六十餘人突來川界之沙子場揚言復仇見團軍勢大僅掠邊境向白家河一帶南去民團追之不及而返書曰有備無患諒哉言乎是月永樂平三里士民倡首組織本縣臨時議會興利除弊與民更新至張令解任陳知事侃蒞咸時風鶴之驚猶未盡息未幾議長徐大煜等與知事秘密會商

略示誅鋤而暴徒遂盡遠颺秩序即大恢復噫嘻清政不綱改革後教育未能驟興野蠻民族不犧牲性命以購和平之幸福而乘勢剝掠以妨人羣之生計其不免天演之淘汰也固宜而我同志諸君能結團冒險以弭大難獨不能集羣策羣力以幾長治久安能枕戈奮袂以息內憂獨不能出大勇大智以禦敵國外患是則我同胞所尤當勉力以圖者也

元年一月予由蜀旋里適寧遠張廣為孝廉方室予咸以軍  
備解及馮安撫三科七所之政策敦請取決行止於時全國秩  
序大亂邑地當川湘黔三省之邊土匪乘間竊發居民一夕數驚  
及披閱上峯來文示諭無一非腴民脂膏促民死命之舉乃商同  
張令將吾咸公私財源合盤托出另擬簡易可行法二十條覆呈  
使署迨安撫蠲免派餉之令下而沔陽陳同愚明府奉檄適來方  
張令任內予固以臨時縣會主席秉議政權洎陳明府初政外匪  
關邑中新易長官西南邊地警報時聞至鄂中司署教令歧出莫  
衷一是都人士羣以縣會尤宜繼續成立集思廣益以輔官力之  
咸豐縣志

不及陳明府者吾鄂學界中傑出士也其室成也以咸紳推薦故  
奉軍政府劄委其蒞咸也以留東同學故遇事每加延訪自維樸  
拙謂此過渡時代又生長極瘠簡縣無論實無政治能力即有能  
力而以甚不均齊之國民程度又仰承素無經驗之傳舍大僚掣  
肘鑿杓在在堪虞偶有建白孰不以頑固迂疏訥之幸明府不棄  
凡所建議皆蒙採納就中重要者如治匪參用舊法濟乏輸入外  
資請緩辦初級審檢所就地行嚴格限制選舉雖格於情勢不盡  
見諸施行而明府固皆許為同調未嘗壅於上聞是以歷任兩年  
餘盜匪不敢逞而良懦獲安征税得其平而怨讟不作初級審檢  
雖耗費逾萬而咸民尚未受此賠累自治雖連帶停辦而檢閱行

縣行省本會議案或百餘起或十餘起以繞朝非會之心效賈生漢室之哭如饒民政長所謂為地方謀公益者實屬絕無或其他六十八屬甘居不辭未可以之厚誣吾咸也尤可異者民國元年中吾鄂軍民兩府草草成立或朝布一令不終日而即成反汗或暮置一官不經宿而旋就裁撤紛歧矛盾若理亂絲而明府與予時相商權謂某令可虛應而難期實行某事毋急進而宜從緩圖鎮靜以疎審慎以出如必在在踵謬沿謠將來補救即云有方而民之受其害者已不尠矣有所擬議多表同情事後追維益徵契合民國二年春予以省衆兩院選舉異常複雜決計辭退議長一席而為第二次臨時縣會之組織從此屏跡伏處願絕口不談國

事而明府以吾咸秩序大定謀長治久安於是乎先為調查戶口圖表又因第二次臨時縣會之請刻予所著咸豐新志并予序言加之獎飾予因是有感矣民國前途之可危論者每謂近日人民溺於權利爭競一途道德教育甚形退化道德範圍極廣而當大亂之後開創之初惟躬行禮讓為天下先然後人心帖服百度維新漸企平章協和之盛軌故虞書美放勳曰允恭克讓美重華曰溫恭允塞孔子言禮讓為國蓋為爭權利者下鍼砭也至堯舜初政皆在民食其次則先明刑以弼教益見撥亂反正必鋤暴始能安良惡可泥於干羽苗格畫地為獄之說遂欲倒行而逆施即大抵古人刑措不用皆在治定功成禮教大行之後苗之逆命必

於二代授受之間微有疑議其反抗在個人非在全國舜以至誠修德默為感動而苗果七旬來格如彼恃強違法大害治安舜豈鯁鯁偃武修文為姑息養奸之計乎且舜代疆域北不過長城南不過衡嶽東不逾渤海西不逾流沙而工虞分職土物制貢不能先養與教而輕議設施甚矣吾族共和國家之建設師資匪遙返求焉已得立國大要惟現值強鄰環伺外債日迫又不僅以休養墨守為萬全之策耳年來行政官吏不避本籍予初主持縣會曾建議近地員紳任事僅支半薪匪惟數米而炊亦逆慮鄉紳不知重名輕利克己愛人流弊所至一切行政實權終必授之遠籍加以方今政事首重籌款凡向日歲收已有者必加增未有者必新

取惟此宣力服務諸人義務多而權利少庶足以息剝肉醫瘡之忿而公家財力亦得少紓今政術大更官必出省而予杞憂又方長矣蓋民國元年以前以君權無限之故間接至於官吏濫用其權激而演成辛亥秋季仇官排外玉石不分之慘局民國元年以後以立法不善之故致使無識暴民濫用其權又激而遍下癸丑冬季解散議會停辦自治之通令今則國家政權壹是集於官吏夫集權誠是也特爭權者日衆竊權者日多在躬秉此權者審時觀變善用之則福民終以利國雖犧牲個人有餘榮不善用之則誤國由於殃民縱殉以身家亦有餘罪讀大總統第一屆知事訓辭具見政府威信固當保存而其殷殷責難於各員者無在不以

自利自私濫用其權為慮明府宰咸他不具論惟當政局變幻之衝持之二十八月之久課諸己則勤政而知要取諸人則雅量而虛懷中庸稱大知曰好問察言執兩用中操斯術也以往從政天下不難豈徒區區宰邑擅能哉予故因縣志刻成謹附筆以待他年論定而吾咸縣會諸君之苦心毅力亦均不能泯沒於世云民國三年六月朔日大煜又識

